

高太史大全集

一

高太史大

全集

四部叢刊初編集部

高太史大全集叙

故嘉議大夫戶部侍郎前翰林國史院
編脩官授 諸王經青丘先生高啓文
集二十四卷舊一千若干篇今二千若
千篇儒士徐庸字用理之所廣也用理
既以類廣先生文集乃以示昌昌謹爲
序之曰夫將以所學明先王之道救當
世之弊則必著于言焉庶幾見者之用
聞者之有攷也六經更聖人之手其言
粹然一出于正要之所以存鑒戒者亦
多聖人既沒縱橫捭闔之說興大道幾
微漢廣游學之路董生賈誼始各以其
學自見著書數千萬言沉雄簡奧其明
先王之道陳當世之務畧備矣唐韓愈
起力變八代之衰習故其言惟醅而杜
甫李白又各以其學自見明王道具時

政謂之詩史宋歐陽脩博學力行本論
之言有益於治至朱元晦則根據六經
之旨攘斥百氏之非歸然爲世儒宗其
大要使人審王伯之畧致義利之辨而
已今諸家之言具存考之可知用之猶
尚可行也蓋三代而下漢唐宋之所以
聳德著業而繼焉以稱治者有賴於是
焉先生生元丙子少稟神慧長讀六經
諸家之言融而通之會而成之又取而
力行之其發之於言則浩乎如大川之
決防也鏘乎如洞庭之張樂也儻乎如
幽壑之舞蛟也致之於用則如射者之
於的準乎其無疑也然值國步之既促
不苟於用隱於青丘登高望遠撫時懷
古其言多激烈慨慷若將於世無足爲
者及我

太祖高皇帝定鼎建業肆

詔徵賢先生起與元史之脩錄善醜惡
儒者之功庶幾彰施史成授諸王經進
戶部侍郎尊顯極至先生感之力頌先
王之道以匡濟世務言多雄偉竒古足
以聳張德業裨益治化時甚賴之未久
即辭去後亦蹇連以死嗚呼殆天所
以厄斯文也嘗竊論焉天道惡滿取之
不可以全然誦其身則必信其聲是以
董賈賤逐而名長甫白窮放而詩傳韓
愈歐陽脩朱元晦雖號通顯而未免罷
斥然其言至於今誦習而師承者不衰
正柳宗元所云生而不遇死則垂聲者
衆也先生死始三十有九使少優游而
待之則得將止於是乎言將止於是乎
行將止於是乎嗚呼天實爲之謂之何

哉用理師學於先生之言得之既深遂
勤圖傳之亦使聞者考之而可知見者
用之而可行以明其言之果有賴於世
也嗚呼厚矣

景泰元年庚午冬十二月望日

賜進士出身吳劉昌序

缶鳴集序

人生而形具矣形具而聲發矣因其聲而名之則有言矣因其言而名之則有文矣故文者言之精也而詩又文之精者以其取聲之韻合言之文而爲之也豈易也哉近之於身遠之於物大之爲天地變之爲鬼神與凡古今治政民俗之不同史氏之不及具載者取而詠歌之載賡之不費辭說而極乎形容之妙比興之微若是者豈非風雅之遺意哉宜君子有以取之吳郡高君季迪少有俊才始余得其詩於金華見之未嘗不愛及來京師同在史局又得其所謂缶鳴集者閱之累目不倦合古今體數百首其事雖微可以攷得失備史氏之所懲勸其辭則余之所欲摹擬而莫之

工者鏗鏘振發而曲折宵如也果何自而得之方吳郡未入板籍不幸爲潛竊者據之擅其利者十年矣士於是時熟不苟升斗之祿以自活鬻釜間季迪日與之處曾不覺焉顧乃率其儔類倡和乎山之厓水之澨取世俗之所不好者而好之舍毫伸牘鳴聲咿咿及其得意又自以爲天下之樂舉不足以易其樂焉此其所得爲如何哉吾聞鍾聲鏗而立踈石聲磬而立辨絲聲哀而立蘆竹聲濫而立會鞀鼓之聲灌而立動若缶鳴之聲果何音也其西音乎南音乎抑太古之遺音乎不然則天下將治正始之音特作而此其兆乎何爲一旦而及吾耳也得乎天者不求知於人求知於人者不得乎天季迪不求知於余而余

知之者商聲之歌不必出於已也而曾
子歌之焱氏之頌不必費辭也而後世
稱之則季迪之樂亦余樂也嗟夫懂懂
往來朋從尔思孰能爲余發其吟風之
趣乎季迪由是求之其於道也幾幾矣
洪武二年秋七月長山病叟胡翰序

缶鳴集序

高季迪詩十二卷凡爲樂府五七言近
古體九百三十七首余爲叙而評之曰
季迪之詩雋逸而清麗如秋空飛隼盪
旋百折招之不肯下又如碧水夫渠不
假雕飾條然塵外有君子之風焉以余
之所言而余之所不言從可知已然則
季迪之詩集不可傳也歟季迪中吳人
余嘗論吳中之詩唐有陸魯望宋有范
至能魯望之詩寄興幽遠而其音響則
駸駸已迫於晚唐至能之詩措辭溫縹
然其格調特宋焉而已耳在勝國時余
適吳則陳子平詩其爲言率實而流麗
揆之陸范吾不知其孰先孰後也吳之
詩在元惟子平而知者蓋鮮今吾於是
復得季迪之詩焉季迪年方壯志氣偉

然其所自見殆不止於詩而其於詩則已能自成家與唐宋以來作者又不知孰先孰後也嗟乎詩之道微矣世之有志於斯者莫不鞠明究曠疲心思於簡牘間而後爲言乃或有可傳其不可傳者固不可勝數是不可不謂之難也以詩之難能如此而季迪乃以此自成家追古之作者以爲並豈非其才之過人也歟序而傳之世必有因其詩而知其才者矣季迪名啓季迪字也頃承 詔與余同脩元史尋入 內府教胄子授翰林國史編脩云

洪武庚戌三月翰林侍講制金華王禕序

缶鳴集序

言之精者謂之文詩又文之最精者何以知其然耶二氣爲之橐籥而鼓之以風霆然後天之聲出焉衆竅爲之呼吸而盪之以江河然後地之聲出焉受形於兩間而靈於物者爲人然氣至混然天成發宣鴻鬱然後人之聲出焉凡人

有聲斯有言有言斯有文文至於詩包括品彙陶冶化工根乎性情之真達於音響之妙宮商間作金石並鳴由是而聲之用極矣世皆知以詩而觀詩或未

知以文而觀詩因謂詩特文章之末技庸詎知聲成文謂之音而詩之中文已具焉韓退之之言曰李杜文章在光燄萬丈長斯言也其善論詩者已然非天機悟入識見超詣亦何足以語此哉渤

海高君李迪踈爽雋邁警敏絕人無書不讀而尤邃於群史與余友二十年余知李迪之能言也久然未嘗不以其詩而得之也始李迪之爲詩不務同流俗直欲趨漢魏以還及唐諸家作者之林每一篇出見者傳誦名隱隱起諸公間及游四方不懈益勤刮磨漱滌日新月異薦紳諸老咸自以爲不及李迪之於詩誠精矣然其意則自謂古風人一辭不如是也三百篇之傳豈皆出於一人之手或者其一二皆可以遺之後來尚奚以多爲哉吾非欲成一家言亦性焉而嗜之之篤殆與人之耽悅世好者同一肆志留情而其樂蓋未能以此而易彼也聞者以爲然當其一室燕坐圖書左右離列拂拭塵埃几案間冥默觀思

神與趣融景與心會魚龍出沒巨海中殆難以測度或花間月下引觴獨酌酒酣氣豪放奇作楚調已而吟思俊發湧若源泉捷如風雨頃刻數百言落筆弗能休故李迪之詩緣情隨事因物賦形橫縱百出開合變化而不拘拘乎一體之長其體製雅醇則冠冕委蛇佩玉而長裾也其思致清遠則秋空素鶴迴翔欲下而輕雲霽月之連娟也至其文采綉麗如春花翹英蜀錦新濯其才氣俊逸如秦華秋隼之孤鶩昆侖八駿追風躡電而馳也李迪之於詩可謂能盡其心焉尔李迪之詩甚多有吹臺集缶鳴集鳳臺集凡爲書幾二千首皆當世之儒先君子序其端今年冬予訪之吳淞江上李迪出其詩示予蓋取舊所集諸

詩益加刪改彙粹爲一總題曰缶鳴集
自古樂府歌行而下至五七言諸體得
詩三百餘篇皆其精選富矣哉亦可謂
不易矣然是編也特以今年庚戌冬而
止後有作當別自爲集季迪不以余不
肖屬余序之庸敢叙諸編端以俟季迪
家姑蘇嘗應召脩元史教西學弟子負
入翰林爲編脩權戶部侍郎 賜歸鄉
里云

洪武三年十二月既望史官吳郡謝徽

序

原序

天下無事時士有豪邁奇崛之才而無所用往往放於山
林草澤之間與田夫野老沈酣歌呼以自快其意莫有聞
於世也逮天下有事則相與奮臂而起勇者騁其力智者
効其謀辯者行其說莫不有以濟事業而成功名蓋非向
之田夫野老所能羈留而狎玩者亦各因其時焉爾今天
下崩離征伐四出可謂有事之時也其決策於帷幄之中
揚武於軍旅之間奉命於疆場之外者皆上之所需而有
待乎智勇能辯之士也使山林草澤或有其人孰不願出
於其間以應上之所需而用己之所能有肯槁項老死於
布褐藜藿者哉余生是時實無其才雖欲自奮譬如人無
堅車良馬而欲適千里之塗不亦難歟故竊伏於婁江之
濱以自安其陋時登高邱望江水之東馳百里而注之海
波濤之所洶欵煙雲之所杳靄與夫草木之盛衰魚鳥之
翔泳凡可以感心而動目者一發於詩蓋所以遣憂憤於
兩忘置得喪於一笑者初不計其工不工也積而成帙因
名曰婁江吟稿若在衡門茅屋之下酒熟豕肥從田夫野
老相飲而醉拊缶而歌之亦足以適其適矣因序其篇端

以見余之自放於江湖者為無所能非有能而不用也妻

江吟集自序

古人之於詩不專意而為之也國風之作發於性情之不能已豈以為務哉後世始有名家者一事於此而不他疲殫心神搜刮萬象以求工於言語之間有所得意則歌吟蹈舞舉世之可樂者不足以易之深嗜篤好難以之取禍身罹困逐而不忍廢謂之感非歎余不幸而少有是好含毫伸牘吟聲唧唧不絕於口吻或視為廢事而喪志然獨念才疎力薄既進不能有為於當時退不能服勤於畎畝與其嗜世之末利汲汲者爭驚於形勢之途顧獨事此豈不亦少愈哉遂為之不置且時雖多事而以無用得安於閒故日與幽人逸士唱和於山巔水涯以遂其所好雖其工未敢與昔之名家者比然自得之樂雖善辯者未能知其有異否也故累歲以來所著頗多近客東江之渚因閒始出而彙次之自戊戌至丁未得七百三十二篇題之曰岳鳴集自此而後著者則別為之集焉藏之中笥時出而自讀之凡歲月之更遷山川之歷涉親友睽合之期時事變故之蹟十載之間可喜可悲者皆在而可考固不忍棄

而弗錄也若其取義之或乖造辭之未善則有待於大方之教焉岳鳴集自序

吳為古名都其山水人物之勝見於劉白皮陸諸公之所賦者衆矣余為郡人暇日搜奇訪異於荒墟邃谷之中雖行躅殆徧而紀詠之作則多所闕焉及歸自京師屏居松江之清書籍散落賓客不至閉門默坐之餘無以自遣偶得郡志閱之觀其所載山川臺榭園池祠墓之處余向嘗得於煙雲草莽之間為之躊躇而瞻眺者皆歷歷在目因其地想其人求其盛衰廢興之故不能無感焉遂采其著者各賦詩詠之辭語無陋不足傳於此邦然而登高望遠之情懷賢弔古之意與夫撫事覽物之作喜慕哀悼俯仰千載有或足以存勸戒而考得失猶愈於飽食終日而無所用心者也況幸得為聖朝退吏居江湖之上時取一篇與漁父鼓枻長歌以樂上賜之深豈不快哉因不忍棄去卒次成帙名姑蘇雜詠合古今諸體凡一百二十三篇云

洪武四年十二月日前史官高啓序

吳郡高啟季迪著

南州徐庸用理編

古樂府

上之回

聖主重行幸六科法乾旋北巡初避暑東祠已祈季
群官從清塵祭若星麗天前揚豹尾竿左靡魚須旃
瀚海通漢月蕭闕絕胡煙願奉千齡樂皇躬長泰然

君子有所思行

騁望京輔地金城千里餘我我松栢陵靄靄桑柘墟
明堂表青陽飛觀切紫虛况有戚里第高樓夾清渠
愛妾舞羅毅嬖奴鳴珮琚東園賜秘器上林乘副車
玄運有恒旋盛時無久屈勿嗤城南巷寂寞楊雄廬

李夫人歌

延年罷歌少翁望蘭芬淒淒銷復帳臨歿最難忘歎
歎不相嚮陳杯觴列燈火是耶非幄中坐新宮漏殘
星欲墮

古別離

它人豈不別所別諒有由嗟君今何營輕薄好遠遊
遙遙京洛車沉沉江漢舟君身非賈胡所至自輒留

微音已冥邈思懷尚綢繆露滋紅蘭春霜變綠桂秋
此時望歸來含情上高樓川途本無限君去焉得休
願令中斷阻化彼山與丘

燕歌行

清商變節朱火遠嚴霜塗庭卉木腓邊城早寒未授
衣念君遐征不能歸涼風時來動中閣嘯蛸在戶熠
燿飛賤妾宵興歎無依替珥不施減容輝欲寫憂思
撫瑤徽君今不在聽者稀啓明未出燈已微愛而不
見徒歎歎

吳趨行

僕本吳鄉士請歌吳趨行吳中寔豪都勝麗古所名
五湖洶巨澤八門洞高城飛觀被山起游舫沸川橫
土物既繁雄民風亦和平泰伯德讓在言游文學成
長沙啓伯基異夢表休禛舊闕凡幾家奕代產才英
遭時各建事徇義或騰聲財賦甲南州詞華並西京
炫邦信多美粗舉難備稱願君聽此曲此曲匪誇盈

南山有鳥

南山有鳥北山羅兩地一失驚風波哀鳴獨宿心靡
他竟抱幽恨歸山阿不及山上松纏綿同文蘿君歸
來聽妾歌相思感君情意多贈君明珠淚滂沱死生

茫茫終奈何

玉波冷雙蓮

金風暮剪雙頭蓋，啼臉辭秋。鴉血紫宮女，三千罷笑。喧錦雲障，冷鴛鴦死。滿江煙，玉流古香，尋魂吊影愁。茫茫吳天墜，露衰紅濕。一夜波涼，小龍泣。

蓋秀葯華

春香上羅襦，暗引蘭枕渡。蝶散掩紅房，玉孫歸已暮。斜條拂蛾髻，采擷同芳杜。脉脉兩煙濃，江皋斷腸路。

吳鈞行

吳鈞若霜雪，吳人重遊俠。樽前含笑看，上有仇家血。

短歌行

置酒高臺樂極哀，來人生處世能幾何哉。日西月東百齡易終，可嗟仲尼不見周公。鼓絲拊石以永今日，歡以別虧。憂因會釋，燕鳴載鳴，蘭無故榮。子如不樂，白髮其盈，執子之手，以酌我酒。式咏短詠，羨祝長壽。

白馬篇

白馬金鑣鞍流光，皎如練龍沙積雪。裹一去誰當見，昨日羽林兒。獨拜建章殿，天子親賜與。騎向交河戰，疾驅不辭家。恐獲追迢遞，萬里倏若飛。神速虜難變，前收日逐也。右斷康虛援事，定入關來。箠中有餘箭。

宛轉行

宛轉復宛轉，宛轉日幾迴。君腸鹿盧斷，我腸車輪摧。長門怨

班婕妤

情寵一時心，塵生舊屋金。苔滋銷履迹，花速度鑾音。暮雀重門迥，秋螢別殿陰。君明猶不察，妬極是情深。

閨閣篇

天門迎旭開紫霞，八表洞達春無涯。閨道榮迴度鸞車，羽旗揚彩鍾鼓。擿後宮三千人，秀色掩盡世上花。宸遊時過廣成家，瑤觴再壽盛露華。一仁興萬福，加何須羨神仙。辛勤鍊丹砂，小臣微詞欲拜獻。帝德自大非為誇。

塞下曲

日落五原塞，蕭條亭埃空。漢家討狂虜，藉後滿山東。去年出飛狐，今年出雲中。得地不足耕，殺人以為功。登高望衰草，感歎意何窮。

折楊柳歌詞二首

高枝拂翠幃，低枝垂綺綈。春風千萬樹，此樹妾門前。

江頭橫吹悲北客休南去聞道武昌門愁人無別樹

空侯引

濁流赴海東若傾津卒刺船朝不行公手提壺徑欲
渡大聲呼公公不顧飢鯨蛟肆咬吞竟以深淵作
高墳貪生惡死誰不有公獨不然果狂叟二十五絃
彈且歌公今渡河將柰何公今渡河將柰何

將進酒

君不見陳孟公一生愛酒稱豪雄君不見楊子雲三
世執戟徒工文得失如今兩何有勸君相逢且相壽
試看六印盡垂腰何似一危長在手莫惜黃金醉青
春幾人不飲身亦貧酒中有趣世不識但好富貴亡
其真便須吐車茵莫畏丞相嗔挑花滿溪口笑殺醒
遊人絲繩玉缸釀初熟搖蕩春光若波綠前無御史
可盡歡倒著錦袍舞鸚鵡愛妾已去曲池平此時欲
飲馬觥傾地下應無酒釭處何苦寂寞孤平生一杯
一曲我歌君續明月自來不須秉燭五岳既遠三山
亦空欲求神仙在杯酒中

雨雪二首

雨雪暗桑乾深愁沒馬鞍臨關將月認霰積作沙看
不阻胡兒獵聊供漢使殮春風消不得三月成袍寒

雨雪暗龍沙愁陰入漢家悵迷青冢草驚見黑山花
夜積蘊廬重朝隨羽旆斜空思鸚鵡觀柳色變年華

羅敷行

陌上三月時柔桑多綠枝携筐行采葉日暮畏蚕飢
君來駐車馬相逢在桑下謾說同心言不是知音者
君貴多輝光妾賤無紅粧自信田間婦難從天上郎
長安畫樓宇無限如花女使君當早歸莫共羅敷語

當釭曲

光豔動春朝粧成暎洛橋錢多自解數箏葢未能調
花如秦苑好酒比蜀都饒深謝諸年少來沽不待要

遊俠篇

遊俠向何處蕩蕩長安城中暮塵起殺人無主名
所殺豈私仇激烈為不平新削安陵刀先奪衆目明
不畏赤棒吏里閭自橫行灌夫託為交袁盎事以兄
負氣不負勢傾身復傾情笑顧年少輩瓊瓊真可輕

關山月

月出遼海東朔雲捲胡風繞升榆塞遠復照柳城空
影滿雕弧外光沉金柝中思家舉頭望今夜一軍同

鞠歌行

玉蘊彩劔闕鋒牛鐸之音混黃鍾俾神奇作妄庸揚

徹察陋世罕逢物有合執必從如魚得水雲與龍美
吾囚伊尹農二主舉之享萬鍾嗟古人孰繼踪女子
猶為悅已容

古詞

妾刀不斷機郎行當早歸還將機中錦作郎身上衣

王明君

都門塵拂春風面臨別看花淚如霰君王惆悵惜蛾
眉不似前時畫中見白髮呼韓感漢恩寧胡謾號開
支尊擅裘肉食本異俗不如但嫁巫山村黃沙白雲
無城關手冷鷓弦夜彈歇相隨萬里到穹廬只有長
門舊時月妾語還憑歸使傳妾身沒虜不須憐頭君
莫殺毛延壽留畫商岩裏裏賢

烏夜啼

啼鳥驚多棲未久半起踈桐上高柳燈下佳人顰淺
眉機中少婦停織手月入空閨夜欲深教聲猶似聽
君琴

行路難三首

君不見盤中鯉暫失風濤登組几君不見枝上烟繞
出糞壤凌雲霄推移變化詎可測勿謂明日同今朝
出乘高車入大馬半是當年徒步者范叔曾逃客溺

餘衛青亦在人笞下悠悠行路莫相欺為雌為雄未
可知

危莫若編席須險莫若觸鯨牙行路之難復過此前
有瞿塘後褒斜杯酒朝離予及夕加恩仇反覆間楚
漢生一家鈞弋死雲陽嶋夷棄江沙所以賢達人高
飛不下避网置行路難堪歎嗟

雕林玉案刺繡茵宜城酒多光照滿坐蜀北方之上
客詞侑南國之佳人盛時祖流若川水榮貴長存竟
誰是魏帝高臺碧瓦空梁王故苑黃塵起世人傾奪
首未迴可伶不飲冢累累

劉生

結客諸陵下平生好排難鵝瑩白揚刀鷓驚黃拓彈
投理遠邸夜擊筑高樓旦念無可報恩空推車壁歎

怨歌行

妾始充下陳嬌客常自持上官三千妓一一妬娥眉
絃急有斷聲鏡暗無妍姿遂令開時花遽作落後枝
昨夕歌吹歡今夕蛩語悲從來班婕妤不勝趙昭儀

稚子班

稚子班唯朝陽低飛蓬蒿隱文章五步一咏于彼山
梁爭稚決鬪憤氣張好勇守介性之良安能受馴畜

歛翼自摧傷

萬里

素驂駕廣柳蕭蕭出城闈玄廬徽象設猶恐死有神
古原閉愁寬荒草不得春一作泉下客長遠室中親
昔興每待旦今卧焉知晨歛衣已成灰含具仍作塵
家門諒不遠欲歸竟何因平生所愛物娛玩由它人
哀哉此里中同迹壯老均聖賢亦豈免聞道庶可珍

薊門行

行行光祿塞望望單于臺天寒水草盡萬里孤軍未
中國多荒土窮遠何用開

巫山高

巴山西上巫峽深奇峰十二江之陰陽雲高臺不可
尋但見丹楓碧樹抱幽林昔聞瑾姬在其下月為環
缺風為襟空山又獨屋偶感襄王心楚宮閉秋夢仿
佛未同衾神仙會遇當有道豈效世俗成荒淫千秋
遺賦應多恨暮雨蕭蕭後自吟

上留田

有弟兄不見憐上留田行泣念彼先人上留田第寒
衣不蔽身上留田兄富出乘華軒上留田死而棺槨
不全上留田它人為塋古原上留田我行見此孤墳

上留田白楊一何翻翻上留田人生孰無弟昆上留
田爾獨大義不教上留田隣人之歌悲不可門上留
田

董逃行

史侯稱臣董侯立山東義師烽火急老兒夾輦奉西
遷百姓驅隨棄村邑萼圭苑中高作營千里不復聞
鷄鳴舊宮焚燒無片瓦黃金盡出諸陵下長安城頭
日欲晡董逃歌殘歌布手

碧玉詩

碧玉小家女初無珠翠粧感即相顧重朽質自生光

堂上歌行

堂上歌歌南山主人為歡仰客顏翠帷夜卷出兩鬢
移尊更飲花樹間花樹間有明月客不醉歌不歇

隴頭水

人間何處無流水偏到隴頭愁入耳夜雜羌歌明月
中秋驚漢夢空山裏隴坂崎嶇九迴折聲隨到處長
嗚咽欲照愁顏畏水渾前軍曾洗金創血回頭千里
是長安征人淚枯流不乾

少年行二首

官侍長揚拜文郎况憑內寵在椒房賜金十萬身無

用乞作胡姬一日粧

下直平明出禁門笑提博局伴王孫寶刀不敢將輸却明日沙場欲報恩

芳樹

歲馳映華閣窈窕臨清沼風姿巧弄春露氣微含曉垂條拂過騎翳葉留歸鳥忽憶共攀人徘徊行獨遠

放歌行

泰山玉檢書成功芝房正奏井泉宮漢家五葉躡全盛有似白日初富中雉鷄天上啼清曙春滿咸陽萬家樹諸侯客子盡西來只道明時苦難遇褐衣不脫見至尊立談一刻皆承恩賡詩已上栢梁殿獻賦還過金馬門大道易登平若砥始信青雲綠尺咫共喜嚴徐得寵榮未容絳灌生詭毀丹詔仍聞訪草萊皇心務欲攬群材嗟君猶在新豐即日暮空詩歸去未

空城雀

空城雀何局促城頭飛城下宿百匝得一枝千啄逢一粟聚雛隨啾啾所欲各易足不須羨彼珍羽禽翩翩高集珠樹林一朝身陷虞羅裏回首空城不如尔

相逢行

沽酒渭橋邊平陵俠少年相逢各有贈寶劍與金鞍

妾薄命

寂寞復寂寞秋風吹羅幕玉階有微霜桂樹花已落昔為卷衣女承歡在瑤閣棄魚感淚多當熊慙力弱寧知色易老難求黃金藥宮深去天遠憂思將何託君思非不深妾命自輕薄微軀願有報和氣死沙漠

神仙曲

上清真人古仙子保神鍊魄從無始眉上霜毫如髮長幾見金烏日中死東遊不肖居蓬萊滄海頃刻飛黃埃金與玉座儼何處鸞藍天上彌羅臺碧桃落盡花無數一笑虛空卷煙霧烏篆玄文世莫窺茂陵還掩蓬斜露

結客少年場行

結客須結遊俠兒借身報仇心不疑千金買得利匕首摩挲誓許酬相知白馬緩胡纓行人盡止朝遊洛北門暮醉秦東市感君在一言不惜為君死朱家曾脫季將軍田光終酬燕太子君不見魏其盛時客滿門自言一一俱銜恩魏其既罷誰復見養士堂中塵網遍始知結客難徒言意氣傾南山食君之祿有弗報何况區區杯酒間結客不必皆薦紳纒急叩門誰可親屠沽往往有奇士慎勿相輕閭里人

長相思

長相思思何長愁如天絲遠悠揚搖風曳日不可量
不能絆去足唯解結離腸闌山碧雲看欲暮空帟坐
掩荃蘭香長相思思何長

君馬黃

君馬黃我馬玄君馬金匱匣我馬錦連乾兩馬喜遇
皆嘶鳴何異主人相見情長安大道可竝轡莫誇得
意爭先行搖鞭共踏落花去燕姬酒壚在何處

團扇郎

團扇團且潔人言似明月明月豈得如長圓不曾闕

楊白花

楊白花太輕薄不向宮中飛却度江南落美人踏踏
連臂歌山長水闊柰尔何柰尔何春欲晚何不飛去
仍飛返洛陽樹多啼鴉愁殺人楊白花

門有車馬客行

門有車馬客乃是故鄉士昔別各壯顏今見不相似
上堂叙情親拜跪出妻子對案未能食歷歷問桑梓
當時同遊人十有八九死松栢長新墳荆棘生故址
歡言方未終悲感還復始因思興謝端嘆息不能止

估客調

上客荆州商小婦揚州娼金多隨處樂不是不思鄉

擢歌行

溶漾漢潭清牽荷越浪平船輕知體弱管滑見髮傾
落日懸江思浮雲結浦情去從千葉隱歸愛一花迎
吳飲井子夜誰似棹歌聲

鷄鳴歌

北斗城頭北斗低萬家夢破一聲鷄馬蹄踏踏車轆
轆闕下連趨市中逐雄鷄安得噤尔聲利名少息世
上爭漫漫夜長人不驚

華山畿

華山畿牛車止不同生可同死棺開棺開與即去來

長安有狹斜行

長安有狹斜斜斜僅容騎路逢兩俠童迴鞭問君第
君第渭橋西易覓難復迷長子侍溫室次子藉金闈
少子備宿衛光耀與兄齊三子每來逐雜沓擁輪蹄
大婦彈鷄鷄中婦舞前溪小婦勸杯酒能唱白銅鞮
丈人莫遽起庭樹未烏棲

雙桐生空井

雙生碧玉樹並覆黃金井根通文潤深葉帶朝光冷
應有感秋人時來鑑愁影

征婦怨

良人不顧封侯印，帝符速發當番陣。幾夜春閨惡夢多，竟得將軍軍覆信。身沒猶存舊戰衣，東家火伴為收歸。妾生不識邊庭路，尋骨何由到武威。紙幡剪得招魂去，只向當時送行處。

襄陽樂

門前黃柳鴉，雜宿羅幌低。垂婢擎燭懸，瑤結珮略粧。成日莫相邀，漢江曲水靜。花寒月小，明舟中樓上聞歌聲。腸斷年年大堤路，南商行過北商行。

飲酒樂

七絃五絃角，奏一觴。兩觴羽行且樂，眼中人聚莫憂頭上天傾。

鳳臺曲

飛帚織霧秋痕薄，星漢低宮花漠漠。瓊臺夜寒閉羸女，驚管參差隔煙語。理京舊侶招遠遊，人間帳冷鴛鴦。驚愁海影無塵月，如夢仙骨不欺驚。背重衰蘭泣露，空秦苑龍玉聲微彩霞遠。

美女篇

美女婉清揚，白晳纖且長。豔色照上國，不殊古姬姜。巧笑發令姿，芳詞吐柔腸。擢首有何物，黃金作釵梁。

珥懸礫，珂珠障帶霍。納香新服製羅綺，老輝麗青陽。止袂綉蛺蝶，下裙織鴛鴦。嫵嫵步春風，乍見驚欲翔。雖有楚大夫善賦，馬能詳。豈徒騁妍媚，况乃持貞良。家屋闢高門，宛在城中央。過者共傾慕，日晏停上襄。借問誰氏子，無非金與張。蹇脩豈不勤，通詳重珪璋。中懷非所託，鴈幣徒相將。永宵歎遲回，起倚東西廂。君子苟未得，年徂諒何傷。

將軍行

將軍結髮從鞍馬，新領前軍蹕橫野。面謾不數屠狗兒，負勇魯槍射雕者。狼星掃天芒角斜，大旗獵獵吹風沙。黃金傾盡養部曲，匈奴未滅何為家。前日賢王五千騎，直入朝那殺邊吏。天子初聞怒赤然，出師誓奪河南地。五營材官元自多，詔書未須徵七科。已御明堂推畫轂，還開武庫授彤戈。灞陵原頭軍曉發，北出雲中與高闕。單于一夜六騾逃，大漠無人唯漢月。塞下從茲烽火稀，朝臣共賀震皇威。人生寧似功成樂，白日長安鼓吹歸。

長安道

長樂鍾聲動平津，樹色關中即長戟。衛丞相小車來，新城賜將第。更築候神臺，誰念公車客。空懷作賦才。

洛陽陌

九陌看春光紅塵起相接白玉車中即綠珠樓上妾
柳迷臨水影花映當鑪頰日暮過銅駝相逢盡豪俠

悲歌

征途險巖人之馬飢貧少不如富老美遊不如惡歸
浮雲隨風零亂四野仰天悲歌泣數行下

邯鄲郭公歌

郭公舞郭公舞天子無愁亦無苦醉後君臣一笑看
郭官長夜鑿鑿鼓郭公郭公爾莫舞不解平城圖竟
作長安虜高山摧為一抔土

車遙送

鷓鴣啼霜海城白征夫趣裝牛上軛天生兩轂轉長
途那得令君不為客出門已遠第一程耳中鳴鐸漸
無聲房戶寧嗟寂寞守山川唯念苦辛行欲車不行
願車覆還愁損我車中王安得身如芳草多相隨千
里車前綠

楚妃歎

章華堂前楚江水月色墮煙鳥欲起六宮不敢解羅
衣獵火照山君未歸

神絃曲

秋燈畫壁熏煙埃石馬汗流神下來花衫娑娑絃切
切旋風吹幡愁百結雌狐學拜戴弱體鬼箭射創血
洒秋老鴉飛散巫姬泣苦筊嘯雨溪幽幽

白紵詞二首

白紵出自吳女工著來色與素體同舞時偏向江渚
宮長袖拂起微有風觴催管促四座中攬裙徘徊憐
曲終玉堦夜寒零露濃

出後閣臨前楹舞衣皎皎潔且輕飄如白雲向空行
迴腰流目君已傾華燈吐燄欺月明喧譁不聞遠珮
聲榮萸實紅蘭葉紫千秋惟樂長如此妾身得向君
前死

呵那瓊

牛羊草漫野大帳天山下十萬控弦兒聞菰齊上馬

江南意

委本南國姝父母愛如珠貌豈慙明鏡身縲稱短襦
學成采蓮唱曉出橫塘上舟小復身輕隨風兩搖蕩
歸時曲岬傍恰見貴遊即輟歌欲轉棹花淺不堪藏
持嗔却成哂相問那能隱雖伶即意深終嫌妾家近
回首各盈盈南湖月又生煙波三十里都是斷腸情

銅雀妓

鄴宮已罷幸歌舞尚如期誰知看月夜却是望陵時
薊澤銷羅薦松風吹縹帷妾身未得死寧當愛色衰

猛虎行

陰風吹林鳥鵲悲猛虎欲出人先知目光燿燿當路
坐將軍一見孤矢墮幾家插棘高作門未到日沒收
猪豚猛虎難猛猶可喜橫行只在深山裏

湘中絃

涼風嫋嫋月粼粼行色蘭香秋水濱一夜猿聲流淚
盡黃陵祠下泊舟人

獨不見

白日沉大荒北風下天霜羅幃猶苦冷何況戍遼陽
別時秦槐青今復胡草黃紅淚常自滋非因效啼粧
鴛機促夜響龍鏡掩晨光相思獨不見時久愈難忘

豔曲二首

日莫淇水上折花行見歡鴛鴦蘇合彈腰裏鏤衡鞍
當時贈芍藥今日歎靡蕪少年不相顧唯愛執金吾

羽林郎

十五能挽弓入衛蒲萄宮武皇深假借父有沒邊功
禿衿綉羅短馬逸双銜斷絲出聞鷄坊還過射能館
笑擲朱提銀娼樓爛醉春歸時衝市過辟易九衢人

橫行自無避司隸休相忌明日沒稽山為君遮虜騎

燕燕于飛

燕燕何處飛相見江南路着香細雨春柳色芳煙暮
總從箔外歸復向舟前度莫入未央宮身輕有人妬

浮遊花

宛宛庭中花狂風忽吹去無涯上入逍遙之雲天下
沒慘淡之泥沙開落本同何足歎升沉偶異自堪嗟

野田行

白楊樹下誰家墳火燒野草碑無文路傍尚卧雙石
馬行人指是故將軍當時發卒開陸宅千里送莖城

東陌子孫今去野人來高處牧羊低種麥平生意氣
安在哉棘萼暮雨棠梨開百年富貴何足恃雍門之
琴良可哀

邯鄲才人嫁為厮養卒婦

妾能撥趙瑟舊得君王眷更衣直夜房侍酒登春殿
出官非故顏里婦猶相羨龔臺露往夢破屋流螢見
末路多若斯紛紛貴成賤

壯士行

無險非高山無勇非壯士半夜殺風來剗寒燈欲死

秋風引

嗟爾秋風胡爲來哉奏商律兮瑟颯而悲哀叩高柯
而墮葉掃廣路以清埃入班姬之永巷過襄王之高
臺瑤琴自鳴羅帟齊開馬蕭蕭而嘶起鴻噉噉以翔
迴使崩雲駭浪振蕩於白日兮忽欲去而徘徊客有
懷卿失職而對此者恨盈襟而難裁但欲變天地之
搖落不知感節序之摧頽秋風生歸去來

涼州詞二首

蓬婆城下淨無花慘慘黃雲漠漠沙卷葉誰將番曲
奏白頭都護亦思家

關外垂楊早換秋行人落日旆悠悠隴山高處愁西
望只有黃河入海流

虞美人曲

明月帳中泣悲風營外歌彷徨夜驚起何事楚人多
迴燈擁綠髻向劍履青蛾效命自無恨君王其柰何

築城詞

去年築城卒霜壓城下骨今年築城人汗灑城下塵
大家舉杵莫住手城高不用官軍守

永嘉行

帝衣濺血忠臣死五部初興屠各子宣陽門外曉吹
笳持戟誰爲衛官士滿城草綠胡馬嘶內家散作軍

中妻六重相隨渡河去月明歸夢遂成迷萬里中原
非典午至今人說王夷甫

神女宛轉歌二

駐君舟相見盡綢繆已違大姬傾鑿落復令小婢進
瑩篋歌宛轉宛轉意何長願爲灰與火同泛玉爐香
解安珮相貽慰離異愁逐朝霞天際生惟隨秋水江
頭逝歌宛轉宛轉情相續願爲弦與軫共奏瑤琴曲

東門行

出東門暮歸來入室四壁空突中無煙旣生埃弱妻
蓬頭稚子瘦使我心下忽有哀安能學東方生空抱
國士才身長七尺齒編貝索米不得取笑哈鷄鳴東
門早欲開仗劍當遠去不乘駟馬不復迴妻前挽衣
言君可棄妾柰此呱呱孩君莫憂無糧田中已生稗
君莫憂無裳機中布成尚可裁不須苦募富貴富貴
多有害富賤妾與君生同居死即共作山下灰吾欲
行爲徘徊仰視蒼天重咄哉

高太史大全集卷之二

吳郡高啓季迪著

南川徐庸用理編

樂府

秦箏曲

嬌絃細語發研羅臂動玉釧鳴相和閑雲隴月愁思多愁思多聽此曲停蜀琴罷燕苑

從軍行

關中惡少年占募去防邊匈奴入寇塞將軍下自天揚旌三道出列格五營連龍城望兵氣馬已斷人煙星攢烽火舉月偃陣朝圓渴飲跡勒水飢殮屬國種名勇單于憚功多天子憐寧今賞軍騎獨擅勒燕然

大梁行

大梁四面平如砥西去咸陽一千里魏王此地昔為都宮闕中天碧雲起車聲鞦韆夜未休帶甲十萬名奮頭撞鍾列鼎宴上客奉金走幣連諸侯信陵真是賢公子富貴不驕天下士已訪侯嬴到里門復迎朱亥經屠市傾身折節世莫同緩急竟賴斯人功耶鄆秦軍一推破七國震動聞英風古城重過為搔首幾度秋風落楊柳沼上應無鴻鴈來苑中只有狐狸走

立馬塵沙日欲昏悲歌感慨向夷門豪華多少同銷歌獨有高名今尚存

東飛伯勞歌

前飛蜻蛉後飛蝶桃葉楊枝每相接誰家季女弄春妍披煙暎日窓戶前金雀雙釵翠羽扇顯屏繡帳文羅薦嬌羞年幾十五多將呈復隱柔愁何流暉倏沒百花暝空持可憐誰作並

春江花月夜

皓月金波滿奇花玉樹新浮輝與流艷併弄一江春還持誰可比結綺閣中人

踏歌行

香塵和露踏成泥花下風寒鬢脚低夜靜高樓有人聽起頭一句唱教齊

子夜四時歌

白白復朱朱芳條冒綉襦摘來隨女伴賽闌不曾輸紅粧何草草晚出南湖道不忍便回舟荷花似即好堂上織流黃堂前看月光羞見天孫度低頭入洞房空幃擁爐坐夜冷微紅滅即意似殘灰無因得重熱

迎送神曲

薦芳兮奠醑斷水為梁兮葺荷以為宇神不來兮執

與處空山楸兮暮多雨渺吾望兮瀟湘雲冥冥兮水
茫茫有美人兮在堂盍歸來兮故鄉

導赤鯉兮從玄鼉冷風回兮水驚波儼靈旗兮未下
巫撫節兮安歌安歌兮未急條迴輶兮山之側南有
淵兮北有湫神不留兮我心憂頽歲來兮惠我秋

有所思

有所思今安在煙霞迢迢隔南海昔年遺我翡翠裘
篋中久閉銷光彩宛如神仙在瀛洲乘濟欲至風引
舟同心之人乃離阻嗟我處此將何求

吁嗟篇

惻惻抱深隱靡靡踰崇丘凜凜歲欲徂後役車未休
不詳車未休但傷歲莫留窮陰蔽九野徒旅同時憂
豺虎當路啼猿猴出林遊我飢雲作糧我寒又無裘
徒思陽春日誰送羲和輶天時自有常淚下還復收

擊筑吟贈張贊軍

擊筑上君堂君心不可忘哀聲流易水憤氣激咸陽
不向諸侯座寧來刺客場今朝持前奏為我一停觴

苦哉遠征人

悠悠荷戈子謫發事遠征遠征無窮期千里萬里程
瞻斗知鄉遠覽物悵歲更霜露饒飢膚整鎧蟻虱生

况茲三邊膚驕黠未易平聞笳已心摧赴刃仍骨驚
軍與有嚴誅賤命顛自輕區區在行間敢望竹帛名
柰何久不還主將功未成誰憐城南室思婦感鶻聲

愛妾換馬曲

出帷掩紅袂離腕結青絲我取躡雲足君憐羞月姿
惟當樹功業詎必戀恩私回首各已遠春山將暮時

美人磨鏡詞

匣中舊鏡龍蟠背昏盡如同月逢晦尋得街頭負局
翁粉鉛和未拭青銅須臾瑩徹無纖翳試整朝來暗
梳髻光明還在只如新悔向塵埃久相棄明日照像
自畫眉不須問即宜不宜

朝鮮兒歌

朝鮮兒髮綠初剪齊雙眉芳筵夜出對歌舞木綿裘
軟銅鑲垂輕身回旋細喉轉蕩月搖花醉中見夷語
何須問譯人深情知訴離鄉怨曲終拳足拜客前烏
啼井樹蠟燈然共訝玄菟隔雲海兒今到此是何緣
主人為言曾遠使萬里好風三日至鹿走荒宮亂寇
過鷄鳴廢館行人次四月王城麥熟稀兒行道路兩
啼飢黃金擲買傾裝得白飲分塗趁船歸我憶東藩
內臣日納文椒房被褱翟教坊此曲亦應傳特奉宸

遊樂朝夕中國年來亂未鋤頤令貢使入朝無儲皇
尚說屈靈武丞相方謀卜許都金水河邊幾株柳依
舊春風無恙否小臣撫事憶昇平尊前淚瀉多於酒

野老行

乘扈初鳴麥花落大家小家蚕滿箔村中無吏夜捉
人老身醉歸行失脚自從明府一下車短衣羈飯即
有餘姓名免籍弓弩手新婦辟鱸兒讀書縣門前頭
柳飛絮春風又隨官馬去鷄鳴相送拜道邊願公受
取一大錢

秋江曲送顧使君

秋江月滿秋潮大江上行人待潮過別離休說渡江
難半日順風船穩坐楚江茫茫葭葦平使君來時雄
雉鳴子弟從軍隔江去幾家猶住夕陽城水田雖荒
飯常足芡米夜春二十斛誰道繁華不及前戶無征
稅官無獄渡江渡江君莫留江北樂似江南秋

湖州歌送陳太守

草茫茫水汨汨上田蕪下田沒中田有麥牛尾稀種
成未足輸官物庾來桑下搖玉珂聽儂試唱湖州歌
湖州歌情終闕幾家愁苦荒村月

鑿渠謹

鑿渠深一十尋鑿渠廣八十丈鑿渠未苦莫嗟吁黃
河曾開千丈餘君不見賈尚書

荆門壯士歌

水洶洶水差差荆門葉黃抄秋時上有騰攫之猿猱
下有饑嚼之蛟螭悲哉此路難執敢徑渡之三撫髀
壯士起劍風騷勞哭上指仰天長歌不見屋哀鴻父
叫雲冥冥

城虎詞

候潮門開啼早鴉 忽入居人家毋兒畏窺鷄犬
伏排籬突戶誰能遮律風動樹初哮吼驚起東營捉
生手怒拔長戈試一春日光落地張魂走南山藜藿
深冥冥白日橫行誰敢櫻胡為離窟來城市牙爪雖
全不能恃君不見壯士遭急縛失路窮時亦如此

寒夜吟

月下凍痕生綠井隔簾霜片飛無影樹枝風息轉迎
寒愁人如鳥棲未安夜短夜長應獨覺愛愛殘燭鳴
鳴角

戍婦詞

妾在當奉姑即行當報君男女各有後死生從此分

羈旅行

馬頭北風吹地白手冷時驚墮上鞵茶隻猴欲來雙堞
過客程不盡闌山多孤狸縱橫古城壞旗折官亭無
酒賣土風處處殊故園知音只聞僮僕言天涯歲晚
無相識囊金已空歸不得曠技人家自炊黍土屋青
燈鴈啼雨此時暫解羈旅憂憂與家人夜深語人生
出門即苦辛何况長為萬里身遠遊總得功名好不
如貧賤鄉中老

少長干曲

即採菱葉尖萎采荷葉圓石城愁日暮各自撥歸船

春江行

春江南北疑無岬綠草綠波連不斷一女紅粧出浣
紗恰如鏡裏見桃花袂衣猶冷過寒食雲度春陰半
江黑浦口風多潮正深輕舟搖蕩似人心鷓鴣暮啼
歸路遠飛絮茫茫楚王花

寄衣曲二首

即寒甚妾寒持衣向燈泣不是手縫綿多針線溢
賜祀非不暖妾製祿即身寄去龍堆速端愁到已春

廢宅行

鳴珂坊裏將軍第列戟齊收朱戶閉里媪逢人說舊
時有廬被奪廣園池今年沒入官為主散盡堂中義

宅兒厨煙久斷無梁肉群鼠飢來入隣屋官封未與
別人屋日日閑苔雨添綠曲閣深沉接後房盡屏生
色暗無光尋常不敢偷窺處守卒時來拾墜璫春風
多少奇花樹又有豪家移得去

青樓怨

浴金熏爐鏤玉奩蘭香今夜為君添烏樓黃昏鳥起
曙繞見道來還道去

聞角吟

驚起黃榆塞下鴻一聲鳴軋戍樓空此時吹動關山
意十萬征人歸夢中玉帳尋弓夜初起月白不知霜
似水餘聲散作滿天愁風吹不入單于壘

刺促行

刺促復刺促天高白日速黃鸝長苦飢烏鳶飛食肉
促刺復促刺長速多荆棘但見今人行不見古人跡

牧牛詞

尔牛角彎環我牛尾秃速共拈短笛與長鞭南隴東
岡去相逐日斜草遠牛行遲牛勞牛飢唯我知牛上
唱歌牛下坐夜歸還向牛邊卧長年牧牛百不憂但
恐輸租賣我牛

捕魚詞

後網初沉前網起夫婦生來業洵水忽驚網重力難
牽打得長魚滿船喜不教持賣去南津且向江頭祭
水神頭得年神作主無事全家卧煙雨不論城中
魚貴賤換得酒歸僕不怨

養蠶詞

東家西家罷來往晴日深窓風雨響二眠蚤起食葉
多陌頭桑樹空枝柯新婦守箔女執筐頭髮不梳一
月忙三姑祭後今年好滿簇如雲實成早蒼前綠車
急作絲又是夏稅相催時

射鴨詞

射鴨去清江曙射鴨返回塘晚秋菱葉爛煙雨晴鴨
羣未下媒先鳴草翳低遮竹弓鼓水冷田空鴨多瘦
行舟莫來使鴨驚得食忘猜正相聞鶯啞啞毛襟襟
潛機一發那得知

伐木詞

竹檐挑多兩有赤礪斧時尋澗邊石老夫氣力秋漸
衰易斫喜有枯林枝白雲無人暗空谷遠聲丁丁如
啄木暮歸待伴不獨行前途虎多荆棘生長年不
到城府聞此山中路尤阻

打麥詞

雉雞高飛夏風暖行割黃雲隨手斷踈莖短若牛尾
垂去冬無雪不相宜塲頭負歸日色白穗落連枷聲
拍拍呼兒打曬當及晴雨來怕有飛蛾生卧驅鳥爵
非愛惜明年好收從尔食

采茶詞

雷過溪山碧雲暖幽籠半吐鎗旗短銀釵女兒相應
歌筐中摘得誰最多歸來清香猶在手高品先將呈
太守竹爐新焙未得嘗籠盛販與湖南商山家不解
種禾黍衣食年年在春雨

賣花詞

綠盆小樹枝枝好花比人家別開早陌頭擔得春風
行美人出簾聞叫聲移去莫愁花不活賣與還傳種
花訣餘香滿路日暮歸猶有蜂蝶相隨飛買花朱門
幾迴改不如擔上花長在

洞房曲

洞房香吐合昏花月轉勾闌啼乳鴉今宵有酒留君
醉不信娼家勝妾家

待月詞

漏板敲愁夜驚露井桃花濕無影海風吹星銷碧
煙昇妃粧遲鏡未懸素鸞不來桂香死雲外紫篁呼

夢起瓊樓欲開天半紅徘徊望拜娥池東蘭閣未返
燈寒後恰似前宵待即久

惜花歎

惜花不是愛花嬌賴得花開伴寂寥樹樹長懸鈴索
護籠籠頻引鹿盧澆幾回欲折花枝喚心恐花傷復
停手每來花下每題詩不到花前不持酒準擬看花
直盡春春今未盡已愁人繞留片萼依前砌全落千
英過別隣懊惱園中妬花女盡播不禁狂風雨流水
殘香一夜空黃鸝魂斷無言語綫有星星在蘇衣拾
來已覺損光輝只應獨背東窓卧夢裏相隨高下飛

照鏡詞

君家青銅鏡價重比黃金空持照人面不持照人心

田家行

草茫茫水汨汨上田蕪下田浸中田有禾穗不長狼
藉只供鳧鴈糧雨中摘歸半生濕新婦春炊兒夜泣

憶遠曲

楊子津頭風色起卽帆一開三百里江橋水柵多酒
鍾女兒解歌山鷓鴣武昌西上巴陵道聞卽處處經
過好櫻桃熟時卽不歸客中誰爲縫春衣陌頭空問
琵琶卜欲歸不歸在卽足卽心重利輕風波在家日

少行路多妾今能使烏頭白不能使卽休作客

金井怨

照水羞見影及水嫌手冷閑立梧桐陰烏啼秋夜永

送客曲

送客車在門勸客杯在手明日長安花今夜宜城酒
願客飲此勿復辭我無黃金爲客壽人生無處無第
兄鄉里刺促誰知名賣書買得百金劍有身須向關
山行馬四蹄車兩轂行人欲發休踟躕嚶嚶鳴赤
日旭

里巫行

里人有病不飲藥神君一來疫鬼却走迎老巫夜降
神白羊赤鯉縱橫陳男女殷勤奉前拜家貧無肴神
勿怪老巫擊鼓舞且詩紙錢索索陰風多巫言汝壽
當止此神念汝虔除汝死送神上馬巫出門家人登
屋啼招魂

主客行

主人楚歌客楚舞落日黃雲雁聲苦笑拂腰間寶劍
光美人滿堂色如土大兒北海人中奇小兒能讀曹
娥碑相逢且莫歎貧賤但願有酒無別離君不見平
原墓上生秋草國士無窮道傍老

春夜詞

杏煙濕髮秋千下銀蟾光寒曲屏畫數漏間過每睡
時月明微見墮遊絲欲歸自踏娉婷影風動玉釵花
亦冷屋貯嬌愁鎖幔紗青絲嘶騎醉誰家管弦不動
空臺榭夢與烏衣語中夜

新絃曲

舊絃解新絃張水絲牽愁六尺長寬急頻從指邊聽
金鴈參差後不定新絃響高調勿促不如舊絃彈已
熟憐新厭舊妾恨深為君試奏白頭吟他日愁如舊
絃棄泣向羅裙帶頭繫

竹枝歌六首

蜀山消雪蜀江深即未妾去聞歌吟峽中自古多情
地楚王神女在山陰

魚復浦上石疊崇恰似儂心無轉迴船歸莫道上灘
惡自牽百丈取即來

江水出峽過夔州長流直到海東頭即行若有思家
日應教江水復西流

躑躅花紅鴨鵝飛黃牛廟下見即稀大輪攤錢賣盡
去短釵簪葉負薪歸

妾愛看花下渚宮即思沽酒醉臨卭春衣朱織機中

錦只是長絲那得縫

楓林樹樹有後啼若箇聽來不悽淒今夜即舟宿何
處巴東不在定巴西

轉應詞二首

雙燕雙燕去歲今年相見往來東舍西家啣得泥中
落花花落人在暮寒池閣

踈雨踈雨綠蒲靡蕪洲渚江南相憶故人遠水遙山
暮春春暮春暮風急盡船難渡

五雜組二首

五雜組駝背羈往復還渡口船不獲已非少年

五雜組錦綉旗往復還更戍兕不獲已遭亂離

五噫歌 弟梁伯鸞基

顧瞻亭皋兮噫丘墳有蒿兮噫嚮春亦勞兮噫危邦
可逃兮噫先生何兮噫

疊韻吳宮詞

苾苾憐嬋娟醉媚睡翠被精兵驚升城棄避愧墜淚

鷓鴣歌

鷓鴣獨步荒陂水仰望雲間飛不起遠看過鳥下南

汀鼓翼相迎似相喜共為羽族生水鄉暫從飲啄無

猜防草看俄開中潛弩弋師謹咲媒矜舞嗟爾高潔

非九禽胡為狗食移此心受人馴養忘遠舉好陷同類機腸深嗚呼世間幾人跡君子得利相傾亦如此

牛宮詞

豕豢于笠鷄棲于埭嗟爾鳥捷何所止斯歲聿云暮兩霜以風乃築環堵以為尔宮既用爾力宜恤爾寒庇處密固我心孔安

照田蠶詞

東村西村作除文高炬千竿照田赤老人笑祝小兒歌頌得宜蚕又宜麥明星影亂棲鳥驚犬光辟寒春已生夜深然罷歸白屋共說豐年真可卜

琴操

風樹操 予自傷早失恃怙而作

朝風之飄飄兮維樹之搖搖兮吾思親之翹翹兮夕風之烈烈兮維樹之揭揭兮吾思親之憊憊兮樹之有風猶可息兮吾之無親終不可復得兮

之刺操 余思秦伯之德而作

粵我有土岐山之下孰是營之維我考祖今我于邁自岐徂荆豈不懷歸念我弟兄民勿我思我斯安只國已有后先君季子

登丘操 登青丘有懷而作

驅車兮與馬蹇君行兮胡為乎在中野登彼兮崇丘下茫兮兮九州思君子兮不得與駕以遊山有出雲兮木亦有柯我將歸兮憂之如何

望歸操 宋周復子死於虎而作

見旦而出于山之麓兮鬼夕不歸在帟之腹兮我往無所榛蒙籠被谷兮嗟爾耽耽弗食我豕積兮穴亦有子胡寧使我獨兮

辭

望虞山辭

虞山峩峩兮出雲油油胡歛其施兮弗雨九州下有蛟龍兮海波橫流誰使子來兮從伯氏以游朝于濟兮望岐周國有祀兮有何求唐虞逝兮道阻脩漸德與兮干戈日休我思夫人兮心焉孔憂

放鶴辭 登支遁放鶴亭而作

放鶴去當高飛啄莫爭鷄鷺食遊莫近虞羅機雲山海嶠堪來往明月千姝待爾歸

吊伍子胥辭

覽勾吳之故墟兮灌莽鬱其籠獲館娃廢而為沼兮歸伍胥之遺宮奚千祀而勿毀兮繫若人之死忠昔窮逋而渡江兮奮孤跡於羈旅既入郢而靈耻兮又

棲越而攘侮使彼吳之強大兮非夫子而孰爲何夫
差之自喜兮遽忽戒而荒嫉陳昌言之惻歎兮寔不
忍視國之帖危衆以子爲匡信兮肆詭辭之詆欺夫
豈不能全身遠適以自庇兮顧先王之舊德卒待隕
而何言兮恨終不能寤君之璧或載鴟夷兮浮游魂
惇惇兮在中流江神念子兮哀憤鼓洪濤於高秋嗟
君子之出輔兮孰不願爲伊臬使言從而志行兮致
雍熙之陶陶何齟齬而多患兮惟重華之不可以屢
遭鄂侯諍而乾醢兮龍逢諫而見屠蓋自古而有之
兮匪夫子獨罹乎此辜身雖歿而義安兮又舍是將
焉索彼循默而苟容兮寧獲免乎泚頽想子猶念夫
故都兮或乘雲而來歸顧荆棘之多露兮應攪涕而
歎歎余亦何爲而感慨兮懼直道之墜也聊陳詞而
表烈兮亦邦人之志也

三言

梧桐園

桐花香桐葉冷生宮園覆宮井雨滴夜風驚秋鳳不
來君王愁

三四言

王伯敬歌

舟初維琴始薦驛亭邊夜相見詩宛轉情綢繆解環
珮彈莖篋詞易闌情難歇江波寒墮明月綠壺再傾
芳音欲遠譬彼林鳥逢晨各飛羅衣沾霜城鳥忽起
明日相思孤棹千里

吳郡高啓季迪著

南州徐庸用理編

五言古詩

擬古十二首

其一

萋萋墻下李
荒荒陵中麥
浩浩望遠塗
悠悠思行客
客行歲已盈
紆鬱傷我情
始知失群鴻
不若求交鶩
登山知天高
臨流識川阻
不遣懷同心
那知別離苦
別離不可久
寂寞不可守
自傷紅顏子
相思成皓首
朝日如不晚
行人會當返

其二

嵯峨雲間樓
俯視層城陰
綺戶相洞開
清飈拂羅襟
上有離屋婦
哀歌撫弦琴
不知中怨誰
掩仰一何深
初為郢中唱
再奏郢都吟
不惜努力歌
寫作絕代音
風吹落君耳
萬里知愁心
曲盡思寐寡
青天日西沉
安得化彩鳳
飛去巫山岑

其三

出郭見丘墓
纍纍滿山阿
四海能幾人
逝者何其多
封樹日蕭條
狐狸走蓬科
英靈無人弔
牧兒暮來歌

浮華一壺中
倏若飛鳥過
生時不肯飲
死後將如何

其四

離離白雲翔
悠悠清川逝
天地如傳郵
閩人以爲世
良時難再得
游樂咸陽中
咸陽名都會
衣冠集王公
南山對魏闕
嘉樹何龍蔥
九衢十二城
逶迤迥相通
衛霍開上第
車馬爭春風
娛意勿自惜
當至百年終

其五

東井不可飲
威弧孰能張
虛名竟何用
千古同悲傷
與君初結歡
金石比中腸
恩情忽乖分
相望阻川梁
閨門尚難越
况彼道路長
不如雲中鴈
迴飛自隨陽

其六

促織何嘖嘖
空庭寒露白
蘭蕙辭故芳
高梧銷華澤
閨中覽物變
感歎當此夕
引領望遠人
天河西南隔
舟行詎離水
針運恆依石
君雖有棄捐
妾心誓無易

其七

置酒北堂上
歡言宴佳賓
佳賓復爲誰
相過盡朱輪
中庖炙肥牛
登俎悉異珍
左右燕趙姝
羅綺驕上春
清謳雜哀吹
響激迴高旻
主勸客復酬
中抱各以伸
盛年易傾謝
爲樂頌及辰
請看舊同遊
半作泉下人
無爲苦刺促
長憂賤與貧

其八

美人一相見遺我白玉環上有雙雕龍遊戲在雲間
持此感深意佩結無時間王以比貞潔環以明不絕
雲龍永相從誰能使離別

其九

秋至象芳歇芙蓉獨鮮妍朱華照綠水日暮涼風前
采折難遠贈相看自嬋娟孤艷豈足賞後凋良可憐

其十

明星爛東方北斗亦已旋獨宿悲夜徂空床藉蘭荃
鷄鳴整環珮思奉君子遂君子行未歸新粧為誰妍
意踈覺去遙尺尺越與燕含情乏形管何以寫中情
君如鏡上瓶妾若井底泉不垂汲引惠澄瑩徒終年

其十一

人生一漚水所欲乃無涯志意若未畢容華忽然衰
天地有終壞誰能待其期聊為一日歡勿作千載悲
神仙俱好飲得醉復何疑

其十二

黃鳥鳴春陽流芳滿西園攀條日已暮悵恍不能言
禦寒必重裘涉道須變轍離屋非君子何以解憂煩
煩憂日已積佳期日已失思君如蓬萊可望不可即

區區僕見察憔悴年自畢

寓感二十首

其一

天旋海水運日月馳奔輝不知此往來伊誰幹其機
諒由任元氣推還不能遠人生處宇內行止無定依
唯當乘大化逍遙隨所歸

其二

鷄鳴一警旦陽鳥已東升群動紛自起各欲赴其生
飢蟻土中出棲禽林外驚蒼蠅一何微翔燕亦飛鳴
人生信多故安得免管營

其三

盛衰迭乘運天道果誰親自古爭中原白骨遍荆榛
乾坤動殺機流禍及蒸民生聚亦已艱一朝忽胥論
陽和既代序嚴霜變肅晨大運有自然彼蒼非不仁
咄咄堪嘆嗟滄溟亦沙塵

其四

美女生貧家光艷人未識遠聘入楚宮揚蛾欲傾國
朝遊瓊臺上夕侍金輿側奉歡擬千齡秋風失顏色
街恩歸永巷貞意徒寐默高高天上星墮作水碓石
人事盡如斯推移歎何極

其五

龍蘭生路隅，發發有奇香。路隅多行人，采掇成摧傷。深林雖幽獨，秋至露餘芳。托根在得所，君子踏其常。

其六

蚩蚩此群氓，幾人出其儔。誰云抱智慮，乃足資勞憂。晨秣思遠聘，宵披務窮搜。懷古復慨今，百念紛相投。膠擾得喪間，若與方寸仇。安知廣成子，冥卧昆侖丘。無營亦無想，八表獨神遊。

其七

大道本夷直，末路生險巇。盃酒出肺肝，須臾起相疑。田蚡排竇英，趙高誣李斯。傾擠不少假，權寵實箇基。鑿井當得泉，種桑會成絲。禍福皆自致，天道信難欺。出亡無所舍，千載使人悲。

其八

志士徇功業，貪夫詫輕肥。亦有逃群子，矯矯與時違。彼此更共笑，不知誰是非。達人體自然，出處兩忘機。浮雲遊天表，舒卷有餘輝。

其九

攬轡登大行，遙望洛北州。崑崙正西峙，黃河復東流。百城無遺堵，雲煙莽相繆。朝作冠蓋場，莫為狐兔立。

其十

昔人爭此地，干戈迭相讎。當其得意時，連陌擁鳴騶。百年奄忽盡，魂魄空來游。局見朱芝叟，冥栖無所求。桃李初不語，鳳凰豈長喧。未俗矜辯議，窮口禍之源。所以國武子，殺身由盡言。妙哉無為謂，默默道斯存。

其十一

人言異草木，不若松栢壽。欲於百年間，辛苦啻不朽。形質天所昇，名姓吾自取。形名兩未立，誰我竟何有。不能知吾先，奚暇恤我後。遺臭與流芳，冥然付杯酒。

其十二

袿褐乘華輅，孤裘駕文車。西門與北宮，窮達一何殊。彼達矜已智，此窮愧身愚。東郭發至言，兩惑各以祛。厚薄有定命，巧拙果誰歎。歸卧掩蓬室，道存何所吁。

其十三

驚馬放田野，志本在豐草。偶遇執策人，驅上千里道。顧非乘黃姿，豈足辱君早。負重力不任，哀鳴望穹昊。柰何相逢者，猶羨羈絡好。

其十四

頽陽在川上，玄蟬夕鳴悲。嫋嫋風起波，翻翻葉辭枝。曠望天宇內，沉寥此何時。朱火已盈謝，清商屆其期。

覽鏡忽自嗟綠髮生素絲萬物有榮悴造化豈吾私

其十五

躑躅遠遊子驅車上高山高山多隴坂悲哉路何難
其顛摩蒼穹欲上不可攀日暮牛力疲前征未能開
雙輪忽中摧一墮深谷間引領望黃鶴失路何當還

其十六

蜀琴有奇紋本是枯桐枝一彈舞鸞鶴再彈下靈祇
曾持薦皇帝雲中奏咸池棄置久不調流塵被朱絲
終焉含妙響未始有成虧

其十七

達人貴全生外物等秋草顧此七尺軀即為萬金寶
昧者營所嗜棄捐不待老豈無室中寶它人是來保
何如鉅金液長令髮顏好

其十八

千秋取丞相一語悟君衷長孺多謙言白頭擯屋東
人命有通塞主聽無遠從失如魚去波得若雲遇龍
會合感冥相佳期諒難逢下生朱聞道無事涕沾胸

其十九

南山多浮雲北山有高樹因風暫來依風回復飛去
兄弟滿四海幾人此相遇握手交百歡分襟滋千慮

踪跡不可當無為嗟去住

其二十

鴻鵠橫四海鷦鷯感蓬榛長松凌風煙小草亦自春
各稟造化育逍遙通其真無將赫赫者下比樓樓人
詠隱逸十六首

向長

子平謝累辟雅志在隱居家貧或有饋取足及其餘
讀易深自悟謂賤貴不如教言嫁娶異家事無關余
同好有禽生肆意相與娛茫茫五岳去孰得回其車

周黨

世祖初厭武開觀在東都使者遍岩藪旌帛召賢儒
伯况亦暫起縉頭詣尚書引見伏自陳始顧不敢渝
周興有耻食堯禪或羞汙士固有本志聖主焉能拘
范生乃見豎咄爾何其愚

王羈

儒仲有清節始一應徵命造化枕高辭不肯臣萬乘
歸來自耕野蓬蓬掩門遲翩翩故人子相過容服盛
一念兒曹羞客去卧如病賴有賢婦言不失初守正
嘉遜遂終身清輝兩相暎

梁鴻

伯鸞古賢人乃在杵臼間夫婦共守志逃名入深山
妻涼五噫秋東出過帝閭齊魯復荆吳長往遂不還
爲傭豈無勞顧已少外患終葬烈士旁高風邈誰攀

法真

高卿閨西儒好學賤榮祿閉門不交世弟子相誦讀
太守者何人欲以吏見錄誓在南山南胡肯勞案牘
連微終不就繳繳離垢俗郭子有頌詞玄德久愈暴

韓康

伯休始賣藥志將晦當時如何不二名乃爲女子知
玄纁強見聘使至焉得辭凌晨自先發不駕安車馳
亭長遠迎候未識微君誰脩道奪其牛解與不復疑
中途遂長遁踪跡竟莫追乃知超雲驥塵轡何由羈

陳留老父

漢袁黨獄起朝柄在刑餘皇皇外黃令去官返鄉閭
班卓逢故人涕泣語路隅邦危德無援忠良恐遭誅
有叟過其傍值杖爲踟躕騰之歎且言何悲二大夫
鸞鳳不隱羽安能免且且學欲問不肯顧飄然邁長途
賢哉此老翁嗟嗟乃誰歟

龐公

南陽有龍鳳乘時各飛翻鴻鵠獨深棲不肯屈籠樊

瞞瞞隴上耕遠辱刺史軒豈不念子孫遺安乃名言
采藥不復返亭亭空鹿門

王績

無功始亦仕季代遺亂屯投劾乃徑歸不作嬰網鱗
結廬河渚北喜與疇士隣相逢雖多言不若無語貞
種黍養危雁逍遙度秋春乘牛過酒家留連或經旬
嗜飲豈沉湎醉卿可逸身北門與樂署暫屈誠此因
賢哉焦史妻相饋不厭勤酣歌自遺世稽阮其能倫

朱杔椎

祭酒絕俗者曳索獲被裘自匿林莽間不入城都遊
織屨易米若於人又何求偃偃高長史迺見禮甚脩
瞪視雖不言默教意已周欲使如曹叅無事治一州
忽去返山谷避寢安可留

武攸緒

尊后移寶鼎同姓咸折珪獨去謝親寵龍門事宜棲
澹泊如素嘗衣褐復茹藜賜器不肯御床頭委塵泥
族人豈不華回首已粉盞苟榮禍必集達識乃弗迷
蟬蛻衆濁中名與嵩高齊

盧鴻

顯然守泰一高卧在幽壤開元始求治賢指勞夢想

詔書起岩高家意勤挹仰入京遷還山執得廉以軼
天子遂其高營室致安養爵祿不可加貪士應泚頽

秦系

公緒避時亂不駕戎府車南安大松間卜築聊可居
穴石為巨硯坐行老氏書刺史致羊酒歲時造其廬
不拒亦不謝偃息母自如懷道誠可稱工詩乃其餘

陸龜蒙

魯望好任散心與太古期俗夫晨叩門不肯一見之
下田與江通終歲恒苦飢菘刺不告芴常師禹胼胝
酒酣發長歌猶有憤亂悲寧不念枯槁行哉豈期時

漢濱老父

漢濱有老翁初不語鄉里天子雲夢遊盼望臨污水
居人悉縱觀翁獨耕不已即官下道問荅言野人耳
借問世立君豈將使為理奈何從遊俠勞人奉諸已
尚忍令人觀吾實為子耻忽如驚鴻騫孰能躡其軌
名姓且莫知越哉隱君子

張志和

超超玄真子游浪煙水中敝舟以為家來往無定踪

自言處大虛四海長相從奴婢兩夫婦耕織粗可供
天子不得見丹青繪其容漁歌復識聞山水邀其重

吳越紀遊十五首

始發南門晚行道中

歲暮寒亦行征人有常期辭我家鄉樂適彼道路危
酒闌別賓親驅車出郊岐我馬力未痛已越山與陔
回頭望高城落日雲樹滋遭亂既少安謀生復多飢
途逢往來人孰不為此馳遠遊亦吾志去矣何勞悲

渡浙江宿西興民家

掛帆無天風到岍日已夕捨舟理輕裝欲問古鎮驛
風颯灘聲迴莽莽山氣積僕夫夜畏虎告我勿遠適
望林投人家炊黍旋敲石寒眠多虞警我體若畏席
誰云別家遙數日已在客今宵始驚歎東西大江隔

早過蕭山歷白鶴柯亭諸郵

客起何失早村荒絕鷄鳴况時江雨晦不得見啓明
凌兢度高閣山空縣無城隔林聞人呼已有先我行
側身避徑滑聚足防屋傾衣寒復多風淅淅遠水聲
千峰霧中過不識狀與名嵐開見前郵始覺歷數程
越禽啼楓篁冷日傍午晴煙生沙墟窳葉落澗寺清
登臨亦可悅但恨時非平

次錢清謁劉寵廟

亭亭樹間祠落日小江口停舟拜孤像開幔蒼鼠走

憶公治邦時德感山谷叟臨行謝其饋清風在茲久
我方東征急不得奠杯酒惆悵出烟扉殘村夜聞狗
登蓬萊閣望雲門秦望諸山

振思曠然釋置身蒼林杪群山為誰來歷歷散清曉
奇姿脫霧雨奮首爭欲矯氣通海煙長色帶州郭小
曲疑藏啼猿橫恐截蹄鳥流暉互蕩激下有湖壑繞
佳處未過經一覽心頗了秦皇遺跡泯晉士流風香
願採金匱篇振袂翔塵表

開長鎗兵至出越城夜投龍山

列藩過戎龍駐鉞實此州如何殺大將王師自相離
我來亂始定城郭氣尚愁又聞有隣兵倉卒豈敢留
促還出西門天寒絕行轡古戍暗雨雪旌旗暮悠悠
野屋閉不守澤田棄誰收屈人且奔逃游子安得休
遠迤蒼山去決濟玄雲浮人爭夜竹風榛嘯岩幽
我徒戒相親一失未易求飢拾谷口果寒燒澗中樵
神迷路多迂再宿達海陬雖嘗登頓勞幸免迫尋憂
聖尼畏於匡嗟我敢有充但慙去越早不遂名山遊
夜抵江上候船至曉始行

夜辭西陵館霜谷猿叫歇津卒未具舟天險不可越
漁商雜候渡寒立沙上月蒼煙隱遙汀益覺潮漲澗

開枕散驚鳧海色曙初發曉曉前山來稍稍後嶺沒
中流聞鼓角隔岬見城闕客路得奇觀臨風悶俱豁
登鳳凰山尋故宮遺跡

茲山勢將飛宮殿壓其上江潮正東來朝夕似奔響
當時結構意欲敵汴都壯我來百年後紫氣愁不王
烏啼壁門空落葉滿陰障風悲度遺樂樹古羅嚴伏
行人悼降王故老怨奸相蒼天何悠悠未得問興喪
世運今復衰淒涼一回望

宿湯氏江樓夜

舟師夜驚呼隔浦亂燈集潮聲若萬騎怒奪海門入
初來聽猶遠忽過顧無及震摧高山動噴灑明月濕
霜風助翻江蛟龍苦難蟹應知陰陽氣來往此呼吸
登樓覺神壯憑險方迥立何處望靈旗煙中去波急
過奉口戰場

路迴荒山開如出古塞門驚沙四邊起寒日慘欲昏
上有飢禽聲下有枯蓬根白骨橫馬前賈賤寧復論
不知將軍誰此地昔戰奔我欲問路人前行盡空村
登高望廢壘鬼結愁雲屯當時十萬師覆沒能幾存
應有獨老翁來此哭子孫年來未休兵強弱事併吞
功名竟誰成殺人遍乾坤愧無拯亂術佇立空傷魂

泊德清縣前望金鰲玉塵二峰

歸遠行不緩頗失眺山水獨伶茲峰秀欲去舟且橫
層巒迴長溪日落蒼霧起寒城動遠炊晚渡罷孤市
豈唯地景幽况乃民俗美牛羊散樹下晚曉舊墟里
田腴收穫富縣靜爭訟止畏途過樂境我意方一喜
嘯歌逐漁翁暫宿浦煙裏籬疎風偷偷月偃波瀾瀾
林顏在塵中逢人固多耻安得託此君長年息行李

舟次敢山阻風累日登近岬荒岡僧舍

高岸鳴枯桑湖陰北風厲寒濤洶我前幾日不得濟
孤舟恐漂蕩石根暮牢繫憂來厭閑卧近寺聊獨詣
雀飢殘林空人倦危磴細年荒無厓僧樹死石門閉
神傷却欲逐微霰洒征袂窮冬已崢嶸故國尚迢遞
仰看浮雲馳東路阻歸計長歎復何言吾生信多滯

過碭石

碭石頗奇壯長河出連山絕壁兩岬開行舟過其間
高處誰解登陰藤叢難攀步垂雨痕古仰露天光慳
不知真率意隨地設險艱一夫據蜀關二世憑秦關
賴此非要區爭奪得少閑徘徊佇望久日暮飛雲還

謁雙廟

維昔天寶末君王寵奸虜雄邊委強兵遺患同養帝

叛聞遽西幸骨肉棄榛奔河北二十州義士誰禦侮
兩公起誓眾慟哭告玄祖橫身過其衝江淮保安土
孤城無全堞百戰霜月苦力窮援不來嚙齒罵益怒
殘兵日飢疲秋風仆旗鼓男兒不生降一死寇今古
故鄉有遺廟俗祭巫屢舞丹青網塵中爽氣猶可覩
嗟今屬喪亂戎馬正旁午臨危肯捐軀如公未多數
獨立為悲傷斜陽下寒楚

登海昌城樓望海

百川浩皆東元氣流不息混茫自太古於此見容德
積陰漲玄濤萬里失空色鴻鵠去不窮魚龍變莫測
朝登茲樓望動盪豁胸臆始知滄溟大外絡九州城
日出水底宮煙生島中國寬疑漫天爛怒欲吹地是
常時烈風興海若不受職長堤此宵潰頻勞負薪塞
况今艱危際民若在壑溺有地不可屋頽洞風塵黑
安得擊水遊國南附鷗翼

停君白玉巵

停君白玉巵聽我前致辭家本吳門市英風暮要離
少年貧無行鄉里不相推喜過毛公舍懶下董子帷
偶從岬頭侯跨鞍赴邊陲欲邀深入勲終然計無奇
歸來冠側注始學窺書詩稍通鄒魯生盡謝燕趙兒

馬知事益謬空言竟難施布衣走路傍但為衆所嗤
廷中忌賈誼門下誣張儀二子豈不辯未能免諛疑
嗚呼今之人孰解容不羈我將棄浮名垂釣東海湄
長笑調魯運高歌酌安期素心儻有合豈要餘子知

讀史

周衰禮樂廢大道成榛管蕪秦任商君王制欲盡刪
厚賦山澤空亟戰原野殷頽波自放靡千秋去無還
誰云重華駕遠矣難仰攀於馬誦其書如造揖讓班
安得鳳凰鳥飛下浮雲間

雜詩

朝臨高堂上俯仰崇岡下春暉何悠悠清川自東寫
陽和發卉物時澤均播灑如何及芳辰蕭條俱空野
願言釋拘局登高聘吾馬曠途不見人憂心何由寫
興謝固其常吾恃尤誰者

池上鴈

野性不受畜道遙戀江渚冥飛昔未高偶為戈者取
幸來君園中華沼得遊處雖蒙惠養意飽飼貸庖糞
終焉懷慙驚不復少容與耿耿宵光遲城城寒響聚
風露秋籠陰孤宿歎殘羽豈無危與鷺相顧非舊侶
朔漢饒燕雲夢澤多楚雨避鄉萬里外哀鳴每延佇

題綠綺軒

猶懷主恩深未忍輕遠舉儻令寄邊音申報聊自許
幽抱時欲寫帷中有鳴弦一彈落一葉庭樹坐蕭然
寂寂山水夜迢迢河漢天憶聽鳥啼起南軒秋未眠

荅張山人憲

聽君辛苦詞感我艱難情百年自有為安用文章名
鷄鳴海光動車馬塵滿城相逢無新舊言合意自傾
奉觴置君前長歌發哀聲時手苟未得飲此全其生

澄景閣夜宴

王孫喜留宴開閣望明河是夕月微暈涼風池上多
棲禽翻暗菼駭魚動圓波清景厭絲竹雅咏吞高歌
尊酌願勿間良宵易蹉跎預憂別在旦車馬層城阿

贈馬冠軍

一騎東方來相逢新豐市自言讀父書出身良家子
名在飲飛籍蘭纓懸鹿盧曾為魏其客不作平陽奴
欲行渡狼河直擗射鵰將壯志忽蹉跎秋風卧孤障
解裝出我苑歌作變徵聲墟頭落日在歌罷酒再行
相君本禽有豈是沉淪者我亦方薄遊低頭向人下
有志事竟成古人不欺余留得一白羽待射魯連書

送劉明府

賤士寡諧世放屋江海遠朋儔漸乖睽憔悴不自妍
顧影鮮權趣惡離倍當年它人亦以悲况復如子賢
荒途風霜交歲晏增慨然亂雀噪荒棘驚鴻逝長天
斗酒豈足陳薄意聊以宜出處道既殊不得長周旋
誰謂非避方浮雲阻山川何以慰渴飢令名期可傳

暮歸

朝出鷄始啼暮歸鳥欲棲我身本無役胡為亦東西
徒步二十年風埃面空驚入門聞隣杆秋氣涼以凄
美荅墜古沼絡緯鳴中閨有魚了不問歌吟夜燈低
富貴固有日我志焉能迷笑向細君道勿為翁子妻

春日懷十友詩

余司馬克臣

列戟衛嚴閑應無休沐暇群英罷追遊餘香掩空榭
飛花北郭晚華月南園夜清景不能同蹉跎恐平謝

張校理羽

端居養恬素獨詠聖人篇夕景臨池酌春寒掩閣眠
芳藥初翻雨新條稍披煙累日虧幽訪慙余塵務牽

揚署令基

詞苑擅高步早歲許追隨屢枉瑤華句長依瓊樹姿
齋屋積冲抱園賞適秀時暫闕今朝會勞人耿耿思

王隱君行

共此一里屋誰令阻良覲惆悵步芳園山櫻暹獨摘
風含駐花意雨散流池跡尊酒不來同茲晨端可惜

呂道士敏

同謂在塵境獨能依道門圍齋坐永日庭綠露初繁
觀妙風有弊悟靜自無煩晨榮思頻往聆君起世言

宋軍咨克

看花西澗寺憶子昔同行蘭入華觴氣波汎綠琴聲
茲歡隨節逝離恨坐相嬰安得重聯騎射雉出東城

徐記室賁

晨興理櫛罷禽聲悅清旭雨餘嘉樹新色暎春塘綠
閑景感幽襟步陰思往躅携手此道遙須君慰心曲

陳孝廉則

徂春易為感復此棲孤窳鶯啼遠林雨悵望却園隔
客舍換衣晨僧齋聽鍾夕知君思正紛雜英共知積

僧道衍

楞伽曾往問綠澗冒嵐深殘雪寒山暮幽扉閉竹林
欲寄棲禪跡尚遠稍俗心別後空遙念迢迢雙樹陰

王徵士爨

遠客歎留滯對雨卧空房江上歸舟阻蕭蕭春自芳

傲病偶見優勝賞坐成妨斯章亦何取特擬釋離腸

高太史大全集卷之四

吳郡高啓季迪著

南州徐庸用理編

五言古體

感舊謝宋軍咨見寄

我酒且緩傾聽君放歌行君歌意何苦慷慨陳平生
少爲閩鷄兒鮮裘奮春明走馬出飛彈掇挾誇身輕
氣脹諸使徒不倚父與兄落花錦坊南美人理粧迎
綠雲晚不度樓上鳴瑤箏酒酣迸五木脫帽呼輸贏
及壯家已破狂遊耻無成太白犯紫微三辰晦光精
金鏡偶淪照干戈起紛爭中原未失鹿東海方橫鯨
遂尋鬼谷師從之學言兵石室得陰符龍帝隨權衡
業成事燕將速戍三閩營岩谷雨雲霏哀獸常夜鳴
撫劍起流涕軍中未知名奇勳竟難圖迴臨石頭城
石頭何壯哉山盤大江橫黃旗想王氣玉樹聞歌聲
晚登臨滄觀惻愴懷古情覽時識禍機不因憶尊羹
飄然別戎府震澤還東征歸來訪鄉閭亂餘掩蓬荆
舊宅人已改荒池泉尚清瘦妻倚寒機正嘆伊威盈
從茲謝行役閉園事躬耕懶求薦碎書傲然揖公卿
衰蕙弔蟋蟀柔桑喚鷓鴣閉門節屢變壯魄空潛驚

昔同徒步人十年擁麾旌鴻毛獨未順踏磴遠霄程
知音竟為誰四海嗟惛惛齊斧不解奏楚璞何由呈
顧余雖腐儒當年亦崢嶸小將說諸侯捧檠定從盟
大欲千萬乘獻策登蓬瀛洪濶阻川途浮雲蔽天京
終焉困澤畔日暮吟離衡賤貧此時屐復與喪亂并
何殊九月中嚴霜折枯莖頗聞君子心道窮貴益貞
已志未獲施安用軒裳榮今晨喜逢君有壺對前楹
風日初澹沲櫻桃作繁英適意不一醉屑屑徒悲榮
達人若相遇大笑絕冠纓

蕭鍊師鷹窠絕頂丹房

人間不可住混濁同腐腥一落三十年塵夢無由醒
稍聞方士說恍惚通仙靈羨門與偓佺相期餌芝苓
自顧真病鶴秋風墮踈翎碧海不得渡煙霧愁冥冥
師從天姥來身佩谿落經不邀五利寵深棲鍊神形
東觀鷹窠峰中天挿孤青其下吐浴日其高星飛星
昔有學道侶井臼遺岩高愛茲絕俗地遂爾留軒輶
太鼎生紫煙丹成衛天丁金骨坐可蛻騎龍駕風霆
積水浮方壺東望類點渾紫瑩白玉榜中有真人庭
飛遊願從師往讀新宮銘

隨月圖

空齊無短檠愁度新涼夜青天素娥出餘輝獨堪借
連曙願徘徊莫逐秋河下

映雪圖

簷雪不能掃留映寒牖白書字細如蠅坐看還歷歷
華燈照歌帳誰似南隣客

顧榮廟

晉侍中顧孝先祠廢縣令周君復之賦此
軍司兵國秀機神風超胡弱寇遊洛師已蒙南金賞
崎嶇諸王幕沉酒務遵養中罹廣陵艱計服匪誠枉
風雲一揮扇義旅臻同警事成吐言歎飄然理歸鞅
晉社始東遷群賢悉枚契道謁真感會矯翼丹霄上
德聞一代稱跡浪千齡往時屯之良佐矣諛益堪想
墳祠托荒郊蕭然並榛莽童侵雨隧淫巫闖塵幌
大夫過停轅式瞻為含愴衣冠復故貌筮几陳新享
寡劣忝知人因歌表邁仰

秋懷十首

少時志氣壯不識秋氣悲呼儔射鳴鴈深驚東山陂
中年漸多懷惻惻當此時登高望原陸不見車馬馳
思我平生惟高墳鬱鬱豈人非羨門誰能久華滋
惟有盈觴酒可以持自怡

又
明月出遠林流輝鑒牀促促草下虫催我索故衣
起嘆秋夜長欲取鳴琴揮掩抑不成美中心復乖遠
有懷難自宣勿謂知音稀

又
寒荷荷已老采蘭蘭亦摧無由翫芳物暢望江之隈
木落山更空猿聲有餘哀所思去我遠佳期邈悠哉
被垢尚可澣沫濼猶難開我愁亦可念當秋鬱難裁
棄置勿嘆息多愁換顏衰

又
志士憂歲晚羈人感秋早騷鬢愁垂索索枯葉稿
誰言衆芳歇時菊正鮮好日暮食其英聊開我懷抱
貧賤難久居欲去恐違道時命恐未通徜徉以終老

又
秋風夜颭颭秋色日瀟瀟觀人亦心驚况乃君愁者
塊處厭空宇命駕聊適野征鴻莫相呼牛羊亦同下
我君久離群憂襟向誰寫

又
涼風動幽幔高堂夜空虛明燈無與語聊讀古人書
古人亦何人使我不得如棄卷輒還卧終宵自歡戲

又
鳴虫入我戶落葉覆我井何魚四方志戀此一室靜
問途欲晨征畏踐霜露冷濁醪幸方熟又飲燭可炳
勿憂去日多但願來日永不知苦驅馳孰若長醪酌

又
弱齡弄篇翰出門結群賢俯仰幾何時已有好新年
歡晤雖常逢憂患亦屢牽世故馳人老髮髻能久玄
沉思復何為省我既往愆問道行已飲中途曷歸旋

又
朝遊荒岡陲莫行空潭側我非楚大夫何有憔悴色
良辰思遠騁周道廣且直我馬力不前回駕仰偃息
踟躕阻脩竹日久睇西北苟安非予志所懼時未識

又
珥棹望江渙日落青楓林驚波駛且廣蕩漾浮雲陰
靡靡臯蘭表嗷嗷渚鴻吟顧此凜節謝愛來忽傷心
宋子悲已多潘生歎彌深自古有此愁誰云獨吾今
澹室爲吳君賦

素士脫統綺澹然怡道心窮廬車馬絕寒鳥下庭陰
酒外寡真趣琴中多古音閉門三日卧風雪滿城深
空明道人詩

我聞赤城東仙嶠名委明煙霞開深洞絕壁飛玉鼠
空明中有天日月照瓊宇昔人鍊丹成自駕黃鶴舉
陳翁風慕道棲此求真侶玄文夜長披靈藥朝每茹
石室人不來閑眠青蘿雨于今定非死飛遊去何許
海上幾秋風誰傳令感語

九日無酒步至西汀閑眺

高天無游氛秋氣自激肅離君時節變霜降未授服
蕭條野田間晨步聊遠矚悠悠寒川駛靡靡晴巒盡
菊叢有清香木葉無故綠親朋去我遠登高且連躅
孤懷誰知音惆悵臨水曲名酒不可尋歸來掩茅屋

題倪雲林所畫義興山水圖

嘗吸陽羨茗不遊陽羨山銅官結秀色都在畫圖間
樊川醉遊處水榭依沙樹雲入縣城來溪流太湖去
我愛露林生高歌無俗情石庭梅欲發須放酒船行
錢孝子廬墓錢吳越忠孝王之後也

錢孝子廬墓錢吳越忠孝王之後也

颯颯黃竹嶺蕭蕭白楊村行人亦悲哀何況父母恩
不忍返葦屋結廬傍孤墳啼猿應哭聲日暮空山昏
魚隣與誰語獨宿傷精神仰聞松栢吟俛見狐兔奔
淚洒墓前草當春死芳根至性有如斯不愧忠孝門

送獨山人歸吳興蕪簡菁山靜者

南浦無碧草征鴻晨稍飛何當杪秋節臨水送將歸
既來不能淹君心應好遠惻惻袂始判遙遙帆已微
天高桂樹落人在山中稀還尋同袍者更製薜蘿衣
幼文約余與止仲同宿士明鶴駝山房為試
茶之會余既入郭而幼文已歸山中士明亦
往海上止仲復以事不赴士明煙元備留余
夜話因賦是詩以書耿耿

晚憇靈鷲院池上

道人出未歸高士來復去試若失幽期寒齋成獨住
水生洗藥池風動懸瓢樹頼有何威賢玄談到天曙
微雨過祇樹寺齋涼已多臨流一就盥推動蒲池荷
風後扇力輕煙中爐氣和慙非許元度吟卧每來過
贈談鬼谷數督師金松隱

我聞鬼谷子乃是古仙真避世青谿中不污戰國塵
著書十三章當年授儀秦二子不善用竟皆殺其身
督師得異傳相去逾千春不為從衡說談數妙入神

往年客南都達門集朱輪下簾論玄理驚動金陵人
歸來隱虞山繞廬樹松筠誰言目無親內照靈光新
緬思大化根生此下土民起滅千萬途孰能究其因
或愚騁結駟或賢被懸轡命也可奈何天道誰疎親

世事昧守常母使徒紛論

贈惠山醫僧東山

九峰聚錫麓一水回梁溪之子脩事業長年此幽棲
曲彈白雪妙詩吟碧雲低况有醫龍方丹成重刀圭
採藥夜歸院蘿月照澗西扁舟欲相訪愁作武陵迷

鳩雖太史自海上入郭因得追游以叙舊好

今日風雨偶關晤言樓居早寒懷人猶甚想

孤寓僧林同此岑寂也賦是以寄瞻戀之意

良人曠清晤窮年兼離憂修來自海壖諧我心所求

不殊雲中馬和鳴得其倚宴閣既連席什塘復同舟

坐聆金玉篇鄙拙何以酬風雨戒茲旦居然阻從遊

祗因念孤寓微瘳苦未瘳落葉驚早寒誰當慰淹留

朋來不我館願已良有由徒茲睇停雲夕倚城南樓

在遠分難親居近彌使愁信彼詩中言一日如三秋

送徐七山人往蜀山書舍

結客抱狂志傾身通俠交東將觀渤海西欲踰函嶠

奔蹄脫驚轡陸翻連飛繞酒具載車出兵法篝燈鈔

從軍顛奮立學儒耻機嘲字期憂事集頓使芳年拋

塵衣曉城陌雪帽寒江知客堂感蟋蟀婦室悲嬌靖

自嘆失水紺空慚得雲蛟覆君乃瑚璉顧我猶斗筭

高懷矯袞薄雅音變哇咬談詩辨六義讀易窮諸爻

情親豈殊意氣合真同胞因依像輪輻暢和諧墳匱

妓席夜留宴僧扉畫携敲循花縱步扉映柳持鳴鞘

塘行月澗灑林卧風梢梢要渺送謳唱瀾翻雜詠調

七滑炊野飯盤香薦山肴遭時雖齟齬處俗不混淆

曩游既相挈茲離竟誰教浮湖理去榜祖道移中庖

避方未罷戍近日猶被抄鹿驚互奔併席闕仍咆哮

荒墟少砧杵遠壘多笳鏡問往何土里荅云此巖整

人安地有阻歲稔田無燒牛羊可放牧鷄鴨供煇炮

湍長硤磴激石古窪搏切樵斤聽伐木獵火看除茅

雨紅爛秋實露紫舒夏苞溪晴鴈拍拍村曙鷄膠膠

書聲隱篁竹權響穿蒲交聊將耦沮溺誰敢儕夷巢

末事誠瑣瑣大言匪嚶嚶世險路生奔名浮浪吹泡

糧鉏擬共把千戚行俱包社餽飲烹狗鴈祀歌迎猫

快勿厭奔冥長當謝紛曉

會宿城西客樓送王太吏

君來歎不足君去憂何遽共聽楓橋鐘留連恐將曙

蛩鳴故花草鳥起高城樹明日獨登樓歸帆渺何處

題林居圖兼簡蘆公武

竹梧翳蒼石知是幽人居林間鳥鳴後亭空賓散餘

聞有盧鴻愛長年留著書

出郊抵東屯五首

故鄉一區田自我先人造
類此容我懶不畊坐待炊
霜露被寒野屬歛穫時言
來微薄入稅駕宿東陂
今年雖未豐亦足療我飢
萬鍾知難稱保此復何辭

又

芻芻鷄豎場秋稼稍狼藉
踈疎陰門巷景暗煙火夕
田家雖作苦於屯寡憂戚
况當收穫景斗酒復可適
所以沮溺徒躬畊不辭劇

又

我本東臯氓偶來往州城
茲來卧農舍頗愜田野情
如魚反故淵悠然樂其生
臨去謝主媼重來自藜羹
我非催租吏叩門勿相驚

又

朝服久已解儼然山澤臞
欲狎林野人相歡混賢愚
朝來此水濱高歌步踟躕
忽逢一田父舍畊拜路隅
疑我是長官恠我體貌殊
我已忘所有彼我未忘歟
不能使爭席心愧禦寇徒

又

坐久體不適卷書出柴關
臨流偶西望正見秦餘山

野淨寒木疎川長
暝禽還此中忽有得
怡然散襟顏
遂同樵牧歸歌笑
落日間

鳴山書舍圖為黃君伯淵賦

伯鸞鬻舂地井臼有遺跡
之子學幽樓託踪在林石
清風竹林晚片月蘿逕久
遙想一齋空圖書滿床積

詠三良

殉堊古所禁秦國固戎風
穆公臨棄朝要此三臣從
三臣百夫良不與親暱同
一旦使俱斃無人國將空
捐生豈不難忠義感素衷
長恐先朝露無由奉君終
遺命凜在耳焉能惜微躬
但懼享主孤誰當共成功

高墳荆棘間玄雲閣幽宮
吐鳧同此歸冥冥路可通
國人痛莫贖洒淚呼彼穹
傷哉黃鳥詩流哀竟無窮

詠荆軻

劫盟非義舉曹沫已可羞
燕丹一何愚區區祖遺謀
千金養荆卿誓時報強離
奉圍使入關心知絕回轡
賓客盡白衣相送易水頭
酒酣涕難落筑聲和悲謳
猛氣激蒼旻長虹為西流
行行造秦庭陸戰衛甚周
臨機失始魯利鋒竟虛投
豪主一按劍社稷倏已丘
先王禮樂生破齊震諸侯
苟能得此賢伯業猶可修
胡為任輕易自趣亡城憂
徒令後世人歎惋餘千姝

魏使君見示呂忠肅公舊贈詩因賦

公昔隱江夏岩棲避兵華遠挹戴舛驚清風洒泉石
有時歌梁甫慷慨人未識左丞中朝彥仗節任方伯
北還駐嚴程造廬問籌策知非山澤儒期是廊廟客
磯石繁官舫猿叫月初爻秉燭題贈詩蒲圻掩孤驛
欣欣得賢善耿耿憂國戚短章寄深情相投重珪璧
邇來復幾年淪落已陳迹公起佐興運身名正輝赫
待誦肅丹闈專城森畫戟緬懷舊知己永嘆泉壤隔
難縣迤陵劍空聽山陽笛遺篇篋中裁每誦如再覩
真能重交道未易薄俗易一言不忍忘况乃膺寵錫
小大固可知令人義肝激

題秋林高士圖

二仲有玄賞相携在中林避景迨迨步微言諧素襟
天秋谷響哀日暝川光陰風駛多委葉山空少歸禽
威遲臨長岡迢遞指遠岑諒非羈離客詐用愁登臨
春草軒雨中懷王太史
西軒罷琴坐涼思歎白苧城城樹聲繁秋風滿池雨
蓮衰少暗覆禽靜多幽語對此關良倚當懂反傷緒
始遷西齋

乍縣南樓榻始布西齋延西齋非吾廬幽淨亦可伶

風牖竹裏露露庭菊鮮鮮孟史左右陳永日坐一毯
婉奕數童子哦誦當我前為爾竟癖癖低回欲窮年
讀書時何為乃與始志憇進無適時村退乏負郭田
我生非駝爪謀食有道焉苟得隨群趨顧此不稍賢
飲餘解衣卧毋嘲腹便便

次徐山人與倪雲林贈春詩韻

昔遊紫藤塢空山鶴鳴秋相望隱人居興閑竟回舟
邇來獲晤賞玄談劇風流每欲開南軒招我共偃休
天寒鴻鴈鳴菱荷落長洲豈無一釣舡訪子溪水頭
終慚文墨牽只尺成阻脩聽雨掩閣卧觀泉上岩遊
朝覽贈春篇詞藻跨兩優我本丘壑人猿鶴肯見留
擬結歲宴期壺觴展綢繆况聆西澗濱禪宮闕清幽
夜看太湖月遲我同登樓

因病不飲

我昔所無求但愁酒盃空引滿先四座醉蒙壓春風
年來病稍侵積憂復相攻舉觴不能吞若有物梗胃
歲宴風雨多擁爐坐牕中酒徒散去盡歡呼與誰同
三五即頽然慙頽映燈紅後老當柰何即今已如翁
斯味禹所惡攝生笑無功從此便可止賦詩繼陶公

三鳥

三鳥生異林相逢偶同飛各矜好毛羽吟弄朝陽輝
驚風動地至群飛各乖違一翔入雲天一落陷虞機
一止野田間蓬蒿鬱相依啄啄有餘粟歲宴諒不飢
猶懼靈霜侵啁啾獨鳴悲我行見此鳥相對發歎歎
當知皇天仁偏恤爾爾微視陷宜省畏瞻高勿貪希
田間適本性舍此欲何歸

題陳生畫

前村夕陽明後嶺秋嵐積葉落露山村潮來沒江石
遙遙射鴈子慘慘聽猿客何事下征帆西陵渡頭驛

青丘道中

霖雨江暴溢奔流絕津涯茫茫野田白何由見春華
居人久已亡流革滿其家昔我過此土極目桑與麻
故道不可尋舟行但兼葭歲歲凶豈宜客四顧空長嗟

送李用和提舉

鬢君孤直士與岳頗異倚不交金張家而獨與我遊
我居在君里衡門閉深幽十年誦詩書進取拙自謀
名藩多與豪光彩溢道周朝逢將軍車暮避刺史驄
皆云意氣盛官高富春秋良辰競為樂廣席羅珍羞
君獨日暮歸貧乃與我作雪畦寒蔬茁水盞春蛆浮
高堂可燃燭談味相賡酬中間阻清歡離別良有由

我尋江干宅君赴海上州老馬從瘦童人皆識賢侯
今年見歸旌一笑忘積憂那知遠方買復此侍撫柔
鷄鳴城東門不得送去舟颯風常晝驚洪濤極天流
雖能征重貨可失咨嘉猷君子且在傍願言毋久留

贈銅臺李壯士

我祖昔都鄴神武為世雄至今銅臺下子弟習其風
問君家何方紫陌遙相通雖云此相遇情與鄉里同
君有力探虎勇氣聞山東匹馬輕快遊刀環綴纓紅
正當兵塵起思立方寸功不從董健兒欲縛蕭老公
凌厲越宋土逶迤出齊中時人不相顧棄之若秋蓬
我豈白面即少年亦困窮起為壯士歌迅商薄高穹
初飲五斗盡再飲一石空與君豈樂袍西方見妖紅
莫謂看鞭晚艱難殊未終

題春江送別圖送王使君

歌徹小秦王愁深第幾鷓飛花蕩春影江水不勝長
日暮東風急離帆且緩張

蘭室為素首即賦

湘臯春水深澧浦秋風早如何庭戶間芳蕤獨妍好
不有君子心憔悴同芳草

我悲

我愁何從來秋至忽見之欲言竟難名泯然聊自知
汲汲豈畏長棲棲詎嗟卑既非貧士嘆寧是遷客悲
謂在念歸曰故鄉未曾離謂當送別處親愛元無際
初將比萋草夕露不可萎又將比煙霧秋風未祛披
藹然心目間來速去苦遲借問有此愁于今幾何時
昔宅西澗濱尚若山水奇茲還東園中重歎草木衰
聞若誰我顧惟有愁相隨去人多自歡遊宴方未疲
而我獨懷此徘徊自何為

賦得法華雨送惠上人歸江上

慈雲起靈山虛空寶花雨送從天女手零亂飄春暉
香滋淨沼蓮影拂祇園樹高僧結習銷衣上留不住
唯隨一葦風飛渡江南去

秋風

秋風屋外來落葉紛我傍不出門幾日我樹如此黃
但覺成懶性焉知逝類充朝餐止一盂夕卧惟一床
仲尼欲行道轍迹環四方而我何為者不與世相忘

秋雨

秋雨亂我竹堂上中夜驚昏昏起復卧策策止且鳴
未分醉夢狀寧辨竹雨聲初欣自張樂終懼如聞兵
既覺兩皆非古槩取自明悟彼事亦然胡為勞我生

題曹氏春江雲舍

遙波靄微雲禽寒少相語君家在空閣欲往迷洲渚
紛紛樹雜霧稍稍花消雨日暮坐相思江東渺何許
燕客次蔡參軍韻

林且未昇旭岩深稍祛霏風興達仙驛在公違告臍
良儔信可懷彌月曠容微偶茲解華轡沽酒酬芳卮
鈴騶儼衛齋妓樂出房帷放吏命決漏留賓教闔扉
談笑竹下塵賭墅花間棋歡磬展宿好言長錫積思
佳辰子所惜高誼子攸希時難賸賸阻能此嗟為誰
願各保大和長年樂施施飛佩倘可接東方候安期
退思齋為蔡參軍賦

鷄鳴起趨府事至紛善惑慮茲苟弗推在理寧克成
歸來坐深念恒恐有慚德缺政何以裨厚責何以塞
豈徒省厥躬庶用匡爾國昔聞獨樂叟中夜忘寢息
願君守勿渝明明此遺則

送師子林次倪雲林韵

吟策頻入院道人知我開尋幽到深處鳥語竹班班
林下不逢空城中俄見山床敷有餘地鍾動莫催還
尹明府所藏徐熙嘉蔬圖

少賤習園事種蔬每盈疇深根閱玄冬老葉凌素秋

採擷風露餘山庖足嘉羞故園經亂後蔓草日已稠
野水流畦間虫聲暮啾啾披面似見之惻愴起我愁
食肉豈無人斯世誰與謀君多恤民意毋忽歲饑憂

來鳴軒

高鴻本冥飛不墮虞羅裏朝度雲中閣夕遊瀟湘水
驚風吹行斷儔侶忽萬里哀鳴將何依荒澤難獨止
集君華池側梁稻豐自美響度風偷脩影沉波瀰瀰
充庖知不忍善惠念終始願君儀天朝脩翰共騫起

蘿徑

幽溪入蘿蕙幾曲到岩扉夏鳥啼處陰陰花墜稀
知當煙暝後從此荷樵歸

茶軒

摘芳試新泉手滌林下器一榻髮絲傍輕煙散透吹
不用醒吟竟幽人自無睡

讀書

五物毒所嗜雅情竹素間憑按理殘帙樂此終日閑
爰觀自周衰盛治不可還滯辨相誇傾大道成榛菅
巧詐足眩去苟得不顧患羸秦任商君王制欲盡刪
厚賦山澤空亟戰原野殘流風自斯降誅求困孤孱
是非千萬途欲辨亦已艱賴茲聖冊存足啓昏與頑

誰云古哲駕邈矣難仰攀於馬誦其言如造揖讓班
寄語向俗子幸勿叩我閨何暇從爾談方對孔與顏

過立公房

空院閉深竹幽花有孤妍春深鳥語寂風磬時冷然
非茲絕塵地何以寄高禪

與諸公飲綠茗園

金塘環勝野緹騎會芳時雀乳依桐葉魚翻冒艾絲
詩流洛下咏歌豔郢中詞一念交歡厚觴至詎能辭

孤鶴篇

涼風吹廣澤日暮多浮埃中有失侶鶴孤鳴迥且哀
脩翮既摧殘一飛四徘徊矯首望靈嶠雲露何遼哉
渚田有遺粟欲下群鴻猜豈不懷苦飢懼彼羅網災
翩翩浮丘伯朝從東海來相呼與之歸謂是仙驥材
蔭之長林下濯之清澗隈圓吭發高唳華月中宵開
誓從臨玄景永戲崑丘臺

雜詩

結髮好遠遊出門覓山川誰云帝閨遠有路不在天
我車大且遲日暮牛領穿忽逢悲歌士論心淨潯然
今日不得志明日非少年

白水冒我田

白水冒我田風雨無休時午鳩屋上鳴貧家起何
溝壑知不免順受胡可辭有酒我自斟有粟妻自炊
且盡今日歡勿顧明日非商歌出金石愧無聖人師

送韓司馬

淮陰時家子讀書負奇氣十年倭一箠身從李都尉
此行把旌麾無愧國士知邊風吹白草正是馬驕時
鳴笳引前部落日城西路上客贈吳鉤征人唱都護
近倭非臨洮君竹莫辭勞欲問封侯日秋來太白高

醉贈王卿

持身魚可許閭里任浮沉不奉諸侯檄曾辭公子金
斗酒豈辭醉感君知我深誰無且暮急相周惟李心
送賈二文學

窮年自多感况復送良儔落日河上別慷慨發秦謳
風塵阻關山檢劍不得遊願逐高飛翼相與出九州
嗟彼行路子棲棲何所求

送海昌守李使君迂海虞

兩為海上州州民定何如彼遮使君馬此迎使君車
但令人買牛不足容饋魚我知使君賢讀律又讀書

端居懷兩王孝廉

寡劣時所棄獨卧無與親蕭然閉齋閣左右簡史陳

風雨摧衆芳令人怨徂春豈無尊中酒坐念兩故人
日從賢豪遊雜選車馬塵馬知離居客積挹難自伸

送邑上人東歸

浮雲與飛鳥相聚安可常偶來雲岩寺幾日共徜徉
我去師亦歸澗房欲荒涼池卧孤塔影庭棲雙桂香
重過應未期悵然山水長

大水

吾鄉水為國自惜稱漏天今年尤苦霖冒此上下田
老農愁相告無有二十年東江入門流比屋如敗船
夜卧床屢移晨炊釜常懸涼風吹蒲稗群鷺鳴我前
茫茫失川途出行竟回運斯民欲昏墊天意豈不憐
陰陽致乖沴孰能究其然歲飢尚勿憂龜勉當食鮮

送黃主簿之歸安

我歌柳惲詩送子南汀發山城逢社雨綠樹啼鶯歌
留連孤艇遲怡悵雙壺場高士尚為簿休漸府中謁
無事坐閑廳彈琴看明月

送王推官赴譙陽

久治亂所伏國家失其防初如決洪流拱手徧四方
頻年勞訐謔欲補千百瘡于為京師客忌憤何慨慷
濯冠捧書函平明獻朝堂上言固大業下言振頽綱

且為有萬死聖明察臣狂臣言倘獲施立能致時康
宸居豈遠遠只尺天中央鷄鳴列仙伏九門洞開張
謂宜即召見拜起隨班行上殿笏畫地論奏盡敷詳
如何竟報聞不得瞻清光一官非所願欲令赴蠻荒
徘徊出都門風雨溫曉裝行行過吳洲木葉秋始黃
逢子解鞍飲激烈推酒杯平生憂時心辛苦不自忘
頗聞到官所此去路尚長紅日出霧遲孤城海茫茫
遺民侶猿鹿山谷多驚藏繁英艷踟躕璫寶推檣柳
瘴癘况時作技老恐子傷何不且少留共驚蒙華鄉
子笑不我顧翩然決南翔明朝指鯨波高帆若雲揚
去失各異國有意徒相望

高太史大全集卷之五

吳郡高啓季迪著

南州徐庸用理編

五言古詩

吳王郊塋

周網昔隳頓禮樂由諸侯吳子之代德居然祀園丘
燔燎升紫壇青絃映玄裘靈明豈來歆幣王空旒羞
國南見遺墟蕭條委山淑雲和罷九奏草樹鳴颺颺
從來跋扈徒幾人效其尤魯郊夫禮始聖筆書春秋

長洲苑

中國久無伯闔閭思騁功講蒐開別苑訓武出離宮
宰詔應叅來巫臣定御戎蠶鳴深谷鷹且掩廣場空
遠曳捎雲旆高彎射月弓三驅儀已畢七伐步還同
甲騎從輿後蛾眉侍幄中煮胎須紫豹膺掌得玄熊
樂事方難極英圖忽易窮城迷歌黍客地屬采菴童
輦道崩秋雨旗門失晚風犬亡純肆狡人去雉爭雄
草樹迎蕭索湖山罷鬱葱猶疑見獵火寒燒夜深紅

角里村

高皇本壯士提劍定四方晚為兒女情悲歌起彷徨
愛子欲建儲寵姬方侍側顧驚四老人謂已成羽翼

大臣豈不諫孰能幹天機彼翁何為者足見人心歸
始潛避秦君終出安漢嗣在羅馬能羈舒卷聊自肆
我乘用里村如入商顏山紫芝日已老黃鵠何時還
斯人神仙徒千載形不滅猶想蒼岩中白頭卧松雪

死亭灣

貧賤衆所棄豈惟愚婦人珪組何重輕能令變交親
翁子昔未逢妻去耻負薪五十非晚貴不能待終晨
一旦謁帝閣還家繡衣新却更驚赤紵邦人候朱輪
無顏見故夫自殺此水濱誰知孟德權元在爾東隣

毛公壇

欲觀漢壇符東上縹緲峰葛花墜寒露夕飲清心胃
月出太湖水鶴鳴空瀾松真境久寂察蒼苔闕靈蹤
管聞綠毛叟變化猶神龍世人豈得見偶許樵夫逢
攀陰力易疲探玄志難從歸出白雲外空聞仙觀鍾

稚兒塔

黃土但埋骨豈能埋性靈昔聞宿草間曾吐蓮花青
身卧長夜臺口誦西方經尋跡殊宵宵聞聲每冷冷
寒燈照空塔時有山僧聽應使隣家魂沉迷盡皆醒

三賢堂

吾邦古名藩出守皆時賢有唐三使君風流最能傳

常公既前蹈劉白乃後連政成屬時康民瘵各已痊
良辰極游會消挫若神仙畫戟衛高館彩舟漾平川
晨移間齋檜夕賞華池蓮逸韻逸群流豈行文墨牽
至今郡中人猶想布治年時事屢變易遺詞委榛煙
湖山少清氣草木空餘妍嗟我生苦遲無由列賓筵
殷勤展風慕載詠西樓篇

干將墓

干將善鑄劍劍成終殺身吳伯亦遂亡神物豈不神
始知服諸侯威武不及仁徒勞冶金鐵精光動星辰
莫邪應同埋荒草千古春青蛇冢間出猶欲恐耕人

吳桓王墓

朝出南郭門高墳鬱蒼蒼借問葬者誰乃是長沙王
黃腸豈不銅盜發取所藏金環出世間封樹無暉光
緬想衰炎際當塗逞奸強英雄失所據虎視誰敢當
王初奮穉孤英風凜飛霜談笑定江東賢豪歎未翔
少假須臾年足見伯道昌胡為困仇奴輕獵不自防
天意豈佑魏遽使斯人亡因觀感往事喟焉令人傷

虎丘次清遠道士詩韵

神仙不可羈乘桴躡雲漢豈特避羸劉荒山事窮窳
何年東觀海一至此峯窈悠悠清詩傳宵宵遺跡漫

我來繼盤臨長嘯憤初岸既秋煙蘿踈欲雨風竹亂
夜深空潭黑月吐石壁半龍驚及僧來鳥喜遊客散
閣掩林下夕鍾鳴岩中且勝賞誰能窮今古付篇翰
飛騰子何之汨沒余可歎安得契真期超然豁靈贊

天平山

入山旭光迎出山月明送千里松杉風吹醒塵上夢
茲山兀幾到題字遍岩洞陽崖樹冬榮陰谷泉下凍
怪石立誰扶靈草生豈種白雲翁然來諸峰欲浮動
高鶻有危棲幽禽無俗哢凌蘇知履滑披嵐覺裘重
嘗登最上顛遠見湖影空漁樵度溪孤鳥雀歸村衆
還尋老僧居隔竹聽清誦謝我躋攀勞為設茶荀供
幾年歷憂歡造物若柳弄迷途遠山林遲暮堪自訟
難追謝公遊空發阮生慟身今解組綬明時愧無用
閣持九節筇尋訪事狂縱石屋秋可眠山猿許分共
讀書所為錫山朱隱君子敬賦

讀書所為錫山朱隱君子敬賦

高士寡所嗜雅情竹素間北牕夏陰敷散帙欣燕閑
流觀古始來治忽儼未刑重華去已遠鳴鳳何時還
微言雖能尋往躅那可攀當感既拊懷遇得亦解顏
詠歌南風前至樂孰與班方爾對聖賢俗子毋扣關
丁山人清越軒

夏雨濯高綠氤氳冒茲軒微涼洒林表沉色泛溪源
羨子耽獨賞慙予嬰衆喧披襟一蕭散憶在郭西園

西齋池上芙蓉

池荷已衰颯孤艷仍獨在滄洲遠夢遠風露妍姿改
窈窕徒自媚寐寔還誰待此地托根偏非無美人採

贈張主簿

離離平阜禾纂纂橫林棗客行愛樂土秋晚華亭道
停燭春紡遲鳴榜潭魚早借問何能然年來縣官好

客有不樂者

客有不樂者默坐空堂幽明燈照孤影對酒不能酬
風雨忽夜至單衣颯驚秋葉墮已憾憾虫鳴尚悠悠
於當屬有念苦願君聲收讀書仰千古命駕志九州
孰云吾多智有己不解謀寔飛既難攀苟得亦可羞
守道固寐寔寔諒誰尤

送張文學之雋李

回川帶綠樹窈窕有鳴禽江郭去非遠傷離空滿襟
林中古殿靜池上高齋陰應想彈琴士杏花春雨深

贈群上人

湖雨洗秋碧西南見諸峰中有楞伽僧迥閣起去踪
高風搖飛泉落日帶遠松欲往已知處煙蘿鳴飯鍾

送李別駕赴越

常別豈不感此別尤可嗟一別一去遠魂斷秋無涯
我何恨別君君猶別其家霜露滿故園不待菊有花
越禽啼楓林路盡秋日斜到郡且足樂聞有山水嘉

龍門

龍門何崢嶸此地表奇蹟山分兩崖青天豁一罅白
知非禹功鑿想是鬼手劈長為風雨閔開闢自朝久
深合未吐雲對峙不崩石日光寒易傾苔色陰更積
只疑過此內便與人境隔始窺已幽深漸入尤險窄
暗中把危藤蜿蜒欲驚魄僧留者古刻敲火照絕壁
晚聞松竹號洶若波浪激不知神魚飛到此誰點額
我嘗謁真龍天門謬通籍何必更區區求為李膺客

太湖

長溪如白虹分走荆雲派具區納群流襟帶三郡界
太虛混鴻濛元氣流沆瀣初疑溟渤寬稍覺雲夢隘
茫茫鴈飛逐颼颼帆度快雨來鼉報鳴風起鷗驚邁
神龍作淵都豈復數鱗介珠光照水府不受白日晒
朝看砲車雲雲浪動澎湃聲吹地將浮勢擊山欲壞
黃頭雖輕生揆拖不敢懈有時湛明鏡峰吐青幾塊
煙中樹若莎波上舟如芥漁就沙岸炊客來水祠拜

震澤思禹功夫掛記吳敗白魚逢夏出黃棋侍秋賣
找性好游觀夙負雲水債欲尋鷓夷舸不顧涉險戒
人生亦何為世故自拘械萬事風飄花百年露垂巖
何當叩林屋秉炬訪僊怪試探不死方為人起痾瘵

天池

靈峰可度難昔聞枕中書天池在其巔每出青芙蓉
湛如玉女盆雲影含夕虛人靜時飲鹿水寒不生魚
我來屬始吞石壁煙霞舒澹澹月出後冷冷靈銷餘
再訊知神清一酌欣慮除何當逐流花遂造僊人居

剡池

干將欲飛出岩石裂倉礪中間得深泉探測費脩綆
一穴海通源雙崖樹交影山中多居僧終歲不飲井
殺氣凜猶在棲禽夜頻警月來照潭空雲起噓壁冷
蒼龍已何去遠我清絕境聽轉輓轆聲時來試幽茗

練瀆

吳越水為國行師利舟戰夫差開此河餘艘試親練
十萬凌潮兒材比飲飛健鼓棹激風濤揚舲逐雷電
當時意氣盛謂已無勾踐鷗避去沙洲龍愁閉淵殿
恃強非伯岳倏忽市朝變臺上失嬌笑泉間掩慚面
至今西山月恨浸秋一片猶有網魚人時時得沉箭

明月灣

木葉秋乍脫霜鴻夜猶飛扁舟弄明月遠度青山磯
明月處處有此處月偏好天闌星漢低波寒菱荷老
舟去月始出舟迴月將沉莫照種種髮但照耿耿心
把酒酌水僊容我宿湖裏醉後失清輝西岩曉猿起
越來溪

採蓮涇

溪上山不改溪邊臺已傾越兵來處路流水尚哀聲
昨日荷花生今朝菱葉死亡國不知誰空令怨溪水
青房戢多子採得儂心喜今夜水風涼君王宿船裏
行處綠雲迷歌聲一道齊回頭調越女何似若耶溪

顧辟疆園

江左風流遠園中池館平賓客久寂寞孤兔自縱橫
秋草猶故綠春花非昔禁市朝亦屢改高臺能不傾

松江亭

泊舟登危亭江風墮輕幘空明入遠眺天水如不隔
日落震澤浦潮來松陵驛綿綿洲渚平莽莽葭菼積
凭欄不敢唾下有龍窟宅帆歸雲外秋鳥下烟中夕
欲炊菰米飯待月出海白喚起弄珠君聞吟第三笛

南峰寺

樵歸象山昏天峯尚餘景欲按石門宿更度西南嶺

遠聞雲間鐘蘿逕入寺永懸燈照靜室一禮支公影

鳥鳴澗壑空泉響窓戶冷對此問山僧何如沃州境

楞伽寺

夕陽西下嶂返照東湖水來尋古寺游楓葉秋幾里

叩門山頂驚維馬林鳥起鐘聲出煙去半落漁舟裏

楞伽義未曉塵累方自耻欲打塔銘碑從僧乞山紙

慧聚寺

鳴鍾警迷方枯僧兀跌床石姿生寒稜松子落古香

殿鎖山雨氣樓迎海暎光遙望蒼蒼城愁是車馬場

寒泉

遠絡荒峰間平流盤石上月照欲成潭風吹不生浪

聲蕪寒葉下色映秋苔漲野客照羸顏曾來倚筇杖

乘鯉橋

橋上西遊人橋下東流水遊人如水流朝暮何時已

誰知有飛仙赤脚踏神鯉波驚風蕭蕭渡海秋萬里

左招騎龍君右携乘鸞子咲餐紫雲英同詠珠宮裏

歸來舊城郭千載一日雨下看橋上人還隨鷄鳴起

去者已如灰來者猶似蠟不辭養谷神紛紛自生死

支遁菴

閒登待月嶺遠扣樓雲閣石室閉千載高僧猶未還
殘鐘黃葉下古座青苔間不見跏趺影鶴鳴空此山

聞鳴篇

春波漾群鳥戲闔每堪翫宛轉迴翠吮灘縱振文翰
聲兼江雨喧影逐浦雲亂唳唳隊初交紛披勢將散
持敵忽同沉呼儔更相喚時陳水檻側或聚湖亭畔
長鳴若賈勇遠奮如追窺荷葉觸俱翻菱絲胃齊斷
魚駭沒中流鷗驚起前所心踰隴雉驕氣壓塲鷄悍
海客朝自驅溪蛙晚猶看稍欲礙行舟渾忘避流彈
苦爭應爲食幸勝非因筭傲鳥昧全軀臨川獨成嘆

言公井

寥寥武城宰遺井虞山陰千載汲未竭九仞功應深
執圓自可灌道源誰復尋絃歌聽已歇甃綆看還沉
無爲滌弗食惻惻起嘆音一瓢樂未改庶幾回也心

吊幽獨君

君本何代人姓名復爲誰何年棄人間長眠此山陞
荆榛鬱蒙籠孤墳上無碑游魂久未化哽咽還能詩
人歿乃歸城憂樂豈復知君何獨煩冤猶有親愛思
一死哀所同已矣焉足悲陳辭爲相吊此理君當推

靈岩寺響標卽

君王厭蒸竹鳴篔簹時清耳獨步六宮春香塵不會起
那知未旋踵麋鹿遊遺址響況明月中跡泯荒苔裏
此夕意誰過空廊有僧履

陪臨川公遊天池三十韻

群山瞰笠澤勝覽無曠奧曩遊務窮蒐甲乙誌曾到
茲峰最靈奇獨失有遺慎我公仙署君休沐偶得告
林壑軫遠情招携迹同造出郭經鞍輿入谷屏牙轟
時當寒冬晨嵐霧恣披肩幽幽霜泉微卷卷風葉燥
尋溪見人煙問嶺知佛躡意行恐迷互遠托樵子導
居僧作蠻音揖杖喜迎勞客未豈先知定有山鬼報
始至已愜心塵念爲除掃壁穹冠玄雲池古貯清潦
長松挂其顛美竹蔭其隩浮暉蕩空明萬影鏡中倒
磷砉江頭石突起類爭暴緬懷融結初天巧亦多耗
探深識後返升險戒前慄遠梅苦相邀飛雪糝衣帽
谷獲晚應飢澗鳥寒不噪欲歸更留憩禪榻近茶窻
詩歌籠桂篇琴奏倚蘭操我起前壽公樂哉此高蹈
及春幸重來芹藻應可毛何須效公羊登岵發嗟悼
查事舟陸行有力孰比春富貴不可做蓋亦從所好
斯理苟未宜山水解相做微言倘或然勿爲俗士道

夜飲余左司宅得細字

春會非有期春愁本無際馬知君子堂此夕相與詣
燈鎖月窺欄角警霜委砌舞影伶鷓長吟聲笑蠅細
隣鷄易催旦共歡休復寐喪亂得幽歡疇云匪良計

劉凝之騎牛齒

夫子初亦仕絃歌穎之湄園廬忽在念解綬言歸期
方春養孤犢既耕亦以騎春風草茫茫出遊徧山陂
田家有美酒輒醉不復疑當昔天聖間實踈休明時
豈無理人術終思塵鞅廢嗟今屬喪亂懷策競欲施
清芬遠莫挹載誦廬山詩

贈兕醫吳氏昆季

洗菊夜潭月斫荈秋塢雲偶因念殤者來此市人群
問術或禽戲觀書皆鳥文誰知仙籍裏元有两吳君
京口張氏世壽堂

天與下民壽各有百歲期行年不能滿人自傷折之
鷄鳴晨閑開衆車起交馳茫茫欲海中神位那能知
醜鮮薦長壽妖妍貯深帷白日未及終紅英忽先萎
春風北印原青草塚纒纒借問其下人得老還與誰
翁家鶴溪陽先朝業書詩一門四葉來俱聞享期頤
世壽何獨能世德在不虧翁今眉生毫益以道自怡
浮雲等飛煙昏且從變移不燕華池棗寧食古栢脂

澄觀息內想心閑自難衰一床坐松陰風巾又披披
垂魚立侍側亦有白髮兒嗟我生甚晚况復值亂離
故老不復親猶及翁在茲願言拜堂下聽說承平時

剡原九曲

其一

欲知溪流長百轉來越嶠舟行安能極嵐路入斜照
清景不足娛昔人豈辭詔石硯久難磨空林閑遺廟

其二

殿中初未仕高節振衰謝讀書在茲丘蕭然竹間舍
王來有深言留宿山水夜誰云南陽翁獨枉將軍駕

其三

山折水暫旋山開水仍往東陂雁初成秋色彌然廣
碧蘿老茸茸月映石壁上何時試沿泗一理煙中舫

其四

密篠覆碕岸石穴黝而深居人負薪歸駐聽風水音
回看蓮花峰靄靄生夕陰不有僧鍾來高路誰能尋

其五

石洞篝火入石室敷床居白雲開層巖上有丹霞書
神仙不遠人但使粗穢除何必瀛洲外茫茫問馳車

其六

危梁凌清瀨遠迤入前渚大鳴樹蒙籠煙景暗墟聚
雨中耕叟歌月下歸人語欲尋仙射踪婁涼一茅宇
其七

清暉汎悠悠東與班溪合菱葉間荷花風來秋颯颯
久行愁寂寞忽有人煙襟我欲發棹謳漁即肯相答
其八

俗駕不可到有地嶼中小迴迴別澗通窈窕連崗繞
人家林谷暗不見旭光曉東作起炊藜惟應候啼鳥
其九

入江水稍快霜降未可涉頗聞往來人出門即舟楫
前飛鷺鷥遠不飲番孫使何處問與公風吹赤棠葉
詠殘燈

凝寒結重暈逼曙零孤朶膏空逐漏水焰在同爐火
戀影未成眠更就餘光坐
驅瘴

我生東海壖氣濕素善交方景忽遘疔未旬愧消羸
俄頃水火爭寒水繼炎曠楚縵甫謝挾齊純遽尋持
戰如恐墜陷况若當遭炊向夕勢漸消臨風與清池
既去謂遂息明午復如期俯仰天地寬無地竄眇軀
思我到貧病由是生萋噎豈伊水帝子遺威肆相欺

會當濯滯昏靈藥雜進施里閭習巫風磔鼠勸襍驅
韓子蓋有託惟能辨其詩

春日言懷二首

朝臨高臺上俯視崇岡下春暉何悠悠清川自東瀉
陽和發卉物時澤均播洒如何及芳辰蕭條但空野
願言釋拘局登車騁吾馬曠途不見人憂心何由寫
興謝固其常吾將尤誰者

芳樹何靡靡鳴禽亦啾啾時物豈不好人事誠多乖
憂未卧閑房語笑孰與偕天道諒不昧薄願終能諧
惟當守貞靜有酒陶中懷

題晚節堂

人生百年壽六十未為晚胡為鑿玄扃結亭此山陔
周圍松櫟高可翫不可挽日暮春雨晴黃鳥啼睨睨
東家鶴髮翁方置萬金產貽誅非不佳竟為識者莞
君能超物理生死若往返一笑步松陰青山在吾眼
與客携樂遊寶積山遂泛石湖

雲山擁春郭煙花漲晴川看花入山中諸峰恣攀緣
客吹玉管笙合以金柱絃清陰度碧嶂松風助冷然
宛若鸞鳳吟要眇入紫煙行人盡矯首嚮過雲中仙
下山興未闌相携更登船虹收嶺外雨鳥沒湖中天

嵐翠破文陽樓閣影倒懸酒傾綠脂膩繪斫瓊絲鮮
獨恨無紅粧清波寫嬋娟散風吹帆綏欲使歸途延
衆賓起歡呼船返水漫舳回櫓掠寺過楊柳山門前
此地有離宮美人艷當年羅裙罷春舞草色餘芊綿
况我昔此遊冠蓋十里連重来復誰在新知滿中筵
人事既若斯今古俱可憐能遊即稱達何須問愚賢
我欲叫馮夷捧月出海邊醉後不歸去相煎船中眠

謝陳卿意冠

佳木產異域質理密且堅斲為野夫冠我然着我顛
故人遠貽贈皎若瓊現鮮覽鏡見雅宜鄙笑忽成妍
持報乏金玉殷勤在斯篇

獨步登西丘

幽卧意不通出門聊獨行惻惻田野中斜徑多不平
逶迤登遠丘迢迢望高城風交二麥動煙迥孤花明
偶逢植杖翁疑是古耦耕欲問恐相詰歸來帳中情

茅氏高節樓

海上有高樓朱甍煥晨光清風自遠至吹動羅衣裳
樓中單棲人憂思起彷徨良匹已久歿自誓不再行
欲取哀琴彈仰見孤鴻翔孤鴻去何極撫景空歎息
感傷輝煇容思作憔悴色憔悴非一特黃泉以為期

含情不能道聊詠兩髦詩

閑理簾中得諸交詩存殘感懷悵然成詠

得理亂帙中乃得故交篇顏色見遺翰瓊華尚清妍
憶昨遊名都結交此群賢日枉貽贈詞情文藹相宣
俛仰未十周飄零若雲煙生者應白首死者俱黃泉
屈指俱別離羈愁獨江邊舊懷誰能識洒涕東風前

柳絮

輕盈易飄泊思逐春雲亂已拂武昌門還紫灞陵岸
沙頭雀啄隨水面魚吹散官樹曉茫茫哀歌腸欲斷

徐博士愛日堂

靡靈趣類運忽去不待人杜者亦恐衰况乃頭白親
心長景苦短何由盡歡忻當朝慮遂夕在夜俄驚晨
無繩繫飛鳥使之少遂巡置酒上高堂為樂且及辰
此日誠可惜此意良難伸安得延年術為親保長春

畚衍師見贈

衍師本儒生骨甚踈峭軒然出人群快若擊霜鷄
早嘗垂長紳挾冊論周邵欲陳興壞端往應乞言詔
乾綱會中頽四海起攘剽仰頭望天高氣稷匿義曜
藩邦日尋兵縶玉罷朝頰木顛豈繩維長往遂淪羅
披緇別家人欲挽首屢掉超哉休遠從高踴願追紹

初來北城利駐錫問宗要相逢共宵哦篝火樹間照
篇成出叩鉢鋒疾驚楚僕我或勸之冠不答但長笑
留連忽中離名山赴佳召頗知此行樂風志酬塵眺
吳峰載襍登楚水投文弔江秋雨鳴瀨海曙霞發嶠
靈竒務窮蒐不憚躡遐徼東歸始安禪幽谷斬蓬藿
坐敷雲中衾薛屋一澗縵前年逐戎旃野出事田獠
是時陰飈作山黑捲狂燒不畏猛帝過車宿傍楓廟
聞師隔煙嶺無寐聽猿呌晨興雲滿壑衣濕寒未燎
空林斷樵踪兀兀見來轡相邀至巖扉杉竹穿窳窳
深房煮山藥乾葉燄風鈿頓釋行旅顏瓢綠欣飲醲
促還不能淹喧寂歎殊調邇來竟何成三十匪年少
恨無閑弭力結束從嫖姚間坊借書披危坐似持釣
行憂金見奪謁恐冠遭溺逢人戒談時縮縮刀在鞘
軍輦五月急市開無錢糶壯士漸欲磨妻孥困纏繞
堂筵窟履踈暑夕行懼懼而米贈長句有譽無鄙諠
組章弦芬粵金奏聆要眇據梧起豪誦心疚渾可療
回顧平生吟真咽蚯蚓竅上天宰玄化亂治方巨料
性命如窮鱗倘獲脫曾彙卜屋計已決不待龜灼焦
過湖就稻蟹靜虛容不肯安能效群女倚市聞妍妙
泳風或鳴橈耕月還荷篠師當重見尋東臯一舒嘯

謝周架閣後送菊花

抄秋始檢衣我歸視南園荒逕久廢鉏舊菊今不蕃
節臨乏采孰何以慰憂煩東隣幸分致離離權深根
幽蘗解別圃佳色羅前軒愧無樹灌勞獲此英翹繁
日出寒意往孤蝶來飛翻我亦愛其芳繞龍吟傲言
安得與君子飲泛同一樽霜露俱邁頽歲宴空籬藩

早過南湖

湖黑月未出蒸霞露淒淒榜人識浦淑不畏荒煙迷
殘夢詎可續舟檣聲齊開蓬見天邊斗柄掃水低
津遠未見樹村近總聞鷄自嗟遠遊人中宵走東西
不如沙頭鴈宛頸猶安棲

送蕭隱君自句曲經吳歸維揚

適從江東來復作江北去來去逐江雲蕭蕭舊巾屨
身帶煙蘿雨初下大茅鋒孤帆拂楚樹遙聽廣陵鐘
去家忽來歸怜君似黃鶴日暮渺相思淮南桂花落

高太史大全集卷之六

吳郡高啓季迪著

南州徐庸用理編

五言古詩

賦得貞娘墓送瞻上人之虎丘

色相終壞滅佳人能久妍
斷碑山寺裏小冢竹林邊
蘭葉春風帶苔花暮雨
細情留吳苑客夢逐楚臺仙
高僧方宴坐身在散花天

交竹軒

山人務結託車馬紛交馳
言笑雖強歡衷懷詎相知
中林有君子淡然夙與期
虛心爾無阻榮悴焉可移
朝尋披煙逕暮對褰風帷
非君此為偶誰共歲宴時
遷婁江寓館

高形百年內行止固無端
我生甫三九東西宜未闌
去年宅山陞今年徙江干
野性崇險陋經營唯苟完
閒窓俯平疇幽扉臨遠湍
豈忘大屢屐弗稱非所安
披榛始來茲霜露凄以寒
誰云遠相愛弟予相與歡
室中有名酒歲暮聊盤桓

雪夜懷周著作

燈照竹林雪寢齋寒更空
窓間成獨坐遙想故人同

不有孤吟興寧度此宵中

登西城門

登城望神州風塵暗淮楚
江山帶睥睨烽火接樓櫓
并吞何時休百骨易寸土
向來禾黍地雨露長榛莽
不見征戰場那知邊人苦
馬驚西風笳鳥散落日鼓
鳴鳴城下水流恨自今古

期家兄宿東湖民家不至

東湖欲上月寒鳥已棲
煙何處相期宿柴門汀樹邊
未嘗新漉酒猶望遠來船
誰信姜肱被今宵還獨眠

送陶兵曹之越

高齋掩林雪獨卧玄景暮
夫君定何聞此日勞我顧
清言一歡然孰云昧平素
方期締深約幽抱終以布
胡為遽嚴裝明發首東路
手持三公檄新辟當遠赴
薄祿豈足羈知君為親故
况茲句踐邦山水風所慕
湖月夕棹來谷迥寒鍾度
留滯自成悲無因共遊鷺

豐城余君夢彩堂

楚客身未歸悠悠念庭闈
濟江雖云廣莫阻魂夜飛
秋陰天無星猿叫楓樹稀
家山倏已到不夫舊路微
宛然在高堂獻笑試舞衣
焉知空館曙鍾動殘燈輝
難追夢中歡益發覺後唏
誰能傳爾翼遠去成相依

過東氏發園

人間樂事變池上高臺傾歌堂杏梁壞射圃菜畦成
不見妓釵影詎聞賓履聲來斯欲據抱念昔反傷情

送倪雅

交游結深歡離別生遠念聊持毛子檄暫脫劉生劍
南風柳下亭杯動江色滌山遙馬望驛日落蟬鳴店
此去漸成名驅馳君勿厭

同徐山人賁過妙蓮佛舍訪王主簿

逸人如高僧傲吏同隱尉閑房對清夏共挹池荷氣
煙帷栖鶴馴風鐸驚禽畏明日雨還來山櫻當熟未

題帶經漂麥二圖

朝鋤東臯上暮鋤西陂側釋耒讀遺經欣然此休息
因觀舜稷事耕稼寧辭力
田中刈麥罷把卷忘其疲風雨忽云至千穗漂無遺
於書苟有得歲宴何憂飢

秋日山中

山澤含霧雨偶來若屋夷我無遠遊志何與親愛離
暑退初可喜秋未轉堪悲壯顏豈草木憔悴同此時
中心與百憂日暮如有期悄悄出空宇悠悠適荒陂
阮窮勿復歎天欲昌吾詩

宿幻住樓雲堂

窓白鳥聲曉殘鐘度溪水此時幽夢迴獨在空山裏
松岩留佛燈葉地響僧履余心方正寐無使群動起

送賈鳳進士

新逢洛陽客握手共遊盤如何異鄉土乃得此交歡
相逢既不易相違亦良難驅馬云云返北風野多寒
登高望山川浮雲香漫漫群獸相號呼哀音摧心肝
遊子念高堂歲晚身得安人生知蓬萍飄流無定端
重合諒有日長歌聊自寬

寄王七孝廉乞猫

鼠類固甚繁家有偏狡猶厥質亦陋微明聚工造怪
舞庭欲呈妖憑社期免敗饒同善飯願暴比橫竹噲
倉偷自詫肥穴竄寧鋒隘唯思淮南舉不悟河東戒
嗟余守窮僻有屋如樊解公然肆相欺遠告未別界
嚶嚶鳴索頻窳窳緣幙快伺暗忘燈然聞腥喜食餉
空林印疑塵高壁墮墮塊核遠繫果亡汁覆甕壘壞
轟霆駭怒聞急雨疑流噴暑殘費補衽裊澆煩烘曬
入廁客驚吁守舍奴愛誠豈無老鳥圓昔壯今何憊
不修司捕職垂頭象瘡曠難求許邁符莫具張湯械
尋蹊漫設機薰隧徒吹竊遂令不眠人中夜長抑噫

君家產樹蟬許贈不以賣願得緹驅擒淨若刈管削
盡殺豈匪仁去害容少懶高枕幸無苦君惠當再拜

送客至海上得誠字

卧廡因田子抱閨老侯生豈無一時辱終有千載名
子亦屈身者薄祿非所榮結驪誰云淺一杯吐衷誠
艱難我何託所託在友朋平生不傷離此離骨為驚
白日川上淺歌作變徵聲明朝欲觀海浩蕩逐東征

冬至夜望懷周記室

夜閉鷺鳴來一室寒且靜明朝日長至夜漏方最永
淒淒霜塗塔皎皎水入井故人昔同宿杯酒笑相領
年運方重周歡事忽盡屏別離孰無有爾獨限殊境
達曙恨難裁殘燈兀孤影

賦永上人紙帳

刻藤裁素疇坐使諸塵隔冬室自生溫寒窓屢驚白
不隨直省被長覆捷禪篋思曾雪夜時宿伴山中客
初開北窓晚酌時寓江上外舅周隱君宅

春暄罷淒風朝始開北牖青山入吾座不異迤故友
自掃榻上塵琴冊列左右悠然坐其間傲兀醉杯酒
况當江花落微雨斜日後遠見帆度川高聞鳥鳴柳
孰云非吾廬居止亦可久人生處一席累榭復何有

幽懷悟澹泊末事辭紛揉更擬長夏眠風期結陶叟

夏日與高廡遊無量佛院還憇王隱君池上

久卧因炎燠煩抱思一浣霽雨留暫涼言出欣子伴
悠悠去景得稍稍來迹斷已尋名僧廡復謁高士館
蒲荷共南風池上新葉滿步陰覺衣輕汲冷鱗鯁短
幸無塵中役樂此林下欵鳴蛩嚙斜陽歸駕猶可緩

曉起春望

今朝有春意原野晴始綠疎花未破煙新禽稍鳴旭
物情各欣榮客意胡刺促屋閒厭寂寞從士愁羈束
兩事不可齊人生苦難足安得長放歌花開酒酷熟

陳氏秋容軒

西郊莽迢遞川樹凝煙景雨過落紅蕖斜陽半江冷
蟬鳴山欲暗鴈去天逾永孤客對蕭條應知鏡中影

瞻木軒

道士李玄備所居庭有凌霄花依樹而生

近樹伐而凌霄獨存因以名室求予賦詩

凌霄託高樹引蔓日已長纏綿共春榮幽花藹敷芳

高樹忽見伐無依向風霜亭亭還自持柔姿喜能強

君子貴獨立倚附非端良覽物成感歎為君賦新章

雨中遣興

積雨坐無悶端由便寂寞好鳥不頻啼開花自遲落
行園每度徑望岫時登閣只此可終期何當有搏酌

題方厓師聽秋軒

西澗獨踈涼颺度虛閣秋從夜添來流音滿林壑
初鳴忽泫泮稍定還蕭索月下暗禽翻窻間危葉落
上人習靜定談籟笑南郭喧寂兩無聞星河在寥廓

與內兄周思齊思義同過僧浩西齋夜酌

雨過月在花疎鍾閉禪舍幽僧與逸人對酌明燈下
圍樹稍辭春池蛙正鳴夜嘉會莫蹉跎流年易傾謝

萱草

不見堂上親空樹堂下草夏來風雨繁離披數龍老
日暮欲忘憂牽芳轉傷抱

月林清影

疎林逗明月散亂成清影流藻舞波寒驚蚪翔壑冷
雲來稍欲翳風動紛難整圓兔忽西傾愁看墮空境

春草堂

靡靡堂廡草託根近華極膏露既灌芳惠風亦揚馨
匪象陽和力孰使微物榮中天駛景流青節坐易盈
但憂德澤遠豈惜憔悴弁願言相蔓結遮彼春遊程
寸心雖難報拔去還當生

次韻內弟周思敬秋夜同飲白蓮寺池上

月出露已白荷花香滿池高僧愛清夜留客坐題詩
竹動鳥驚夢草涼蟲語悲開齋一瓢酒應不負幽期

聞鍾

迢迢煙際發隱隱岩中應初未覺寺遙下歇看山暝
惆悵未眠人空齋幾迴聽

詠雨酬張進士羽見寄

珠碎復絲輕颺迴乍拂極望中未晚峽愁裏度秋城
莎濕蛩應冷荷響鷓還驚聽絃知瑟潤卧簟覺滄清
一覽停雲句離抱轉難平

徐隱君陋屋

脩途息往駕環堵老所依蕭條窮巷中故人亦未稀
交交風雨侵騎驛蓬藿園局促不苟厭暫出復來歸
名都列飛甍煥耀朝日揮奕塏豈不慕終憂蹈危機
心舒體自適道在願無違茲焉樂飲水回賢良可希

西園晚霽

積雨淹夏半始晴園景饒高林上初日遠水泛迴颺
餘情蓋際蝶新響樹間蛸詎必勞觸詠煩憂坐已銷

題畫鷹得嘯字

高風動古壁竦立見蒼鷄軒然欲飛揚嗟此粉墨妙

秋筋束老骨天寒勢逾矯腦枯草中免氣盡樓上驃
健鶴雖百餘凡村豈同調乾坤正肅殺怒氣踰萬竅
大野開平蕪悲臺落殘照荒城有妖狐夜作猛布嘯
為君試一擊壯士慙勇剽安能保奉肉則翅隨年少

哭王陽

車行一輪推鳥奮一翼傷人生失輔友誰當共提特
相逢豈無人不獲如子良朝遊群彥林夕棄萬見卿
春風吹南原百草萎以長呼君不歸魂割我欲斷腸
豈不悟生滅情至諒難忘

池上晚

春晚思悠悠閣前池水流新蒲風葉響如對野塘秋
野塘前歲路已隔歸舟度鳥下獨回頭青山杳然暮
醉歸夜醒聞雨

覺未聞雨聲燈輝耿殘夜窓間有危葉暗助瀟瀟下
不記醉歸時寢齋如客舍

夏夜起行

夜熱不能寐起步中庭前舉頭望高昊離離眾星躔
欲推理亂象天道幽且玄長歌來涼颼驚鳥北林顛
此時層城閉悄悄萬室眠誰復相與娛淡月孤光懸
師子林池上觀魚

穿蒲尾獨掉嘆賞口群仰波平沒見痕池靜跳聞響
漁叟已免捕僧盂每分養落日意無驚識我臨流賞
和張羽懷吳興舊遊之作效其體

送沈徵士鉉歸海上

我友張國士短若妻君卿家無一金產所結皆豪英
去年東方來向我道爾名相逢真甚都座客為之傾
高標華月出雄辯流雲崩時方尚權謀處士皆振纓
諸侯致幣聘公子特軍迓爾獨念滄洲扁舟問歸程
翩翩真飛鴻影過海上城儻見魯連子殷勤煩寄聲
重午書事

東白軒

采蒲臨綠波團扇送涼過越客爭標渡荆巫弭節歌
冢醅憐浮玉宮衣憶賜羅今年兵氣惡朱符佩更多
昔宿東峰顛長夜何漫漫起看玄景晦冰雪積未泮
翻翻驚濤瀾黝黝失星漢悲風吹木石澎湃而凌亂
太陽淪朱光陰火吐未煥山精與罔象乘暗出遊翫
前岩挂猿孫後嶺起鴉鵲一時互啼叫哀厲客腸斷

茫茫禹九州下視莫能判如身墮幽都涉水濟無畔
金烏在地底其出疑可喚雄鷄栖高樹凍噤不振翰
君家有層軒不異泰山觀扶桑拂蒼楹指尺海東岫
酒醒四鼓發陽谷已昇半紛紛物象出稍稍涼暄換
如盲得復明毫末皆可看山中舊所聞窳默應屏竄
何當此借榻風興不待盥共宿義和車一觀天下旦

賦得姑蘇臺送賈文學賦

城上聞啼鴉臺前見遊鹿悠悠畫簾影薄暮澄潭曲
雲隨歌舞散日與興亡促美人不歸來湖水春更綠
思君別後登應盡天涯目

聞晚鶯時在園城中

昨歲聞孤轉綠除山院行今朝寢齋雨重聽獨含情
西澗多喬木何為亦到城

西齋池上三詠

葵花

豔發朱光裏萼依綠蔭邊夕同山薜落午並海榴燃
幽馥流珠簾鮮輝照藻筵群芳已謝賞孤植轉成伶

荷葉

楚服新裁得吳甯舊製成圓應問苻柔密欲翳連莖
聲中亂雨至陰下一魚行桂棹還思折江南日暮情

桐樹

晴粉朝英墜涼瓊夏葉舒鳥啼高樹早蟾轉薄跡虛
朱弦未薦曲彤管屢題詩坐恐銷華澤商吹起前除

遊城西得詭字

軍旗表山柵商鼓喚津店稻黃雲有香楓赤火無焰
賞懷普飯債眈目擬窮占思叟已繁強欲賦更橫槩
煙開象極泮波溢類洪墊壞宮茨被垣棄壘封漫塹
晨啖鷓鴣多秋腥鮪蟹贍吼鯨報僧粥卧獸衛官寔
揖道訛語談暎雜陋柱覘池開沐女盆石拔闢夫劒
竿危闌鈴響紗古幕燈艷時艱遊總稀歲稔餽饒醞
探囊出奇蒐拌琴脫浮念一覽一興嗟再到再忘厭
吟拊孺獲賡歸用棲鶻驗壑虛哀商叩嶺豁初魄閃
宵宵聽鳴鍾翩翩戒還鞞興清逼林妻醉顛眩湖灩
顏標山已遠入郭塵復染幽景慮遂遁拙詞紀姑憐

下將軍墓

胡馬飲洛川皇輿寓江左宰輔夫良圖國門屢與禍
惡木不可植猛獸終難馴冠軍歷陽來白日飛黃塵
兵叩西陵關火焚大桁口帛旅方敗奔六宮竟誰守
卞公仗戎鉞勇氣超常倫立朝素正色臨難仍捐身
落日百戰餘衰劒領殘卒父子普除兇一朝共淪殘

當年尚浮虛風俗變縉紳誰知効節者不在清談人
石頭義煥乘天狼夜流血冊贈極哀榮千秋表忠烈
六朝卿相冢無數青山根至今行人過但拜將軍墳
馬鬣封未平龍泉氣猶發惆悵望松楸一杯奠寒月

綠水園宴集

平屋寡良會艱哉况茲時幸逢金閨英中丞接光儀
名園過脩禊景麗春陽熙綠芷榮曲沼朱華敷廣澤
情宜寄高文憂襟為之披鶴來不敢訴慮此朋歡虧
何以淹返旆顏光頽遲遲

荅宋南宮見寄時寓江上

棲寓豈高適偶來南渚濱雖欣遠物累終悲寡交親
擊舟入郭言欲訪故人叩門子不在思憶竟難伸
歸來掩蓬廬幽卧屬始春風暄柳意動雪霽禽聲新
孤遊躬芳物尊酌執與陳念昔文翰場弱蹤繼清塵
鳴絃東閣夜飛蓋西園晨茲歡與年但懔悴兩未振
朝家枉瓊藻慰我佇慕勤深情寄妍詞不殊握中珍
屈屯在守志養素豈辭貧裁章以少荅此道願無渝

麥梅室

竊齋掩殘雪幽慢燈微故不知南澗瀟魂與春縈繞
初迷月入樹忽斷風驚條餘韻悵難尋空山鶴鳴曉

送程校理遊江上

風亭裊誰管草綠江水暮送此南浦人孤帆雨中渡
別傷足自緩前驛花滿路春聲戀山鶯晚絮迷汀鷺
我今獨愁屋芳月誰與度佇立望遙波相思積煙霧

僧齋聞雨

寂寂初罷語悠悠未成眠高齋有春雨半落燈前
已傷花委樹使念水盈田老衲獨無聽繩床方坐禪

送劉使君

去年送使君路遠已海湄今年送使君路遠復過之
路遠豈足言人遠自可悲夕宴鮮共懽晝出乏並馳
君懷孰可語予過疇能規此行却竹符東方撫博發
王事正靡盬奚暇及爾私但令中帶遷庶以慰所思

送周將軍請老歸耕

鞍馬息戎役筋力喜尚全買牛西岡垂聊復治廢田
零雨何濛濛決流亦消消良苗及時新人情一欣然
井此耕耘勞忘彼富貴妍心同老農夫閑閱望有年
家康儻得高尚願輸資遣

夜登南樓觀月

迢迢海上樓月出常先見吐嶺乍分規臨波已澄綠
蒼茫城闕閉歷落星河轉毋達中夜歡皓景應難戀

西臺慟哭詩

越人謝翺嘗為宋丞相文山公之客公死
之十二年登釣臺祭公以哭自為文識其
哀曰西臺慟哭記東陽張無持示求詩僕
感其誼遂賦一首

我我子陵臺其下大江奔何人此登高慟哭白日昏
哀哉宋遺臣舊客丞相門丞相既死節有身取空存
比望萬里天再拜奠酒尊陰雲暮飛來恍如載忠魂
所哭豈窮途中抱千古完上悲宗周隕下念國士思
淒涼當世事感慨平生言空山誰知哀惟有猴與猿
豈不畏衆驚聲發不忍吞人言天有耳此哭寧不聞
顧囚長風還吹此血淚痕往墮燕山隅一灑宿草根
田橫去已遠茲道不復論作歌悼往事庶使薄俗敦

見耕者

茲晨有佳興挈杖行遠墟春犁稍已出土脉向晚舒
嚶嚶為嘯谷澗澗泉鳴渠歲功自茲始為農亦良助
而我情四體偃息在樊廬飢匱固當爾與為歎踟躕

雨中書湖上漁家壁

漁舍煙不起瀟瀟雨初暝孤客與群鷗寒依葦間聽
山昏望易失波動愁難定歸思滿蒼茫空憐去帆迥

同社二進士晚登潘氏樓

靄靄川樹暝文陽忽然收林間一鍾未罷上聚未休
維撈漁石邊尋我樓寓倚本期散憂懷携手登此樓
邴知見速色蒼茫轉成愁幸茲有尊酌雖晚為君留
送家兄西遷

至蓮村

昔別歸有期此別去何極西遷屬事變咎責非已得
家貧無行資空囊辭故國忽忽逐徒旅宛宛謝親識
牽攀不能留慟哭野水側離鴻為迴翔浮雲暮愁色
別時雖云苦未若別後憶願行勿憂家養親自我職
殊方氣候異炎霧秋未息委命毋怨尤長年強殮食
昔愛茲里幽捨軒構蓬廬孰云墮世網重到十載餘
長亂喜獨完煙火靄舊墟柴門在深巷落日榆柳疎
隣翁念契闊携篲饋雙魚苦問客何事顏色與昔殊
馬知涉艱難多感長少娛貧賤非所耻中情在閭屋
願翁勿相誚終當遂吾初

雨中登白蓮閣望故園

亭亭高閣上渺渺清川曲日暮靄靄愁難耐雨中綠
聞鐘僧已返荷笠人猶牧歸棹獨難尋江南望雲木

尋照公

遠尋林下僧不識林下路隔雲孤磬響因到繡經處
相對竟忘言夕陽在祇樹

江上過丁校書宅留飲

迂權入浦洄言尋故人扉鷄鳴村樹烟寒旭景尚微
子起罷理髮相延關中閨雅詞既云宣濁醪亦以揮
幸茲竟日歡一浣積慮非尚慙有羈牽暫會復遠違
臨流送我還迴颺夕吹衣亂來人情改高誼似子希
儻不終憚煩卜隣遂相依

遊靈岩賦得越來溪

越女遊未去越兵嗟已來青山舊溪上無復見樓臺
過客空惆悵荷花姝自開

立春前一日喜雪

一冬總見瑞三白詎湏頰未嫌遲送鴈唯憐預占春
積砌猶殘凍粧苑已芳辰留更明朝落梅花欲開新

移家江上別城東故居

人情戀故知誰樂遠為客我行豈得已實為喪亂迫
悽悽顧丘隴悄悄別親戚不去畏憂虞欲去念離隔
雖有妻子從我恨終不釋出門未忍發惆悵至日夕

雨中客僧舍

客夢方暫適竹間風雨驚起登林端閣迤邐望層城

景寒川樹踈野晦原煙平不邀釋子語何以緩羈情

見花憶亡女書

中女我所憐六歲自抱持懷中看哺果膝上教誦詩
晨起學姊粧鏡臺強臨窺稍知愛羅綺家貧未能為
嗟我久失意兩雪走路岐暮歸見歡迎憂懷每成怡
如何屬疾朝復值事變時聞驚遽沉殞藥餌不得施
倉黃具薄棺哭送向遠陲茫茫已難尋惻惻猶苦悲
却思去年春花開舊園池牽我樹下行令我折好枝
今年花復開客屋還江湄家全爾獨歿者花淚空垂
一觴不自慰夕慢風淒其

東坡路上阻水

不覺去村遠瀟瀟柳間步江兩夜來多春流稍侵路
寒裳自可涉不待漁舟渡

獨酌

白日下遠川寒風振高柯蕭條掩閉卧暮雀忽已過
我有羈旅愁鬱如抱沉疴起坐呼清尊獨飲還獨歌
一斟解物累再酌迴天和數觴竟復醺翻恨愁無多
所以古達士但飲不顧他回頭向婦笑戚戚終如何

同柱微士寅過南渚赴朱七文招

五月燕鷗飛絲成桑葉稀相逢搃羈旅白苧未縫衣

扁舟喜同載晚度滄洲外樹失潮氣昏沙喧雨聲大
將迷路却通窈窕復蒙籠果熟皆梅子禽啼盡郭公
丘戈苦未息莫歎猶爲客此去醉誰家江邊主人宅

始聞夏蟬

翩翩總得蛻咽咽未成喧晴葉誰能見南風綠繞軒
乍驚變節物還念別郊園何待富秋聽方令羈思繁

贈新茶者

山田不生苗零雨空漑之歲宴窮谷中何以療我飢
青青萬長松兔絲絡其枝不知何樹下乃有十年脂
朝行西澗濱暮行東岡垂荷鍾偶遠憇言尋亦良疲
擊彼土石間得此瓊瑤安香因清醜發色藉玄泉滋
嘗讀炎帝編徵功實多奇天和滌煩滯靈味扶殘衰
詎必勞悲歌去采商頤芝歸來拾荆薪炊之作晨糜
八珍豈不美素餐懼有曠服斯待輕舉徃與山人期

我昔

我昔在家日有樂不自知及茲出門遊始復思徃時
貧賤爲客難寢食不獲宜異鄉寡儔侶僅僕相擁持
天性本至慵強使賦再馳發言恐有忤蹈足慮近危
人生貴安逸壯遊亦奚爲何當謝斯役歸守東岡陂
將往海上舟行值雨枝僧舍

沙響聞雨來中途生旅愁迤尋晚林磬暫駐寒塘舟
窓下一僧老竹間諸鳥幽誰言阻遠去翻使得佳遊
暫歸鳴珂里舊宅

故廬在東里久出喜偶旋景物亂後非行觀一悽然
荒榛塞園逕流塵蔽堂遙念茲經營初勤苦唯我先
蕪壤棄弗守顧已誠有愆雖懷首丘願未絕遊方緣
是主乃如客暫來靡留連日暮復還去哀抱將何宣

江上晚晴

江虹斷雨脚返景明墟里宿鳥亂歸村幽人獨臨水
漁舟隔浦飯煙火廬中起閒吟望遠岑緩步尋芳芷
此夕遇新晴憂懷偶然喜

與王隱君宿寧貞道館

松下禮貞罷鶴鳴暮壇空偶來古仙屋欣與靜者同
玄言不知還遂宿琳館中蒸菌沃芳露焚蘭度微風
山瓢瀉未盡月出秋林東語化衆妙歸探元萬緣窮
不與至道俱何以趨妄蒙願從希夷遊稽首青牛翁

送珪上人

曾來看江雨同倚香臺上師今西去遂還上香臺望
淮山暮鐘起楚水春帆漾來去本隨緣分携莫惆悵
冒雨暮歸過白沙湖

天寒滿湖雨獨棹東歸急送望水邊村蕭條暮煙濕
家人應候我深暝柴扃立

送袁憲史由湖廣調福建

只謂遠遊苦寧知遠遊樂君今萬里歸顏色殊不惡
自言楚帆開初別鳳凰臺采石月下過匡廬天際來
試沽彭澤酒憔悴陶家柳最愛小姑妍臨行復回首
遠逐綉衣遊開登黃鶴樓千峰漢陽晚一鴈洞庭秋
西上荆門渚銀釵見已文歌斷竹枝詞江陵夜風雨
看盡幾多山今朝始得還秋風吹驛騎又欲度閩關
閩關聞更好瘴霧晨早收柳子美如棗蘭花多似草
嗟余戀故鄉不肯涉津梁把酒看君去相思空斷腸

泛南溪二首

山折水暫旋山開水仍往東陂匯初成秋色瀟然廣
碧蘼花葦葦月暎石壁上此夕試沁洄一理煙中舫

又

清暉汎悠悠東與前溪合菱葉間荷花風來秋颯颯
久行愁瘴境忽有人煙雜我欲發棹謳漁師肯相荅

宴顧史君東亭隔簾觀竹下舞妓

美人竹下舞醉看隔簾樞彷彿瑤臺子遊戲綠雲中
玉鈞正蕩月羅袖忽驚風莫逐青鸞去尊前樂未終

夢遊仙

夢騎蒼麒麟手持白玉鞭長風八萬里夜入通明天
正逢絳闕開謁帝陪群仙飄緜紫霞珮杳靄青霓旃
命與衛林卿共讀金蕊篇玄文不可識謫歸一千年
驚寤忽長歎虛空但雲煙

獨遊白蓮寺池上看雨

輕衣忽變冷池雨來清夏圓文細細生密響脩脩下
荷披魚躍起樹靜禽鳴罷賞澹自忘還非因與僧話

贈薛相士

至正辛丑嘉禾薛月鑑過予承許因贈

我少喜功名輕事勇且狂顧影每自奇磊落七八長
要將二三策為君致時康公卿可俯拾豈數尚書郎
回頭幾何年突兀漸老蒼始而竟無成艱險嗟備嘗
歸來省昨非我耕婦自桑擊木野田間高歌誦虞唐
薛生遠挈舟訪我南渚旁自言解相人視子難久藏
腦後骨已隆眉間氣初黃我起前謝生弛弓懶復張
請看近時人躍馬富貴場非才冒權寵源史竟披猖
鼎食復鼎烹主父世共傷安足保常分為計豈不良
願生毋多言妄念吾已忘

高太史大全集卷之七

吳郡高啓季迪著

南州徐庸用理編

五言古詩

曉卧丁校書軒

窓月澹欲失，曉曉逼初曙。屋外鳥聲多，應知有嘉樹。
殘香掩幽寢，未事澄紛慮。頗似宿東岩，僧齋竹深處。

水上盟手

盟手愛春水，水香手應綠。云云細浪起，香香驚魚伏。
恬悵坐沙邊，流花去難掬。

贈漫客

畸人誠達生，聳叟亦曠士。漫客乃其徒，放意在雲水。
有山即漫遊，有竹仍漫止。漫吟不求工，漫飲不須美。
與物無留情，所適皆漫尔。人生本漫寄，何事紛戚喜。
與子作漫交，逍遙論茲理。

晝睡甚適覺而有作

閒屋况懶拙，盡日無營為。掩室聊自眠，一榻委四肢。
向暄思益昏，南窓滿晴曦。吾神誰能繫，八表從所之。
發憂常苦繁，茲焉忽如遺。有身不自省，此外安得知。
覺來隣鷄鳴，已過亭午時。如遊釣天還，至樂不可追。

我意在有適，寧顧朽木嗤。猶勝率毗子，塵中爭走馳。

秋日端屋

秋意日蕭索，郊園霜露餘。出遊無山水，聊復守吾廬。
巷轍久已斷，山瓢仍屢虛。非其寂寞者，誰樂此閒居。

夢鍾離兩兄

淮水去不極，淮山與偕馳。鍾離兩僊客，路遠歸何期。
執云歸無期，此夕乃見之。握手說辛苦，杯觴復同持。
須臾忽驚別，我夢方自知。雖夢亦足喜，况乃歸來時。

雨中留徐七貴

江寒宿雨在，落葉滿村濕。留君繫君艇，莫犯風潮急。
試問欲歸城，誰家借蓑笠。

看刈禾

農工亦云勞，此日始告成。往穫安可後，相催及秋晴。
父子俱在田，札札鏹有聲。黃雲漸收盡，曠望空郊平。
日入負擔歸，謳歌道中行。鳥雀亦群喜，下啄飛且鳴。
今年幸稍豐，私廩各已盈。如何有貧婦，拾穗猶惓惓。

晚步遊褚家竹亭

落日猶半野，閑來潭上遊。非因戀幽賞，聊欲散煩憂。
澄波魚噉父，荒竹鳥吟秋。不是愚溪上，胡為吾久留。

召脩元史將赴

京師別內

承

詔趣嚴駕晨當赴 京師佳微豈不榮
獨念與子辭 子自歸我家貧賤
久共之 閨門霽情惟寵德
不以姿 天寒室仍罄
何忍遠去茲 王明待細文
不暇顧我私 念念愧子勤
為我烹伏雌 携幼送我
泣問我旋軫 時行路亦已遙
浮雲蔽川坻 寔安聖所戒
胡為守蓬茨 我志願碑

國有遠幸在斯 加餼待後晤
勿作悄悄思 早發土稿

早發土稿

空山遠無驛 遲旅聊可宿
懷征候鳴鷄 燃帶續我燭
僕夫昨行苦 爛熳膳正熟
呼之愧忽忽 推車出茅屋
高岩尚懸斗 深谷未升旭
欲亟去返遲 怪石暗屢觸
思當在家樂 日晏始舒足
胡為此行遙 霜露勞局促
王事靡敢辭 非關徇微祿

車過八岡

上岡如登天下岡 如峽川勞哉
挽車夫呀喘當我前 兩轅開欲推
土石厲且堅 我行閱其僊
時下息彼肩 雖非古羊腸
實慎履與顛 如何道路子
卓來競連連 白日已傾仄
我行尚迺安 得駕逸足平
野起飛煙

寓天界寺雨中登西閣

片雲出鍾山 陰滿江東曉
幽人閣上寒 風雨啼鸞少
紅塵禁陌宇 綠樹層城繞
不為愁春徂 離懷自憂悄
送陳四秀才還吳

送聯書記東歸

君是故鄉人 同作它鄉住
同來不同返 惆悵臨分處
手把長干花 回望長洲樹
恐起憶家心 愁題送君句
旅寓古寺間 得與名僧居
時因簡牘暇 共諦楞伽書
倚閣山暄後 步廊月生初
屢聞員詮妙 一使羈縻舒
茲晨別同袍 言旋舊精廬
飛雲自無滯 愧我烏能如
東浦秋正迤 西齋夜應虛
傷離固知妄 相送聊踟躕
送禮部傳侍即赴浙西按察

送禮部傳侍即赴浙西按察

聖主想賢祐 夫君欵來東
姓名簡 膚聽名對明
廷中彷彿似其先 夢寐相感通
乘綸坐 西掖曳履遊
南宮優輟要近 屈往試澄清
功糾郡握 使節炎天凜
霜風顧余謀 珥筆言咲獲
屢同魚端此 分袂離抱何
忡忡

對園柳

依依客園柳 來時未堪折
今看夏條長 上有新蟬烟
芳序惜推遷 佳人念離別
秋風莫遽起 旅思方騷屑

僕至得二女消息

我僕持尺書來自我故鄉讀書意未了呼僕問彼詳
云我兩小文別來稍已長大文手捺捺窓前學縫裳
小文啼啞啞走索瓜果嘗喜爺有使歸迎門各踉蹌
我坐聽此言欲慰意又傷稍近尚爾思更速何能忘

菊隣

菊本君子花幽姿可相親清秋發孤艷似避東風塵
采采霜露餘繁英正鮮新車馬不過賞相看但幽人
幽人苦愛菊自是柴桑倫閑園誰與語蔽我四為隣
入徑朝摘遠循籬暮觀頻一壺每對酌折花插盈巾
殊勝康俗里歌呼醉遭嘆

出城東見古松流水坐憇久之

空潭寒無藻瑩淨涵青天長松百餘株扶踈繞潭邊
我行值幽境坐賞忘歸旋清風似相娛西來忽潑然
水動松亦鳴紛披復淪淪群鷗盡驚矯疑是龍吟淵
傲瀾蕩餘輝流響散遠煙靜聽意已消何須撫徽絃
安得卜此丘一謝塵中緣朝來潭上坐暮向松間眠

夜坐天界西軒

明月出東閣照我坐前軒諸生夜已定寂寞與誰言
煙慢螢微度風條蟬罷喧清景維堪悅終嗟悲故園

京師嘗具稊

新杭紫如玉遠漕來中吳初嘗愛精鑿想出官田租
我本東臯民少年習耕鉏霜天萬穗熟恣咏從飢鳥
日暮刈穫歸妻孥共歡呼茅屋夜春急風雨江村孤
晨炊滿家香薦以出網罾如今幸蒙
恩邀遊在 南都門前半區田別來想已蒸長年盜
寸廩補報一事無技也忽歎息飽食慙農夫

為因師題松梢飛瀑雷

松風散飛瀑夜作濤聲急棲鶴起空山如驚鬼神入
定僧寂無聽任酒袈裟濕

送周四孝廉後酒醒夜聞鴈聲

別時酒忽醒客去唯空舍風雲鴈聲來寒生石城夜
遙憶渡江船正泊楓林下

舍內寄

落月入晚閨相思不須啼我非秋胡子君豈蘇秦妻
風從故鄉來吹詩達京縣讀之見君心寧徒見君面
稜草不易絕割水終難開行雲會有時飛下巫陽臺
莫信長安道花枝滿樓好白馬繁春風離愁坐將老

貞氏女

余在史館日淡次有言姚文公承旨翰林

時嘗飲玉堂有侍妓聞語者詢之乃貞文
忠公裔孫也父為堯庫負縣官錢鬻之以
償遂流于娼家公愍之白于執政落其籍
以嫁院吏黃逮逮後至顯官同館之士聞
之多賦詩者余亦為作一首

妾恨非緹縈上書動天子自鬻償縣官幸得脫父死
誰知故相家失身屋狹斜遂令園中相翻作道傍花
當筵唱金縷朔客驚聞語相問忽相怜開籠放鸚鵡
棄置舞衣裳新理嫁時裝良人身作吏不是販茶商
花釵睽羅扇初與郎相見貴賤古難常妾心那敢怨
願即去作官莫掌官錢穀生子但生男家門免多辱

送李架閣赴山西行省

日暮踰大河北望古晉疆萬里饒風沙地接戎與羌
翩翩并州兒躍馬能挽強古來事爭奪百戰在此場
聖皇刻群雄撫劍定八荒瞻茲形勝都建侯樹藩方
披榛開幙府賓從皆才良所期偃甲兵民物自此康
山河罷阻險沃野多耕桑君行願努力遠別庸何傷

送王指判官之上黨

群林萃京師有若奔海川盍簪向華館唯君最詔季
忽行佐名邦輟理金匱編朝辭

紫閣下暮宿黃河壩馬上看太行日落萬里煙我裁
天井關高城鬱相連遠抵得少安時清罷戈鉞亟行
勿憚遠
聖意煩承宣

登句容僧伽塔望茅山

高登大士塔遙望仙人峰茲峰夫何如玉削三芙蓉
雲深句句樹日落華陽鍾長君昔飛昇駕挾雙白龍
至今學道處洞府留靈蹤丹泉夜吐光瑩草春含葦
仙應笑我愚塵世苟自容胡不鍊爾形歸來蔭長松
望仙指尺間不隔雲海重貞訣儻肯投執鞭願相從

贈楊祭陽

嘉陵美山水亦復富文彥楊君產其邦材拔性高狷
布衣走名都早入藝林選客屈稷下談王邀鄴中宴
出門得名聲不假親舊援匣劍未久埋囊雖已先見
吐詞實現奇讀者心欲顛刀鳴關夫勇花妥笑女情
如觀廣場中百戰張曼衍平生眼無人遇我獨相善
陌頭每並出兩騎無後先喜從兔園遊慙受狗盜薦
君歌我固服我賦君亦羨墮筵吟帽烏踏席舞裙茜
醉中共笑語往往雜諧諺有特出城西山水恣攀踐
岩眠曙猿驚澗飲夏鶯轉吳宮妓去榭蕭寺僧開殿

龍門剝陰苦高什記題偏歡遊正相斟世事忽驚變
朋儔半生死一住如激電我棹返江溇君車赴淮甸
旋聞逐流人屈濠又移汴一身去何賚空索唯破硯
危塗晚行疲欲進足如胃狼來樹杪避竭走燈下見
渡河自撐篙水急船斷牽及至秋已深舊褐風裂片
難尋高陽歎空弔鄂陵戰

聖恩忽如構收接佐山縣卑曹敢云辭執版謁府掾
官庖盡炊藜民賦半輸縮低飛蓬蒿間不異雉帶箭
有親寓京師年老關供饌欲奉朝夕歡去職胡敢擅
晨上宰相書得歸遂微顧上堂具珍鮭呼婦賣釵釧
我時別君久問訊愧無便空題憶君詩細字書滿卷
今春被

詔起前史預編撰始來長干門楊柳正飛燕逢君風
塵餘不改舊顏面握手話苦辛悲喜雜慶唁客中雖
無錢自駕賒酒券邀衆卧東閣月出初鎖院君言涉
艱難壯志今已倦回頭悟前非更名慕遽瑗君近非改
我聞棠谿金不畏經百鍊胡為暫失路遽欲老貧賤
吾皇奮神武四海始安奠棧通論夷文驛走傲士傳
時巡抗寬旌肆觀冠星弁功成萬瑞集禮欲議封禪
君才適時需正若當暑扇手持照園珠胸出補袞線

便應上金鑿立對被

天眷嗟余忝載筆嵐璞難自銜幸茲際昌辰魏闕寧
不戀但憂誤蒙

恩不稱終冒譴秋風楚潮滿歸舸帆欲轉君若念故
交殷勤一相餞

寺中早秋

秋風入寺早孤客驚離索科日數蟲懸槐花兩餘落
砧聲起廢苑簞色淒高閣獨恰明鏡中玄髮猶如昨

天界觀月

洪武二年八月十三日元史成中書表進
詔賜纂脩之士一十八人銀幣且引對

樊諭擢按庶職老病者則賜歸于鄉閭

二日中秋諸君以史事甫成而佳節適至

又樂

上賜之優渥而惜同局之將遠也乃即所寓

天界佛寺之中庭置酒為觀月之賞分韵

賦詩以紀其事啓得衢字云

聖主念前鑒述作微名儒群衆高館間跡跡愧我愚
孰謂此責輕毫端有褒誅書成進丹陛名對共拜
趨去留雖不同雨露均沾濡已淹三時勞可廢一文

娛况逢端正月當空照眉須流光滿金界境與人間
殊廣庭布長筵嘉肴薦芳腴豈唯多士集亦有名僧
俱興酣貴形忘諧笑不復拘觴竹豈辭勤仰看轉斗
樞明晨即分袂此樂誠須更人生四海間相見皆交
于不知誰使令流蕩無根株忽然此相遇旋復成天
隅願各崇令名道遙步亨衢明年重見月相憶當長
吁

寄題鄞縣青山寺鍾秀樓

東湖秀可攬造化夙所聚聞有釋子居雲中構層宇
剝出辨遠岑帆迴識脩渚為外月上海虹邊樹舍兩
願言此登眺去作逃禪侶西崦暮鍾時憑闌共僧語

晚出趨朝

正冠出門早杳杳鍾初歇嘶騎踏嚴霜驚鴉起殘月
遙迤度九陌窮宮瞻雙闕長卿本踈慢深愧陪朝謁

送顧式歸吳

顧君野王孫與我生共縣故鄉未曾識却在他鄉見
留連忽東還長揖袖詩卷自言吳中好稻熟湖蟹賤
欲卧煙雨舟醉讀三高傳余方謬通藉講惟近清殿

故園豈不懷

君恩正深戀遠欲謝鄉人殷勤附君便

御溝觀鷺

白雪泛金塘群翻動曙光危樓翹獨趾亂唳引脩吭
池中鷓可並廷內鷺難行自憐觀詠者江湖興未忘

夢姊

我家白頭姊遠在婁水曲昨夜夢見之千里地誰縮
不知別已久尚作別時哭覺來旅齋空風雪酒窓竹
田家有弟妹終歲喜相逐我非王事靡胡忍離骨
肉城東先人廬尚有書可讀何當乞身還親為姊煮
粥

吞定水寺芭公

日晏初出院開齋一蕭然忽枉名僧書始知在清泉
憶昔雲岩屋共締林中緣夏陰繞澗吟秋霽開閣眠
聯合苦難常別來歲頻遷趣同貴道在跡異慙名牽
明月出東海想照空山禪無因荷衣僕往禮高峯前

謝翰林留別

啓與同郡謝君傲同傲又同官翰林洪武
三年七月廿八日

上御闕樓召對權啓戶部侍郎謝吏部郎中俱

以踰冒辭即蒙

俞允賜內帑白金放還于卿

江左稱謝家奕葉多名人君今復秀發瓊枝邁風塵
顧余忝鄉里才華敢論美 冊詔偶見微雲蘿欵同
起謁

帝入九關咫尺瞻

天顏從茲誤通籍接武諸公間朝侍 青坊讀夜陪
玉堂宿講罷分 御羹吟成刻官燭出入在

兩宮與君無不同自慙本鷗鷺亦得隨鵷鴻朝朝禁
門下聽鷄共騎馬上國多故人情親似君寡並

命起列卿 龍極翻憂驚我叨掌國計君佐持銜衛

借辭向

明主叩 天聽

天語勅賚內帑金東還特相許拜賜出

皇都人言似兩疏月明照宮錦同棹入中吳吳中故

鄉道雨歇秋光好青山度水迎喜我歸來早落日下

長洲分携忽解舟如何到家喜却有別君愁別君去

遠邇只隔吳江水離思與秋長蘆花三十里來往片

帆通相期作釣翁高歌雖鄙野猶可贊

王風

過白鶴溪

昨發白鷺洲今過白鶴溪溪流幾回轉只在晉陵西

月出女猶浣雲深猿自啼茅峰雖咫尺無計躡丹梯

至吳松江

江淨涵素空高帆漾天風澄波三百里歸興與無窮
心期弄雲月迢遞辭

金闕晚色海霞銷秋芳渚蓮歇久別釣魚磯今朝始
拂衣忘機舊鷗鳥相見莫驚飛

始歸園田二首

辭秩還故里永言遂遐心豈欲事高蹇屋崇自難任

清晨問田廬荒蹊尚能尋秋虫語左右翳翳黍麻深

別來幾何時舊竹已成林父老喜我歸携榼來共斟

問知

天子聖歡然散賴襟相期畢租稅歲暮同謳吟

白露蕪草木荒園掩窮秋歸來一芟理始覺吾廬幽

高柳蔭巷疎清川映門流落日望禾黍離離滿西疇

卜歸意自欣榮杖頻覽遊名宦誠足貴猥承悞慙充

早退非引年

皇恩未能酬相逢勿稱隱不是東陵侯

睡覺

爐熏霽宿潤秋滿林屏裏曙色透窓來幽人眠未起
風驚露樹怯日出煙禽喜却憶侯東華朝衣寒似水

與王徵士訪李鍊師遂同過師林尋因公

玄館啓員境緝園闕清香茲晨兩地遊乍出器煩卿
鳥鳴桂花落澗戶秋風涼開士演金偈羽人薦瑤觴
亦有詞苑英清芬吐華章愧我自微起束帶忝周行
山林久在念那期復來翔睽合固知妄去來亦何當
誰言道各異妙契宜相忘

兩夜宿東齋

砌冷一螢急窓空諸葉稀蕭條風雨夜幽卧掩林幃
隣杵聽已歇齋燈看向微勿憂歲暮計聊食故山薇

效樂天

誰言我久賤明時已叨祿誰言我苦貧空舍尚餘粟
辭闕是引退還鄉豈遷逐舊宅一架書荒園數菴
菊俗緣任妻子家事煩僮僕性懶宜早閑何須暮年
促猶著朝士冠新裁野人服杯深午醉重被暖朝眠
熟旁人笑寂寞寂寞吾所欲終老亦何求但快無此
福功名如美味染指已云足何待厭飽餘腸胃生疾
毒請看留侯退遠勝主父族我師老子言知足故不
辱

新春飲王七孝廉家

江雨霽江郭寒姿變春華鳥欣已交音梅慘尚吐花

此時高堂上晨起獨感嗟歲換固有常時清樂無涯
蕭蕭風吹巾竹外度遠沙相遇偶一醉今夕恰酒家

詠軒

肅肅布華榻冷冷嚴朱絃臨楹一流聯幽事忽滿前
池草方依微庭柯正蔥羊偶爾發孤詠聊茲寫中情
景融理自得詎辨螭與妍猶慙至妙意寂寞非言宣

施君眠雲堂

君字可堂眠雲其號也

古弁一高士白雲與之濟性懶復好眠招雲宿林丘
下雲作簟席上雲作衾稠雲去稍舒膝雲來正蒙頭
平生無心夢兩雲兩悠悠自言眠雲樂世無一可侔
浩然身欲飄若乘無倪舟朝至乎帝鄉夕返乎仙洲
寧知日月旋但覺乾坤浮天鷄叫不醒宵宵空岩幽
我觀山川氣出入不可求或逐鸞鶴翔或從蛟龍遊
或為風伯驅狼藉不得收或連兩師怒奔走魚能休
小生膚寸間大履遍九州變化實多狀欲算苦費籌
奈何一室中爾獨解使留我行塵務區願出入未由
舉足常防危開眼即見愁不如閉戶眠往尋孔與周
愧無山中綠雲肩相從不惟當去從爾一夢三千秋

卧東館簡諸友生

抱疾卧東城文墨成久荒翔鴻下流響時第忽殞芳

繁陰盡不舒何如殊積傷良俦乘高誼寡昧豈見忘
車馬限泥濘無由接華觴平居歡固難况乃時非康
何以度茲運相勗蹈其常

荅張院長雨中見懷

林園寢扉掩閑坐道心生山藥翻寒色塘荷含曉清
乍遠狂芳札速憶愧深情此日知同寂梧牕聽雨聲

春日言懷

暮歸東市門迢路聞悲啼駐馬一借問荅云征人妻
征人新戰歿飲恨沉黃泥有兒在哺下飢來食無糜
搥將割慈愛棄去從東西我看巢中燕雛長隨母飛
皇天仁萬物兼照理弗遠此獨何奇偶不能與之齊
躊躇去復顧使我心肝摧

施澤阻風

客行阻風濤捨舟步江側荒村經戰餘草木盡愁色
夜投土屋中月出林半黑燃薪燎我衣炊黍作我食
夜長聞塞寒歸夢何由得遙想倚閭親中宵淚橫臆

送張隱君歸耕西山

山中久無人秋風桂枝衰朝逢還山客言趣白雲期
人出君乃適嗟哉此何時東岡有良田負耒當自治
四體雖云勞歲晏可免飢而來未能返驅車竟何之

過硤石

青山夾長溪溪上有魚市土門閉落日野氣白於水
廓行車迹外鳥起鐘聲裏吳語問居人到州還幾里

懷徐七

哀鴻已鳴渚落葉初覆陌故園當按衣却思遠行客
客行日已遠我思日已積東南望歸棹鳥去煙波夕
憂來不成言滿抱空戚戚豈無一尊酒黃花爲誰摘

四栢

堂前四小栢羅立二尺長始栽附南墀遠移自東岡
春夏衆草芳翳沒成久荒低枝網虫懸暗葉螻蟻藏
不沾夕露氣每隔朝陽光我病廢羹理覽之屢彷徨
玄冬戒嚴候迅風激飛霜蕪穢忽自除憐然露蒼蒼
恍若群鳥散鵝鷓得翱翔乃知受命正雖弱自可強
循步賞勁色撫攀挹微香幸得依我居勿令縱牛羊
他年培養成凌雲孰能量後凋誠足貴早厄庸何傷

高太史大全集卷之八

吳郡高啓季迪著

南州徐庸用理編

七言古體

唐昭宗賜錢武肅王鐵券歌

妖兒初下舍元殿天子仍居少陽院諸藩從此擁連
 城朝貢皆停事攻戰岐王已去梁王來長安宮闕生
 蒿萊天目山前異人出金戈雙舉風煙開羅平惡鳥
 啼初起犀弩三千射湖水歸來父老拜旌旗醜酒掇
 牛宴鄉里擊裘駿馬騎春風錦袍玉帶真英雄詔書
 特賜誓終始黃金鏤字旌殊功虎符龍節彤弓矢後
 嗣猶令赦三死盡言恩寵冠當時天府冊書未踰此
 摩挲舊物四百年古色滿面疑蒼烟天祐宰相署名
 在尋文再讀心茫然古來保族須忠節愛此幾人還
 覆滅王家勲業至今傳不在區區一方鐵人生富貴
 知幾時泰山作礪徒相期行人曾過表忠觀風雨斷
 解埋殘碑

太白三章

太白初升北斗落行人早起車鳴鐸豈願身離父母
 邦山川路遠非不惡貧賤未知生處樂

太白正高北斗低行人出關難亂啼他鄉無人是知
 已欲歸未歸東復西弊裘愧見家中妻

太白猶懸北斗沒行人衣上霜拂拂下馬飲酒歌苦
 聲新豐主人莫相忽人奴亦有封侯骨

江上看花

兩年京師不見花青衫白馬驅塵沙今年江邊偶無
 事狂醉欄慢尋春華遊蜂飛蝶日妍暖紅紫正發紛
 交加穿蹊每入隣媪園叩門或到山僧家漸老都無
 少年樂底用蕭鼓隨行車攀條繞樹對吟詠不忍歸
 去至日斜花應得我相慰賞似咲欲舞爭矜誇我如
 無花亦亦寂寞閑戶有酒誰能賒夜來茅屋卧聞雨曉
 起走看成咨嗟飄英墮萼不可綴餘艷只似銷殘霞
 明知春色不久住豈料便去難留遮野鶯啼罷一回
 首恨與芳草盈天涯

中秋詠月張校理宅得南字

八月望夜天如藍海色卷霧山收嵐玉盤元沉龍窟
 底忽起萬丈誰能探初來空中光尚濕嬌娥寒髮風
 盤髮人言一年此最好金精水氣秋相涵小星盡去
 大星在芒角欲吐敢與奈天將洗眼照下土啖食肯
 縱妖姦貪穿深窺暗不遺隙周兩忘影逃岩嵌前年

客中憶見之家人怨別方喃喃荒山不知佳節至垂

首免索尋書蟬但怪流輝入敗戶油燈夫縱留孤龕

起行陰林不用炬剝啄獨叩峰西庵蛇蛇亂踏心膽

悸怪影走石皆楓楠即呼道人共載酒放舟直下夫

容潭翻翻驚鷓落樹杪吹笛正和鳥飛南今年在舍

反寂冥暗室困卧如僵委乾愁無端負良夜月固不

言我則慙人魚賢愚競說賞况我清景性所耽忽憶

諸君隔河水持被就宿聆高談為呼老婢掃庭宇一

席盤釘梨與棋江城重閉萬家寂樓鼓近聽絕過三

空塔淒其覺露滋虛牖窈窕疑煙含婆娑欲留月伴

影素鷺西下頰停驂明宵復出已難似動別經歲嗟

何堪尊前此月又此客世所難遇心應語關山幾處

未鮮兵擊折不寐愁丁男兩隣歌舞比隣哭月雖同

照異苦甘何人為我揮天戈乾坤多難俱平戡行者

得還屈者樂清充所及恩皆重懸知此願未易遂憂

來舉盞從沈酣淚更裂散曉虫急古桂吹落自耗耗

送王太守遷雲間

男屠猪羊文醜酒共禱神祠留太守太守今年遷大

州除書已下誰能留兩州相去無百里夫君應愁得

君喜安得如君數十人一時盡福東南民

謝陳山人贈其故弟長司所畫山水

大髯袖中有蘆葦嵐氣噴人寒色薄出贈生綃一幅

圖云是小髯之所作我曾游君伯仲間仲今已沒空

見山畫中無限磴磳意使我坐見愁滿顏重厓復潤

迷樵路煙蘿真真畫如暮溪閣風生醉客眠野橋月

出歸僧度樞林蒙密楓林高深處似有猩猩蹄滿空

雲凍動秋思飛泉落日何蕭騷揮毫若此難再得白

鶴何時返却國良工自古多苦心留賞人間賴遺墨

南宮北苑皆已仙此畫與之當並傳坐嗟存歿意難

報作歌愧匪瓊瑤篇

書夢贈徐高士

真人高居紫霞房靈津夜灌通挑康其神不彫駐景

先名籍早入丹臺藏道成驂蚪面虛皇交攝梵炁遊

穹蒼下視群生墮迷方倏忽起滅更喜傷我嘗夢遊

至其傍廣庭淨發象妙香仙媛神官儼成什坐考雲

笈披琳琅稽首歸依大鑿玉頰潤渴世同淪亡龍根

珍脯不可嘗但覺九火燒飢腸身心俱病孰為據王

言授我何敢忘空山無人覺在林海月未落天蒼茫

佐御化鶴來吾知朱冠縞衣傾而長篋中活人何所

持苓參朮芳枳桂薑學仙曾聞道非常幸賜大藥和

陰陽擔黍飛梧上翔翔人間徧施其露爰掃除熱惱
俱清涼疾苦不生壽無量

劉松年畫

樵青刺篙勝搖漿船頭分流水聲響青山渺渺波濤
漾白鷗飛過時一兩載書百卷酒十壺日斜出遊女
見湖隣舟買得巨口鱸醉拍銅斗歌鳴嗚此樂除却
江南無

題武昌魏槃所藏畫

楚山遠吐叅差碧虛閣開臨繫船石沙樹獨時鄂渚
秋江鷗沒處湘潭夕閣中幽人坐讀書書聲入水驚
龍魚欲吹短笛相尋去黃鶴磯頭好待子

送葉卿東遊

聞君辭家今幾年布衣綫斷芒屨穿江湖夢迴燈火
夜聽雨每憶山中田兵戈忽斷故鄉路雖有兩足歸
魚緣上書願雪父兄耻畫地聚未籌山川居然無成
困逆旅白日但看孤雲眠時人不吝禰生傲坐客豈
信毛公賢黃金已盡酒徒散壯士反為兒女憐飢吟
倚壁氣未餒有事病鶻棲荒烟却欲南遊探禹穴僕
夫整駕鷄鳴前波濤翻江畏飢鰲霧雨連海愁飛鳥
相逢誰肯問憔悴山水自為窮人妍乾坤無家去何

止飄泊不異迴風船區區願君自愛惜今古遇合無
非天亂離貧賤何足歎王孫亦在道路遙我今豈少
四方志讀書坐破牀頭理恩讎兩無欲誰報送子空
歌寶劔篇

題韓長司所藏山水圖

參柳昔在西安幙騎馬看山時出郭終南秦華勢最
高橫作秋雲掃寥廓秦川漢苑萬里開酒醒望遠登
荒臺日斜滑上歸人渡岳暗閣中飛雨來此處奇觀
絕天下何事歸來猶看畫畫中小景似江南黃葉漁
村見烟舍莫戀江南真故鄉尊鱸炊熟酒船香美人
不是滄洲客去去宜登白玉堂

煮石山房為金華山人賦

山人不飯粳稻香笑指白石為餒粳金華之石猶可
食元是舊牧初平羊荆榛拾歸夜深煮自言久服觚
輕舉但令隨處有雲根不問青天早無雨我生無力
耕西疇硯田欲枯抱飢憂便當從君學此術絕勝乞
朱監河侯

九日與客登席丘至夕放舟過太平山

昨日風雨今日晴天意令人作重九登高未用憶龍
山弔古竟須尋席阜秋清入稀葉滿寺屐齒無聲在

苔厚我來但欲問前王不知伯氣銷沉久下穿山骨
葵弓劍銀海夜寒空不朽樓臺荆棘今幾變英雄誰
似青山壽十年自歎在塵土鷄鳴起逐途人走茲遊
喜出世網外相携况是同心友盤梯共上峰頂塔欲
觀東海攀北斗中原不見鴻鴈來浮雲萬里空回首
鍾聲催送晚出寺棲鴉已滿祠前柳秋風吹林客醉
時夕陽下嶺僧歸後山留好月續清景乘興夜過漁
村口放船不覺露沾衣滅燭始看星在留金陵酒熟
來謫仙赤壁歌殘泣嫠婦人生此樂信難得夢幻功
各有時有它年何必問誰健但令不負持螯手詩成
底用刻山石為寄龍門說空叟明朝來借白雲泉淨
洗從前千劫垢

夜發錢清

錢清渡頭船夜開黃茅苦竹聞猿哀客官醪酒水神
廟風雨滿江潮正來蒸飯炊魚坐蓬底不覺舟行兩
山裏棹歌早過越王城東方未白啼鴉起

草書歌贈張宣

昔聞汝祖東吳精醉草聖醒而驚汝今能飲不滿
杓逸氣欲與相崢嶸高堂把筆若把槊長綃一拂悲
風生陰垂大澤雷雨過響破巨峽波濤傾颺颺遊絲

習晴晝落落高斗回寒更飲猿連臂深澗絕飢鶻
翅荒烟橫自言靜裏觀萬物故能變化窮其情嗟余
少本好劍舞學書晚方從父兄終為懶惰不得就塵
滿硯田長廢耕覽時撫事每有感胸次砭碑何由平
空齋往往出怪語吟聲相應飢腸鳴篇成請君為我
寫墨瀟酒壁從奔崩是時黃雲閉歲暮返照忽出寒
江明手隨意到不留阻正似突騎陰山行今嚴不聞
戈甲響一夜下盡名王城安得師行亦如此頃刻坐
見乾坤清喧呼作譎聊贈汝愈使流淚沾衣纓

獨遊雲岩寄周砥

城西諸山非不奇我遊獨與茲山宜紅櫻春開山後
寺白水夏滿山前陂幽居况與山不遠鐘鼓每到空
齋惟雨餘烟中落日下曳杖往讀頭陀碑兩岨蒼蒼
石色古杞杞樹高陰滿池殿燈欲昏上群巖塔鈴已
靜蹲孤鷗與來即遊興盡返迎送豈要山僧知困窮
長亂豈無感正賴此境忘吾悲嗟君何為乃自苦破
羈短策塵中馳挂帆能來亦未晚浦口三日南風吹

練圻老人農隱

我生不願六國印但願耕種二頃田田中讀書慕堯
舜留待四海昇平年却愁為農亦良苦近歲征役相

煩煎養委唯堪了官稅賣犢未足輸丁錢地贖縣吏
叩門戶隣犬夜吠頻驚眠雨中投泥東鑿塹水上渡
水西防邊幾家逃亡閉白屋荒村古木空寒煙君獨
胡爲有此樂無乃地邇秦溪仙門前流水野橋斷不
過車馬唯過船秧風初涼近芒種戴勝曉鳴桑樹顛
短衣行隴自課作兒子鎰後妻耘前白頭雖復勞四
體若比我輩寧非賢旅遊三十不稱意年登未具粥
與鱸便投筆硯把耒耜從子共賦幽風篇

嘗蒲桃酒歌

西域幾年歸使隔漢宮遺種秋蕭瑟誰將馬乳壓瑤
漿遠餉江南渴吟客赤霞流髓濃無聲初疑豹血淋
銀甕吳都不數黃柑醲隋殿虛傳玉薤名聞道輪臺
千里雪獵騎弓弦凍皆折試唱羌歌勸一觴甌房夜
半天迴熱絕味今朝喜得嘗猶含風露萬珠香牀頭
如能有五斗不將輕博涼州守

送高二文學遊錢塘君梁人與余異譜

我家本出渤海王子孫散落來南方只今遙承幾世
後坐棄戰陳談文章嗟君渡江此相遇知有遠族猶
屈梁嘗聞四海盡兄弟况我同姓能相忘十年近舍
道南宅歲時拜父登高堂君年雖少志則壯不肯與

世相低昂讀書閉閣人罕識明月夜照聲琅琅欲將
古道共推挽豈顧薄俗譏迂狂君來不欲是王式我
行或止非減倉亂離正賴相慰藉何事遠別遊錢塘
錢塘舊國我所到江山自存人已亡鴈鷺長雲暮陂
澹牛羊落照秋陵荒繁華銷盡莽蒼出君行見此能
無傷西風吹塵扇難障不如歸卧湏時康一飢小事
何足道故國尚有霜英黃

贈李外史

仙人飄飄若雲風來去倏忽誰能窮豈唯上界足官
府往往亦在塵埃中我欲尋真向五岳亂後舊路迷
榛蓬天鷄未鳴夜谷暗海鶴已去秋壇空丹厓碧澗
瑤草歌洞府一闕無由通陌頭驚逢李道士自說柱
史爲吾翁傍人相傳解起死袖裏有丹如日紅我聞
安期古榮士親見楚漢爭雌雄終然濁世不肯住渡
海徑去先飛鴻玄洲東望總只尺彩霞幻結金銀宮
何當共赴食棗約三花醉折春濛濛迴看城郭煙霧
杳大笑下士真沙蟲

聽教坊舊妓郭芳卿弟子陳氏歌

文皇在御昇平日上苑宸遊駕頻出仗中樂部五千
人能唱新聲誰第一燕國佳人號順時安容詞舞總

能奇中宮奉旨時宣喚立馬門前催畫眉建章宮裏
長生殿芍藥初開勅張宴龍笙罷奏風絃停共聽嬌
喉一鷲轉過雲妙響發朱唇不讓開元許永新綉階
花驚飄艷雪文梁風動委芳塵翰林才子山東季每
進新詞夢上喜當筵按罷謝天恩捧賜纏頭蜀都綺
晚出銀臺酒未消侯家主第強相邀寶釵珠袖尊前
賞占斷春風夜復朝回頭樂事浮雲改瘞玉埋香今
幾載世間遺譜竟誰傳第子猶憐一人在曾記霓裳
學得成朝元隊裏藝初呈九天聲落千人聽丹鳳樓
前月正明狹斜貴客迴車馬不信芳名在師下風塵
一旦禁城荒誰是花前聽歌者從此飄零出教坊遠
辭京國客殊方閉門春盡無人問白髮青裙不理粧
相逢爲把雙蛾蹙水調梁州歌續續江南年少未曾
聞元是當時供奉曲朝使今年海上歸襟華休說亂
來非梨園散盡宮槐落天子愁多內宴稀始知歡樂
生憂患恨殺韓休老無諫傷心不見昔人歌汾水秋
風有飛鴈此日西園把一危感時懷舊盡成悲含情
欲爲秋娘賦愧我才非杜牧之

林屏山水圖歌

畫師知余愛青山久墮塵網無由還故將列岫寫屏

障使我卧起於其間從此長如宿清境枕上分明見
峰巒爐烟曉入帳中飛擁被驚和白雲冷丹崖碧樹
層層開江雨遠遂孤帆來就中樓閣是何處彷彿神
女巫陽臺楚山脩竹瀟湘水似有清猿忽啼起江南
千里夢遊歸半床落月高堂裏

方隱君山園

吳興城南山水勝竹樹參差萬家映幽深誰似隱君
園車馬不來鷄犬靜兩溪迴通柳巷曲一峯立對柴
門正東西別墅恰更好孤棹往來隨晚興總令種菜
不種桃新製長鏡木爲柄家僮頗解候天時隣叟還
能論地性交交林路翳復開活活野泉流不定清晨
聞鳥欣獨往濃綠澄晴畦色暈老葉垂根孤刈斨殘
英綴梗群蜂競乍榮新蔓喜籬長欲迸晚芽嫵土硬
此時採擷自足飽肯爲食肝煩縣令古來名園悉可
數金谷辟疆誇獨盛鑿石園開弄月池買花深作行
春徑愛妾宵陪乘燭宴狎朋晝接流觴詠長年歡樂
豈知拙迥看芳菲屬它姓只今誰解問遠蹤斷甃摧
垣無一剩乃知專業要德守那得衰榮但言命君能
勤儉遺子孫應有佳名書郡乘

觀顧善所藏宋賜進士絲鞞歌

臚傳殺下呼名字進士新充探花使內人縮結絲鞭
成恩與官袍一時賜不用頻將柳下揮馬蹄得意自
如飛影曩夕陽何處去曲江園裏宴初歸天街直拂
花枝過擇婿高樓彩毬墮令人把玩憶當時零落春
風幾縷絲

憶昨行寄吳中諸故人

憶昨結交豪俠客意氣相傾無促戚十年離亂如不
知日費黃金出遊劇孤裘蒙茸欺北風霹靂應手鳴
雕弓桓王墓下沙草內彷彿地似遼東城馬行雲中
四蹄熱流影欲追飛隼滅歸來笑學曹景宗生擊黃
犗飲其血車橋泰娘雙翠蛾喚來尊前為我歌白日
欲沒奈愁何迴潭水綠春始波此中夜遊樂更多月
出東山白雲裏照見船中笛聲起驚鷗飛過片片輕
有似梅花落江水天峯最高明日登手接飛鳥攀危
藤龍門路黑不可上松風吹城岩中燈衆客欲歸我
不能更度前嶺綠峻嶒遠携茗器下相候喜有白首
楞伽僧館娃離宮已為寺香遲無人欲愁思醉題高
壁墨如鴉一半欹斜不成字夫差城南天下稀狂遊
累日忘却歸座中爭起勸我酒但道飲此無相違自
從飄零各江海故舊如今幾人在荒烟落日野鳥啼

寂寞青山頽亦改須知少年樂事偏當飲豈得言無
錢我今自筭須未老豪健已覺難如前去日已去不
可止來日方來猶可喜古來達士有名言只說人生
行樂耳

明皇乘燭夜遊圖

華胥樓頭日初墮紫衣催上官門鎖大家今夕燕西
園高裝銀盤百枝火海棠欲睡不得成紅粧照見殊
分明滿庭紫綵作春霧不知有月空中行新譜霓裳
試初按內使頻呼燒燭換知更宮女報銅籤歌舞休
催夜方半共言醉飲終此宵明日且免群臣朝只憂
風露漸欲冷妃子衣薄愁成嬌琵琶琵琶相追續白
日君心歡不足此時何暇化光明去照逃亡小家屋
姑蘇臺上長夜歌江都宮裏飛螢多一般行樂未知
極烽火忽至將如何可憐蜀道歸來客南內凄凉頭
盡白孤燈不照返覓人梧桐夜雨秋蕭瑟

黑河秋雨引賦趙王孫家琵琶蓋其名也

胡天夜裂天垂泣雲壓鷹依翻翅濕鬢玉醉影抱寒
驚墮殿嘈嘈箭鳴急紅冰淚落衰燈下倒卷河流入
絃鴻瘦駝卧噴歌鈴車朴胡陰沙鬼行野漢魂私語
鬢風淒都護營荒咽凍鞞蘭山水葉連愁起散入塞

門三萬里夢斷金蟾隔烟小青冢埋聲秋不曉

期張校理王著作徐記室遊帝阜

前身似是雲水僧餘習愛覓名山登寂伶帝阜在平地一立勢敵千峻嶒缺厓深深翳密葉歎石兀兀經危藤昔年無事恣幽賞拄杖叩門來屢曾風和聽竹移廣筆雲屋煨芋明高燈禪堂素壁醉題滿老衲喜客無嗔憎別來三載困塵土散落略盡同遊朋谷猿清叫烟霧隔宵夢欲往天膏膏幽懷鬱抱不得寫一月兩聲眠枕肱相親尚有北郭友材畫齊楚勳曹滕張君名駒稟神駿王子快鶻生鋒稜並淹客館校遺籍雲路萬里遠騫騰徐卿亦是瑚璉器遠役又欲行擔登明朝山鵲定鳴騫跬步可遊何不能一林一澗幽景在遙想與鵲無虧增朱櫻綠荀雖已過正愛夏木陰層層欲替此行况甚易婦有截酒魚新嘗出城不必借車馬已辨布靴青行滕吾儕雖窮自有樂相聚豈比蟲齋齋亂離撥棄且勿道願賦妙語留傳膳

廣陵孫孝子愛日堂

昔自中原兵甲動志士憂時久心痛千村殺戮鷄狗無骨肉誰家保相共楊州受禍聞寂深恃恃堅城鐵為甕城中義丁一百萬坐委溝谿不成用至今草長

鬪體臺月黑精靈尚哀慟君時負親獨巖匿何異網魚遂脫網遠道秋風舊索空長江暮雨孤帆重竭耒吾卿今十年孝友爭傳似張仲雖嗟故里未能歸却喜新堂還可奉盡歡唯啜小人羹致養寧須大官俸只愁老景若駸駸羲馭西馳疾飛鞚畫看花影頽遲移晚聽角聲驚早弄長繩未解繫飛鳥每計餘年憂且恐嗟余少已失庭闈宰木亂未無地種欲娛朝夕難再得誰惜流光去如夢自慙不及君慶多酒淡琴我空廢誦寸心猶願時早平重為河清作歌頌萬國同看化日長生能養親死能送

贈胡校書奎

我初遇子東海濱苧衫蕭帽凌風塵登城觀濤共歎息見者不識何如人歸時憶近看燈節孤舟夜過黃岡雪書來書往道加殮幾日相逢五年別再會之計何悠哉我未及去君能來秋風吹淺大湖水乘興上得吳王臺吳王臺前白楊柳西施去後吳娃醜四海同為此地人百壺獨買誰家酒更尋豪客作夜遊歎弄明月琵琶洲有愁為君亦蕩滌何况我輩元無愁醉中狂談君可想且共周旋莫歸去秋光已暮逼重陽好為黃花三日住

溫陵節婦行

泉州陳氏婦夫泛海溺死守志

妾家溫陵近南浦
嫁得良人業為賈
良人長年愛遠遊
不敢新粧映門戶
既寶運聞去百蠻
朝朝海上望青山
不仁無那蚊龍橫
漂沒孤舟不得還
君非淺河老狂父
波濤如山何不顧
尋屍便欲赴窮淵
膝下嬌兒誰與哺
十載空閨守寸心
滄溟水淺恨情深
願身不化石頭石
化作孤飛精衛禽

吞余左司沈別駕元夕會飲城南之作時在

園中

青帝行春氣初掃
雲馭餘陰苦難破
江頭碧草生未長
戰馬寒嘶斃殘壘
炊烟冷落雨中濕
隣屋時聞有啼緜
我愁鬱鬱但欲眠
案上詩書慵自課
却思去歲為無虞
元夕共歡人幾箇
高堂細聽落梅歌
手擘黃柑香噴座
客酬主勸總忘曉
看盡繁燈逐星墮
秊今照市但群蜂
樂事淒涼誰復作
故人念我有二子
省內即官府中佐
別離兩月不相逢
身佩弓刀徒戍邊
欲尋舊賞慰勞役
笑拂尊前且安坐
老兵折簡走相呼
謂我閉門無乃慵
黃昏遠就向城南
敢惜春衫凍泥沈
軍中有會異尋常
牛炙瓮肥酒卮大
胡奴帳下

出琵琶復拊銀箏與相和
燭殘未聽荒鷄啼絃斷
忽驚哀鴈過須臾顏熱起
叫嘯不記亂離仍轆轤更聲
折折繞旗門劍匣捲頭容
醉卧歸來又辱寄新詩錦
水滄腸珠落唾豪吟自欲繼
燕歌悲調豈將同楚些
覽之幾度感深情曲高和難
非懶惰我生無力本何用
衣食自來供馬磨維家如
曲假虛名正似南其不堪
歎君才於世俱可珍周賈
東遊抱奇貨艱危壯氣喜
彌激利器未施寧忍挫願
開原野多裝傷風雲呻吟
苦無那吾儕斯樂豈易得
應愧皇天恩獨荷明年此
夕會昇平把酒相邀更相賀

江上晚過隣鳩省花因憶南園舊遊

去年看花在城郭
今年看花在村落
花開依舊自芳菲
客思居然成寂寞
亂後城南花已空
廢園門鎖鳥聲中
翻憐此地春風在
暖水穿籬發幾叢
年時遊伴俱何處
祇有聞蜂隨繞樹
欲慰春愁無酒家
殘香細雨空歸去

兵後逢張孝廉醉

前年遠別君父子
遭亂相傳皆已死
今朝南陌忽逢君
為識人中語者似
君言使親渡海濤
欲避兵禍辭官曹
問閨僅得返鄉里
脫命羅罔真秋毫
問我胡為

亦憔悴十月孤城陷園內艱難兩地得俱全政荷皇
天憐我輩相看握手非偶然痛飲豈得愁無錢城中
故舊散欲盡君來使我忘憂情還思當年事未改車
馬紅塵浩如海等閒列第化秦灰試問主人誰復在
請君看此應感吁世間富貴皆空虛客遊且莫更彈
缺讀書歸臥先人廬

夜飲丁二侃宅聽琵琶

江月未出明星懸主人飲客夜不眠坐呼伶兒撥四
弦龍頭高撚玉軫圓轉闕未奏雙索先勞嘈咽切斷
復連澁如清溜溜凍泉細若綠樹吟秋蟬忽然繁急
何轟闐風沙滿把撒四筵鴈行驚起飛不聯浮雲落
葉俱綿綿一聲抹斷萬里烟夢入紫塞愁胡天問渠
怨恨有幾千口不能說指爲傳令人悵望思往年梁
園楚榭長周旋帷中曲宴羅綺鮮夜遣飛騎迎嬋娟
低鬟出拜絳燭前文炁香緜搭左肩曲項紫鳳抱半
偏楓香一調妙入玄好手正可羞紅蓮座間豪客皆
詞仙舉杯邀我賦短篇贈之醉寫蜀錦牋可當十萬
纏頭錢如今遠客江海邊欲聞炁音久無緣故人已
散陵谷遷生死流落俱堪憐今宵聽此真偶然顧影
憔悴非昔妍長河欲曙落遠川暫當歡娛反憂煎向

偶無言涕淚漣此身如在潯陽船

曉睡

野夫性慵朝不出弊簣蕭然掩閭室村深無客早敲
門睡覺長過半簷日林聲寂寂鳥鳴少窓影交交樹
掃密此時欹枕意方恬一任林風亂書牀昔年霜街
踏官鼓欲與群兒走爭疾如今只戀布衾溫悟後前
計應多失厨中黍熟呼未起妻子嗔嘲竟誰恤天能
容老此江邊無事長眠吾願畢

東池看芙蓉

江天搖落逢秋抄滿目殘荷與苦蓼東家喜有木芙蓉
容幾樹繁開依綠沼穠豔低將流水暎寒香遠透迴
風裊半愁霜露倚蕪葭老去徐娘猶窈窕天公似厭
秋冷淡故發芳葩媚清曉莫嗟不及見陽春車馬塵
埃相汙少吳玉宮廢斷行客湘女祠空掩啼鳥何如
此地獨來尋靜對嬋娟散憂情蘭舟雖無美人採日
暮孤吟自行繞明朝重到恐消寬零落紅雲波渺渺

謝廬山宋隱君寄惠所製墨

瓦篝自掃烟埃濕風雨空山杵聲急香爐峰前五粒
松燒成片玉玄香濃寄我團團未磨缺有如蝕盡天
邊月陶泓日暖水滿池雲氣忽起秋淋漓茅屋先寒

容心懼上有蛟龍欲飛去便思寫檄驚天驕夜磨楯
鼻水不銷又思作賦獻天子晚出洛陽價增紙我今
年少才不多兩事未能如墨何但學顛狂如醉旭頭
髮可濡秋未充

美人撲蝶圖

花枝揚揚蝶宛宛風多力薄飛難遠美人一見空傷
情舞衣春來綉不成乍過簾前尋不見却入深叢避
鶯燕一雙撲得和花落金粉香痕滿羅扇笑着真向
園中歸東家西家休亂飛

次韻周誼秀才對月見寄

空林鶴鳴草堂靜桂影亭亭月初正憐君獨卧對中
秋尊酒無人起相命夜深詩成遣寄我自訴窮愁
疾病嗟余比君愁更多舊感新憂來每併前年看月
綠著園賓客當筵一時盛自吹橫笛倚清歌痛飲不
知靴屨去年園中在北郭何異孤豚落深窰登樓
強欲攬清輝刀斗連營不堪聽今年旅寓向江渚暫
喜東南亂初定間來未厭戶張羅貧去唯愁室懸磬
牧兒耕叟共來往那得衣冠解相敬久居村野坐自
鄙銷盡豪華與狂興風塵無復舊時顏愧見相逢問
名姓朋友凋零江海空弟兄離隔關山迥良宵佳月

雖可賞羸影窓間竟誰並迢迢河轉漏初長城堞葉
鳴風稍勁此時倚壁自孤吟只有蛩聲與相應初疑
此月定非月應是人間照愁鏡還思人愁月豈知何
苦多憂損情性一生能幾見此月盛年若去尤難更
明宵圓景未便虧落盡夫容江色淨君能強起從我
歡共入空明恣遊泳直期枕藉向舟中不啻遙天垂
斗柄

高太史大全集卷之九

吳郡高啓季迪著

南州徐庸用理編

七言古體

姑蘇臺

金椎夜築西山土，催作高臺貯歌舞。文身澤國搆主

基，却笑仙人獨何苦。銅鋪玉檻成繁華，幻出峰頭一

片霞。望處直窮三百里，後時應廢幾千家。璠空曲路

迷，仙仗攀盡瑤梯繞。到上外繞雕龍宛，轉欄中施綉

鳳。葳蕤帳熏爐，長藝薜金香共道。千齡樂未央，茂苑

月來秋佩冷。洞庭雨過夏綃涼，當窓衆妓如仙女。揚

袂迎風欲輕舉，人從天上見。經過鳥向雲間驚，笑語

日暮橫塘花盡開。捲簾臺上望，王來宴舟初自觀。魚

返獵騎還從射鹿，迴從登不用持鉞。隊自列紅妝，侍

高會香傳羅帕進。黃柑縷切鸞刀供，玉繪燭光遠。落

太湖波，驚起魚龍出。浸多城上烏啼河漢轉，此時誰

問夜如何。管絃嘈嘈聒人耳，不聞兵來渡溪水。欲携

西子走登舟，醉倚畫欄嬌不起。瞑目無因到甬東，可

憐一炬綺羅空。獻楣竟墮讐人計，賜劍應孤諫士忠。

客來試問遠宮路，物色荒涼總非故。撲衣始信不虛

言清地荆榛，見零露當年爭奪苦。勞機却把江山付

落暉，聞說越王臺殿上如今亦有鶴鴒飛。

初入京寓天界西閣對辛夷花懷徐七記室

去年寺裏開辛夷，君來憶我會題詩。今年我來君已

去，思君還對花開時。飲尋花下君行迹，日暮空庭古

首碧。殷勤把酒問花枝，看過春風幾行客。

題高孝敬雲山畧

尚書生長臺下，慣識風沙草漫野。何由得見山水

鄉，烟嶺雲林遠。能寫平時四海作，宦遊高興最愛江

南。秋雲溪清晚刻溪，晚閑解狂戀。尋扁舟此中謝屐

曾經處，半是啼鴉接宿樹。斷橋旗下問農歸，遠寺鐘

邊訪僧去。風流一沒歲未遠，坐覓遺迹成前朝。何當

遍覓畫中景，聖恩已許從漁樵。

百花洲

吳王在時百花開，畫船載樂洲邊來。吳王去後百花

落，歌吹無聞洲寂寞。真花開花落，年年春前後。看花應

幾人，但見枝枝映流水。不知片片墮，什塵年來風雨

荒臺畔。日暮黃鸝腸欲斷，豈唯世少看花人。艇來此

地無花者。

前年吳門初解兵君別故國當西行有司臨門暮驅
發道路風雨啼猿嬰倉黃不敢送出郭執手暫立懷
憂驚我時雖幸脫鋒鏑亂後生事無堪營糈家江上
託地主閒園借得親鉏耕春朝起沐日照屋野卉雜
發鳴鸛鷓思君萬里不可見對此涕淚如盆傾有壺
當軒忍自酌有句在卷邀誰評走投北郭問消息一
客為我言分明君初隨例詣 闕下有

旨謫徒鍾離城費無囊金從無僕棄家獨去何惴惴
長淮粘來趣前渡牙眼怖客浮鼉鯨到州鞠躬謁太
守脫去官籍僑編氓城荒無屋寓來客旋乞廢地誅
逢刑異鄉何人恤同患喜有楊子兼徐卿日高破電
烟未起閉戶不絕我詩聲去年

聖思念逐客特賜杖拭加朝纓 勅君赴汴聽銓擢
路美舊驛猶千程沙河無雨夏雲熱茅蒿夾岍多蛟
姦舟中感癘得下泄月攪腸腹聞伊嚶荒途無藥相
救療伏枕兩旬幾殞生終藉神明佑吉士疾勢漸脫
身強輕一官署作新鄭簿捧檄已去詢田更我維歷
歷聽客語虛實未察憂難平初春

天子下明詔欲慕前史羅儒英非才亦辱使者召辭
謝不得來 南京日斜出局訪君舍草蒲陋巷春泥

晴入門小女識父友延拜學訴艱難情且云父意念
家遠新遣兩卒來相迎須臾出君寄我札上有秀句
如瓊環自陳前事願一一與容舊說無虧盈讀終呼
卒問彼士卒言幾年經戰爭河山蕭條縣雖小民少
奸許多淳誠春秋古稱鄒子國漆浦水活魴魚賴唯
兔咻草間走雄雉角角垂頭鳴谷深稀逢種田者
時有射戶樓山棚霜天赤棗收幾斛剝食可當江南
稅官來撫民務無事鞭挂壁上無敲榜寒廳吏散獨
坐嘯遠對嵩少當蒼楹聞之離抱頓舒豁如吸清露
醒朝醒便因卒還寄君語此邑小鮮聊試烹幸逢
昌朝勿自棄願更努力備嘉名吾 皇親手擁高蓀
洒掃六合氣塵清海中夷筐已入貢隴外戶版初未
呈大開明堂議禮樂學士濟濟登蓬瀛大廟冬蒸薦
朱瑟千畝春藉垂青絃用材不肯略陳賤鍊寸畫上
天官銜死君磊落抱奇器不異一鷄秋空橫豈容久
屈薄領下天道始塞終當考文章期君歸齋借閱
報政何時成

送林謨秀才東歸謁松江守

江城秋陰朝不暉落葉古巷人來稀林生何求乃過
我敗屐躡雨投閑扉自言少習澤宮射思侶眾士登

王叢風塵失路因漂轉我豈無志時其遠欲充材官
挽強弩關塞莫解窮城圍將從隱者服短褐霜露難
采荒山薇長年旅舍破氈冷坐厭蟋蟀愁伊威諸侯
得意盡輕容顧影竟傍何門依南津昨夜砧杵動風
來燭前驚攬衣家人倚戶望應久宿春未辨悲慙歸
今朝江帆偶東轉願借子語爲光輝嗟予亦坐窮作
崇讀書不出遭罵讒士無賢否貧者鄙此言信矣誰
云非囊乏黃金可揮贈有詩豈救君腸飢雲間使君
本儒者貴顯尚肯矜寒微倘開深池養病鶴翼成待
看摩天飛

玄武門觀布圍

目爇燼燼卧深園羽林獵士初擒馭腥風一嘯猶辟
人况在空山道中見莫憶橫行藜藿間且隨玄豹守
天關垂頭食肉嗟何補漢家持軍乃真布

美人摘阮圖歌

圓槽象月脩寒玉暗貯宮商滿空腹美人和恨抱秋
風偷寫琴中舞鸞曲傾鬟低黛幾娉婷夢約湘娥倚
竹聽滴盡冰盤老蛟泪阿咸帳底醉初醒梧桐落翠
菱蘭紫仙澗流雲含王子甲屏難障夜深寒恐踏驚
鴻忽飛起不識人間出塞聲瑤臺別有斷腸情調終

人去哀絃歌掛樹烏啼滿山月
滿山月一作墜斜月

香水溪

粉痕凝水春溶溶暖香流出銅溝宮月明曾照美人
浴影與荷花相間紅玉飢羞露誰能見只有鶯鶯窺
半面絳綃圍掩法新涼歸卧芙蓉池上殿空洗鉛妝
不洗妖坐傾人國幾良宵驪山更有湯泉在千古愁
冤一種銷

贈丘老師

長春之孫自仙骨袖有蟠桃食遺核平生不學燒汞
方嗤視黃金等何物滿城誰識舊庚柴白髮人中似
鶴長時上高樓惟獨醉榴皮書破壁塵香

送許先生歸越

天子下詔徵賢良多士競逐風雲翔先生亦隨使者
起闕下再拜陳封章自稱前朝老逸士白髮已短材
非長群龍在廷翊昌運疲蹇豈足追騰驥乞還山林
養餘齒歌頌

聖德傳無疆近臣上 殿爲陳請 天語特許歸其

卿是時海國風雨涼道士庄下初栽秧故山農事不
可緩歸興候與高帆揚從容進退遂所願

帝恩甚大誰能量嗟余相逢恨苦晚忽去未免私心

傷明朝相憶望於越江水東逝何洋洋

蔡經宅

昆侖主者王方平身騎黃麟朝紫京舉手長辭漢公
 卿得道不願世上名往來隱玄與朱明洞中各有白
 玉城絳衣游空擁幢旌三山五嶽自按行冷風吹動
 天樂鳴璫蕭琅璈和鸞笙羽衛蹙踏山海崩龍車鶴
 馭紛相迎嘯呼神官走吏兵矯魅魍魎且驚暫來
 經家駐雲程人馬不見但有聲虎頭筆囊佩蒼精神
 光赫然照軒檻授以至言可長生凡骨已作蟬蛻輕
 麻姑來會尋仙盟芳姿娉婷似飛璫言從昔年宴蓬
 瀛又見弱水三淺清瓜可爬背念始萌仙意已識遭
 苔榜餘杭阿燒酒罷傾攝景忽去烟雲橫家人悲望
 空惻惻柴田回首幾變更神僊在岳每自呈凡夫不
 識等瞽育丹元有田不解耕但愛狗苟還蠅營榮華
 未滿咎責盈忽化厲鬼歸荒塋金丹可學道可成木
 鑽石盤貴精誠誰能自按水火坑飛游往來瑤樹英
 千載或有歸來情

獨遊山中憶周記室砥

借居水北隣雲岩醒遊醉卧月滿三空山孤愁似放
 逐踐蛇衝帝窮幽探綠梯上窺萬仞壁垂綆下汲千

丈潭幽蘿翳壑變朝晦恠并發澗留春酣青山識我
 豈生客曾與周子來聯驂是時秋高鶴聲厲霜降兩
 嶂總收耕飯餘洗足上堂坐手揮談麈風毯毯如今
 故人亦遠去帆葉暮落吳江南斷崖蒼蘚漫蒼刻往
 臺追想情何堪巴僧不厭客屢至篝燈夜禪同一龕
 風回忽洒石門雨日出盡消溪布嵐乃知山水有深
 趣天意獨許窮人諸我今豈是慕高隱非才濫進能
 無慙業綠種種去畧盡惟有佳句猶相就便求安心
 向佛祖不待婚嫁女與男

送證上人住持道場

訢公昔年住寶坊龍象蹴踏騰毫芒袈裟曾侍玉座
 傍萬眾闡聽講仁王弟子如雲來四方朝鐘暮鼓鳴
 高堂西歸葱嶺今幾霜鉢傳曇師道彌昌麓林主教
 遇聖皇紫衣朝 關隨班行上人繼吐三柔芳衲間
 長繫摩尼菴人間萬念俱已忘獨好遊戲談文章我
 采京師寄禪房每邀看月開脩廊手橫繩拂坐繩床
 竹間風吹煮茗香侍僮觸屏睡欲僵高殿宿鳥驚琅
 璫詩成金磬韵尚揚清才未必慙支陽有時夜剪圍
 韭嘗燈懸西齋雨浪浪人生聚散不可常翩然東遊
 主道場道場仍在雲水鄉碧澗堂前去路長江湖寒

綸蛟蜃藏楓柏正赤橙柑黃烟銷日出聞漁柳洲渚
宛轉山低昂蕭然瓶錫隨經囊留宿肯戀林中乘兵
餘慕嗟梵宇荒勝景未逐樓臺亡寺門無人閉夕陽
芋栗收作山中粮好說千偈恢禪網麾片佛祖誰敢
當我方無用縻太倉叨逐劍珮趨 明允醉詩欲覓
玄真狂懷

贈墨翁沈象泉

南朝墨法稱奚家相國謬費盈連車堆金欲沽世已
少至今好事成咨嗟潘生後出亦奇絕峨眉僊子嘗
相誇紫殿曾供寫飛出玉堂每用書官麻人間留藏
敢輕試傳玩正比雲龍茶沈翁遠得二子妙珙璧自
美誰能瑕徂徠老節燒欲盡萬杆夜搗玄霜華錦囊
贈我忽在几光恠迸屋驚早鴉一餅團團未磨缺似
月食盡逢妖姦此物宜歸大手筆濡染竹帛垂無涯
上當紀頌聖功德下可論載臣忠邪我今才薄况病
退破硯久棄塵生窪一朝得此復可用慚註魚豕箋
虫蝦摩挲忽動揮酒與聊吟險句追島又高堂淋漓
為君掃醉汗奮賜官袍花

聖姑廟

湖心湧出鼇頭山白波翠島非人寰清虛宜作水仙
府麟堂荷星居其間洲都群靈孰為主烟鬢儻然一
神女柔姿誰敢狎相親咲叱鼉龍起雷雨玉骨蟬輕
蛻幾秋世緣已斷靜無愁采蘭每約湘濱會拾翠時
陪漢上游水禽翔鳴衛芝蓋長在蒼茫香冥外鮫人
獻綃裁作衣螺女供珠綴為佩花落間祠謝古春蔥
慵瑤席掩香塵空山夜夜星河遠芳渚年年蘅杜新
霞舒霧捲凝光彩咲語無聞復誰待冷風幾度引舟
迴宛似蓬萊隔烟海徠叫楓林魚躍波桂旗翻翠幕
寒多女巫竹望飛帑度獨奏空戾引曼歌掛觴奠罷
沉玄壁鳥沒遙天湛空碧遺情不結楚臺雲世人何
處尋踪跡

送王孝廉至京省其父待制後歸金華

君來金陵自金華遠道犖驅行車空山北風正多
雪歲晚何事穿泥沙君言省覲敢辭吾况是日下非
天涯問安已畢起稱壽白門酒香還可賒明燈客窓
共夜語便覺春意迴寒槎子亦叨

思在京國早踏街鼓門初過日斜歸來就空扉索寞
不異技林鴉家人千里望未至虛聽鶯鶯鳴啞啞羨
君父子此相見頓起歡笑忘咨嗟異鄉逢人即可樂

况尔骨肉誰能加汝翁文章擅當世片語落紙爭傳
誇身登昌朝列侍從日曳珮玉趨南衙捧函當 啟
曉進史乘燭鎖院宵書麻觀君才氣已略似青海異
種多駱駝絲綸便可令世掌胡為趣別東還家阿婆
在堂待調膳計日敢使歸期差往來兩地慰親念如
君孝意誠堪嘉勞勞亭下冬日短江水未解魚難又
送君揮手忽已遠烏巾獵獵風中斜重闌題拜想無
恙故園正見開梅花

淮南張架閣家舊有樓在儀鑾江上經兵燹
已廢與予會吳中乞追賦之

秋風嘗歌遠遊篇樓中舉手招飛仙山奔海瀉盡供
覽逸思每出孤鴻前雕欄一別應非昨幾度淮南桂
花落酒酣却作望鄉人那得東歸似黃鶴風景如今
總厭看客愁何處更凭欄欲問日邊知遠近浮雲回
首蔽長安

石崇墓

料須欲怒珊瑚折步障圍香錦雲熱真珠換妾勝驚
鴻笑踏香塵如踏空酒闌金谷鶯花醉家逐樓前舞
裙墜財多買得東市愁羅綺散盡餘荒丘猶憐白首
同歸者坐伴遊魂楓樹下

題宋元暉雲山圖

海岳老仙非畫工自有丘壑藏胸中大兒揮酒亦莫
比妙趣政足傳家風敷文閣下書圍淨夢入空山覺
衣冷起招綠筆寫幽踪一片飛來楚雲影彷彿三湘
與九疑翠峰猶抹二娥眉水生江上鴻歸後樹暗沙
頭春去時蒼蒼速渡連平麓烟火參差幾家屋林深
谷靜斷行人惟有禽聲啄枯木偶向高齋玩此圖斷
縑猶費千金沽自緣絕筆人間少如此雲山何處無

穆陵行

永穆陵宋理宗陵也在會稽元至元初西
僧楊發輦真住請發宋諸陵許之既取其
殉寶復以理宗頂骨為飲器後藉入官以
賜帝師 天兵克元 詔求得之命有司
歸壘焉

樓船載國沉海水金槌畫入三泉裏空中玉馬不聞
嘶日暮寢園秋色起魚燈夜滅隱戶開弓劍已出宮
幽臺髡胡暗識寶氣盡六陵松栢悲風來玉願深注
駝酥酒誤比戎王月支首百年帝魄泣穹廡醉骨飲
冤愁不朽幸逢中國 真龍飛一函雨露江南歸
環珮重遊故山月冬青樹死遺民非 世傳有土嘗竊諸帝骨埋屏處

為識青 千秋誰解銅南山世運興亡覆掌間起輦谷
前馬蹄散白草無人洗交飯

題朱氏梅雪軒

石城山居梅萬塢冒雪曾來扣僧戶爛然如見會群
妃白鳳繽紛下瑤圃數片輕吹著鬢華乍看是雪又
疑花迷魂亂眼春如海那辨南枝映竹斜獨披鶴氅
穿林去棟歷寒梢應幾樹聽響方知夜酒時聞香始
識繁開處回首春風憶舊遊尋歸路隔羅浮年未
驅皆無詩思醉踏塵埃空自愁聞道君家溪上下五
藥瓊英巧相亞履跡誰來東郭朝笛聲不起南樓夜
翠羽驚啼莫怨猜破寒宜共一尊開雪晴花發須相
記我亦扁舟乘興來

和衍上人觀梅

藍輿偶出青山郭寒梅初晴凍雲薄梅花一路幾千
株半發園林半村落夜窓轉曙鷄欲驚寒谷回春蝶
應覺浩蕩才迷醉客魂嬋娟更伴幽人樂我來如蝶
東西飛不敢題詩愁筆閑歸來落月照書屋重覓餘
馨夢難托高僧已澄法眼觀也愛一枝供鉢寔便托
藜杖敲竹扉遮莫人嗔貴客惡風雨休嗟已亂飄世
間何物長如昨

天閑青驄赤驃二馬歌

漢家諸將開經濟列宿儲精降人世天遣同成一代
功亦有房星化駿驥青驄剪鬣高作花赤驃灑汗微
成霞人間何處得奇種恍惚西至踰流沙年來百戰
從天子曾逐烏驄到江死不慙飽食玉山禾天
既時清少鞭使周王八駿去不來唐帝六馬應九材
何如二龍總起絕蹤踏四海荆榛開國官雙鞬頻迴
顧萬里長楸恐驚驚嘶處秋生關閣風浴時曉動昆
明霧一疋前牽一疋騎馳道每出隨 龍旗慙閒步
穩識上意不敢捏頓黃金羈昨看 巡狩還都邑鏡
吹聲催移伏急羽林萬騎從如雲追逐飛塵豈能及
嗟哉此馬不異人乘時際遇益有神請看垂耳控車
者那得昂藏八尺身

題李德新中宗射鹿圖

緒袍玉帶虬鬚怒人如真龍馬如帝英風猶似天可
汗百信昏孱困常武上林草綠聞呦呦飛鞞壁歷捕
長楸畫旗圍合晚猶獵後庭雙陸誰行籌追遊不記
房陵辱五王謫來勢猶獨空誇大羽發無虛不射妖
狐射生鹿畫圖令人生感嗟天寶回首飄胡沙神孫
早解習祖藝不遣銜出宮中花

題趙希遠萬松金闕岳

長松掀髯若群龍下繞宮闕雲千重鳳凰山頭望前
 殿翠濤正涌金芙蓉海門日出潮初上白鶴飛未近
 仙掌百官候綴紫宸班露滴朝衣氣森爽漢宮揚柳
 唐宮花容易零落空繁華何如可獻至尊壽後蒼美
 似安期瓜鑿與因戀湖山好接閣清陰勝蓬島不知
 風雨汴陵前膚卒新樵幾株倒當日榻前初進圖黃
 金趣賜聞傳呼何年流落在人世父老猶看思舊都
 客行近過吳山下落葉空林惟敗瓦豈無畫史似前
 人秋色淒涼不堪寫

芥舟詩

估客海上誇乘風大輪遠憂龍魚宮帆如乘雲落天
 外不假羽翼行虛空驚濤拍山撼難動安卧每到扶
 桑紅回頭却笑垂釣子斷瀟老葑留孤蓬鳥知達人
 解物表坐視大塊舟航同風輪晝夜不停轉元氣下
 載浮鴻濛泰山亦與一塵等何以巨細論唯君今
 齋居何苦小自比置芥坳堂中將身便欲入無間險
 語乍出驚愚蒙我聞懸珠納萬象此事尚覺勞神功
 萬千毫髮盡亦有幻相欲別誰能窮君行莫鼓萬里
 舵天游閉戶隨西東何須更待積水厚區區往問南

華翁

題周遜學天香深處卷

仙芬染骨濃無跡秋入畫堂薰不隔夢尋老蟾烟霧
 迷碎落金蟲夜愁寂素娥舊我無兩龍萬古散吹秋
 清空熏羅不襲象龍火人倚畫欄清影中蕙蘭暗泣
 幽馨歌只有瑤芳占涼月

同謝國史遊鍾山逢鐵冠先生

日日城中望鐘山孤塔縹緲峰孱顏山靈朝我不一
 到但命俗駕越塵闌

聖恩今朝許休沐得與謝客同躋攀出郭未至景已
 好松風一派連清灣空林無人遇釋子知有曲徑通
 禪閣舉頭見寺去尚速鍾磬響落浮雲間登高不知
 已幾里但佐力盡愁辛艱衆山雜還總在下如推劍
 珮趨朝班時當嚴冬雪始霽古木寒瘦泉流慳梁僧
 遺塞卧殘碣宋帝廢塚埋深管六朝陳蹟不可問但
 見石老毒苔頽豪華歎盡形勝在劫火幾度燒空鼓
 鐵冠先生有遁者往往人見騎黃斑相迎為指幽絕
 處淪茗留坐聽瀉瀨莫嫌痴客暮未返日墮江水鴉
 飛還欲營一遊豈易得長來不比山僧閑

洞庭山

朝登西巖望太湖青天在水飛雲孤洞庭縹緲兩峰
出正似碧海浮方壺嘗聞此山古靈壤蛇席絕跡歎
樵夫濤聲半夜恐竟夢石氣五月寒肌膚居人彷彿
武陵客戶種橋柚收為租高風欲起沙鳥避明月未
出霜猿呼中有林屋仙所都銀房石室開金鋪羅浮
峨嵋五通達別有路往非人途天后每降龍垂胡神
缸忽響驚棲颺自懸日月照洞内古木陰蔽空朝脯
風吹白芝晚易老雲帶紫泉秋不枯靈威丈人亦僊
徒深入探得函中符玄衣使者不暇惜欲使出極蒼
生蘇後來好事多繼往石壁篆刻猶堪摹千年玉鼠
化蝙蝠下撲炬火如飛烏玄閣拒閉誰復到似恠衣
上腥塵汗勿言神仙事恍惚靈蹟具在良非誣我生
擾擾胡為乎坐見白髮生頭願久欲尋真未能去局
束世故緣妻孥何當臨湖借漁艇拍浪徑渡先雙鳧
獨攀幽險不用扶身佩五岳真形圖夜登天壇掃落
葉自取薪水供丹爐此身願作仙家奴不知僊人肯
許魚狂語醉發應盧胡

喜家人至 京

家人遠來如我歸骨肉已是故鄉非妻羸女病想行
苦塵土覆面風吹衣裝車日暮解牛軛呼燭買酒敲

隣扉客懷乍見不得語一室相對情依依憶昨初蒙
使者徵遠別田舍來 京畿小臣微賤等蟻蚤

召對上 殿瞻

天威詔從太史校金匱每旦珥筆趨彤闈春遊禁苑
侍 鶴駕冬祀泰時隨 龍旂有時青坊坐陪講宮
壺滿賜霑 恩輝草茅被寵已踰分不才寧免誚與
譏海鳥那知享鍾鼓野馬終俱遭籠籠江湖浩蕩故
山遠歸夢每逐鴻南飛常時出院就空館僅僕愁對
語者稀知君在舍亦岑寂歲暮雨雪吟蟬蟻今宵得
見信可樂如獲美饌飽我飢但憂兄嫂尚遠隔言笑
未了仍歎歎何當乞還棄手版重理吳榜尋漁磯門
前親種一頃稻婢供井臼妻鳴機秋來租稅送縣畢
秫酒可醉鷄豚肥誰言此碩未易遂
聖澤甚沛寧終違

題茅叟夏山過雨圖

前山冥冥雲欲開後山隱隱猶聞雷江南六月風雨
過樹暗不見平陽臺奔湍衝斷石橋路下瀉谷口相
喧喧陰開林壑鬼神去氣濕古洞蛟龍回人家出門
看新霽泥封墜果多楊梅漁樵欲歸謂已曠返照石
壁蟬鳴哀山中此景誰解寫茅翁素有丹青才新圖

一片似海岳高堂未展涼先來嗟余久逐揮汗客席
帽障日趨黃埃問翁幾秋東逝去如此畫圖安在哉

象

海山巨獸堪乘戰番使前年遠來獻寶纒絡錦擔
垂拜舞如人向金殿仙仗時巡出鳳城車輿頻駕不
魯驚有牙莫畏焚軀禍天子深仁愛尔生

太湖石

沒人來石山根淵技身下試飢蛟涎馮夷不解護潛
寶幾片捧出如青蓮寒姿本是湖水骨波濤漱擊應
千年物疑鬼恠離洞府珊瑚鈇網相鈎連嵌空突兀
多異態雲吐夏浦芝生田龍鱗含兩晚猶潤豹質隱
霧朝常鮮清音叩罷磬韻遠微靛洗出珠窩圓坐移
各岫置庭砌日照彷彿生紫烟三峯削成泰華掌一
穴透入仇池天醉中時到倚蒼藓秋風冷逼吟詩肩
洛陽園墅汗宮苑當時駢列誇奇妍黃羅封蓋素氈
累萬里貢餉勞車船奢游事歌家園廢盡仆荆棘荒
地邊人生嗜此亦可笑有身豈得如石堅百年零落
竟誰空空品甲乙煩題鐫又嗟此石何獻巧自名鑿
取虧天全不知頑礦世所棄滿山長作牛羊眠

北江觀猿

黑衣公子何婀娜飛桂枯梢不愁墮幾迴呼下白雲
間拋賜曾嘗內園果家鄉何處是巴西回首烟蘿望
欲迷料得孤舟江上客月明少聽一聲啼

會客成均汲玉兔泉煮茗諸君聯句不就因
戲呈宋學士

白兔如嫌桂宮冷走入杏花壇下井嫦娥無伴每相
尋水底亭亭落孤影會搗秋風玉臼霜至今泉味帶
天香玉堂仙翁欲飲客鹿盧夜半響空廊齋燈明滅
茶煙裏醉竟忽醒松風起只愁詩就失弥明殘雪滿
庭寒似水

謝友人惠梵羅被歌

蠻工細擘水蠶羅織得長衾謝縫剪蒙茸柳絮不愁
吹鋪壓高床夜香軟朔風入闌凋白榆塞寒此物時
當湏明燈熾炭夕宴罷薦寢宜共紅氍毹海客揚帆
遊萬里得自崑崙國中市歸來遣我見遠情重似鴛
鴦合惟綺詩人鶴骨欺霜稜曾直禁署映青綾自從
身退得閑卧只愛擁絨同山僧今朝得此何奇絕展
覆不憂兒踏裂便思清夢伴梅花靜掩寒窓聽風雪
越羅蜀錦安可常洞房美女謾熏香誰知一幅春雲
煖即是溫柔堪老鄉

偃松行

龍門西周魏公祠祠前有松多古枝長身蜿蜒橫數
畝巨石作枕相撐撐春泥半封朽死骨凍蘚盡裂皺
生皮無心昂聳上霄漢偃仰獨向荒山垂壑雷破岳
撼不動千載一夢醒何遲政如卧龍未起日深意有
待風雲期太湖月出照夜魄天峯雪積埋寒姿濤聲
時吼若軒息野老驚起山僧疑左伸右屈多異態天
自出巧非人為畫師安能把筆寫樵子豈敢操斤窺
柱陵枯柵已憔悴蜀相老柏非瑰奇何如此樹惟且
壽呵衛定想煩靈祇不知已閱幾人代游客過盡今
存誰明堂屢興不見取得全正愛同支離我嘗來觀
忍遽反醉坐其上高吟詩葛陂笳竹亦騰化神物終
去可久羈何當一叱使飛起載我萬里游天池他年
還訪舊城郭正是白鶴歸來時

白馬澗

白馬何不居天閑乃在古寺長松間奇姿不受世羈
絡遠自竺國馱經還澗邊飲罷寒雲起恍惚化龍跳
入水空山夜雨不聞嘶埋沒蹄痕紫苔裏高僧一去
今幾年世上神駿還誰憐莫令老逐風塵子憔悴哀
鳴涂路邊

贈治冠梁生乞作高子羔舊樣

野人散髮秋半稀小冠宜著稱短衣清時無能耻
恩澤朝簪乍脫歸田扉進賢我我在頭上此物須當
付卿相閉門方欲誦詩書煩君為製依吾樣

賦得烏衣巷送趙丞

差差舞羽多光彩知國初辭度雲海江南門巷有題
名識得當年故巢在春風三月滿京華肯入尋常
百姓家隨鶯已度龍池柳引蝶還穿鳳花花綠燕
芳草長千渚樓閣初晴社前雨江邊今日有離宮留
人看上墻頭語

宿蔡村夜起

四更鷄叫七星爛獨起開門候天旦月掛愁道人影
低風驚夢裏烏群散孤舟發婦寒自泣破屋老農貧
屢歎早冷欲發未達安客路飄零正多難

客舍雨中聽江柳吹簫

客中久不聞絲竹此夕逢君吹紫玉斷後哀厲總驚
啼我亦無端淚相續數聲嫋嫋復嗚嗚散入寒雲細
欲無愁望洞庭空落木夢遊秦苑總荒蕪曲中只許
君心苦不道人聽更悽楚闕山燈下歎羈臣江浦舟
中泣發婦憶昨閨門費酒費玉人邀坐弄參差彩霞

高太史大全集卷之十

吳郡高啓季迪著

南州徐庸用理編

題董元戰沙龍

人間滴罷天歌水歸護玄珠卧沙裏空潭白日不聞
雷雲霧俄隨轉身起誰言北苑筆意精頭角破屋將
飛騰細看圖畫何須恐曾謁真龍遊太清

松隱為愛叔能賦

江邊柳樹溪邊花晉廢士宅秦人家秋風忽來春雨
過坐看哀落俱堪嗟山中相依歲年久羨君獨結蒼
髯叟短褐長鏡不辭畊茯苓作食花為酒我今身似
浮雲間正合著在長林間明朝倘許同棲泊便擬飛
隨白鶴還

蕭山尹明府吳越兩山亭

憶昔看山吳越遊酒酣鼓棹江中流左招舞鳳來百
里右顧卧龍橫半州崢嶸兩勢不相下氛翳淨掃當
高秋文身鳥喙昔分處有國本是名諸侯區區仁暴
固無異朝吞暮併山應羞不知千載竟誰主伯氣倏
與飛煙收邇來此地有兵甲風景頗似當年愁黃雲
蔽天道路遠我欲再尋應莫由聞君作亭壓此境坐

深院花開處明月高樓鶴去時如今忽在他鄉外風
雨寒窗兩憔悴恨無百斛金陵春同上鳳凰臺上醉
始知嶰谷枯篁枝中有人間無限悲願君袖歸挂高
壁莫更相逢容易吹

午日有懷彥正幼文

去年歸鄉過重午柳雨莎風滿南浦白蓮閣上與君
吟遙憶徐君隔淮楚今年風雨又端陽却在秦淮憶
故鄉徐君已歸若相見應言前事一凄涼客愁欲斷
翻長映人事推遷古難料明年未省又何之一盃且
聽江南調

獲衆勝非窮搜江長不隔飛鳥渡峯多欲障斜陽留
廢典自古屬造化登臨未須生百憂但當矯首望東
海一杯咲舉邀浮丘

虎丘行次朱賞靜見寄韻

我詩我隱西郭西讀書坐覺長身低出門到寺繞數
里野水沙竹生秋輝恨無酒舫漾落日百錢行自懸
青藜時危未卜久安宅幸遇勝地須扳躋山中况逢
暑雨過枇杷樹高陰滿池興未即遊興盡返迎送豈
粟山僧知兩崖石根下挿水綠藤倒拂風生澗空堂
朝鼓起龍蟄高塔夜鈴驚鶻棲人生在世本爲客隨
意且留何必歸丘陵莫嘆今日異城郭更恐佗年非
蒼茫萬事孰可問孤鳥已沒空煙霽念君不遊何所
爲作字寄我如張芝真娘有靈應大笑把酒豈不延
題詩秋風今朝動江浦掛席正是當年期與君一吊
典廢迹荒臺古樹聞烏啼

題美人對鏡圖

曉院鹿盧鳴露井玉人夢斷梨雲冷起開粧閣笑窺
奩月裏分明見娥影自對猶憐况主家春風一面斷
腸花何由鑄入青銅內不使秋霜老髮華

贈貴墨陶叟

龍井老人稱墨仙有家近在荆溪邊鐵臼秋鳴竹屋
雨瓦溝春掃桐窓煙玄王初成敢輕用萬里豹囊曾
入貢日長小致試烏絲光迸驪珠欲浮動世間潘李
今已無黃金滿篋爭來沽詞臣供寫上林賦畫史藉
作瀛洲畵文物年來頽凋弊喪亂誰言少知貴便酒
從子乞雙螺醉草撤書磨楮鼻

鳳臺三益畵

元集賢院待制馮海粟公自號瀛洲客嘗
被斥遊金陵鳳凰臺作詩吊李謫仙好事
者爲作鳳凰臺遊畵近有詩示求題賦此
塞之

謫仙昔作供奉臣詩語不合妃子嗔鑿坡無地容侍
直錦袍來醉金陵春金陵臺高鳳凰去西望長安竟
何處江聲空打石城潮山色猶橫歷陽樹騎鯨一去
五百秋花草滿逕埋春愁瀛洲老客綠玉杖咲領賓
客還來遊才氣風流頗同調曾入金門待明詔當年
流落不自悲却問前人欲相弔可憐二子遭清時放
逐江海空題詩類有高名足難朽何用粉墨他年垂
夕陽欄檻登臨後誰復來遊酌盃酒履痕寤冥隱蒼
苔棲烏啼滿臺前柳

送張負外從軍越上

鷓鴣啼霜海城白誰掃行車出南陌
 刀頭裝得顏酬思知是狂遊廣州客
 擊筑悲歌斗酒前又從飛將去
 臨邊暮中草撒風生筆馬上吟詩
 月在鞦韆秋聲萬里隨
 征鴈南北長江竟誰限
 明朝若上越王臺應有中
 原陸沉嘆

詠雪禁體次徐文學韻

邊城雪埋深沒籜風旋餘花吹酒
 盃樂人研虜渡米河直指弯弓不
 能滿我方高枕聽蕭瑟却喜今年瘴
 全浣寒添柳院覺春遲明透竹窓
 驚夜短未成豪飲圍翠袖且辨清
 吟呵象管舖庭擁路掃難開三日不
 消知待伴翻疑塞北雲正冷可信
 江南地先暖愁封小窰僵蟄虫驚
 折危柯殞葉外林中樵絕暮無煙
 野外獵來晨有唾趙女依佛舞態
 斜郢人寂寞歌聲斷此時自嘆少
 清歡月下闌門誰解款山陰老客
 雖苦病放曠猶能類中散長鬢踏
 雪送詩筒白戰令嚴烏敢緩開
 簾尚恨不同賞醉看帽歌仍裊
 袒祇期明日有晴嫩遠訪梅花須
 勿懶

送曹生歸新安山中

黃山西來九華連岩洞翁忽通雲
 煙白鶴嶺下煉丹

處瑤草獨秀今千年三十六峯在青
 天仰面歷數舉馬鞭高林雜樹多未
 識風雨一過俱惹羊山深何物尤可
 憐秋禽幽鳴巧如絃路迴澗阻似無
 地中有詩藥千家田雲間鷄犬隔流
 水居人彷彿皆神仙我欲窮遊久無
 緣羨君忽去尋歸船猿聲兩岬溪樂
 曲白沙明月相洄泐到時西峰草堂
 前應有携酒來華顛山人不喜說朝
 市但話久別情依然塵埃舊褐便可
 脫濯費十斛山中泉為予淨掃石上
 葉早晚有意來高眠

題陳節婦

節婦姓孫即人陳已久之妻也
 夫死節婦守志其孫幼遜求題此

嬌兒嘯語羅幃暮銀燭摧光夜香
 度狂風忽起海東頭吹斷蘭州去
 時路去時豈惜千金軀煙濤竟沒
 珊瑚樹精衛冤深水更深身小天
 高向誰訴寂寞塵塵掩鏡光可憐
 不復照晨粧塔前莫剪青青草生
 死終身不下堂堂中素履空時祭
 額有孤兒拜虛位白日哀思眼不
 乾夜枕還流夢中淚妾本孤桐斷
 作琴一絃只作一絃音逢人不奏
 鳳凰曲別鶴離鸞夜夜心

晚步西郊見鷓鴣群飛

平煙漠漠天蒼蒼牛羊不牧野草
 黃鷓鴣東來高作行晴空忽墮數
 點霜紫塞碧海遙相望下視鳧鴨
 愁

波塘書生見此心欲狂便思呼鵲上馬馳鷓鴣之裘
自倒披箭聲絃絃鳴餓鷓遠翻正落雙參差仰空拍
手誇絕奇豪氣服校并州兒也勝閉門坐誅詩

次韻揚孟載早春見寄

雪後西園非初剪流澌晚動春塘淺閉門有客抱深
愁久不題詩硯生蘚風塵健兒誇得意獨生寂寥誰
所遣應緣少學與時違不習弓刀誦文典城中勿責
市門靜好事猶能具盃饌琴堂朝夕共清歡舉白頻
浮不容免鈴騶已遊賓客醉深夜垣扉罷宿健一燈
留照對床談涕鼎松聲煮綠葍五更上馬子先去權
被獨眠窓日昃起聞啼鳥忽興發欲往江邊雲隔嶽
人家舊燕盡巢林草滿長洲絕遊鞦春耕咫尺阻歸
計野水自流閑會吠吾鄉繁華天下稀花柳村村隨
步轉久聞離亂今始見煙火高低變烽燹登臨吹笛
散群羌此事空嗟千古鮮朝來風雨况凄黯雨濕城
頭旗不展隣里銜泥備役夫縣官不召伶瘦喘安居
且復俟時寧出豈無能非退卷范庄紅杏幾株在好
待開時同折梅對花憂患不須言刺喚一盃供脚軟

鹿

日暖呦呦草際鳴養馴未省見人驚雲山別却嘶芝

侶未向朱闌花下行舊毛雪白新葍綠曾在宜春苑
中畜幾人逐走向中原輸與吾皇稱疾足

倒掛

綠衣小鳳啼愁羅瘦影翻懸挂枝下芙蓉帳裏篆消
時鮮斂餘香散中夜鐘鼓迢迢鎖禁門宵衣未得奉
明恩五更香冷羅浮月想憶梅花應斷魂

思夫山

江上曾看望夫石湖中望見憶夫山夫君好采山中
藥獨得長生竟不還不似蕭郎與秦女乘鸞同去彩
雲間

題陶生蒸寄周記室

馬頭交語臨長陌我手持杯君揖策官槐風起咽秋
蟬日暮偏傷遠行客故鄉故人離別多過江相見問
如何軍中莫嘆書生怯還有能當曳落河

菜邁爲余唐卿賦

柱桐里中君始歸菜花滿園黃蜂飛桔槔倚樹長不
用江南雨多山土肥方畦獨逸者新綠晚食何須尚
思肉翠縷登盤春薤香金釵出盎冬菹熱我家亦在
葍菰鄉秋風便應題共嘗潮州司馬成何事回首空
愁足萬羊

詠苑中泰吉了

不獨能言異九鳥最愛佳名呼吉了雕籠幾度學鷄
鳴驚起煙花六宮曉 駕來別院未知迎先聽遙呼
萬歲聲頌把春風一杯酒從今莫聽上林鶯

苦寒書江上主人壁間

慘節欲盡却原空北風五日吹沙蓬客子東遊骨肉
速主人賴有江邊翁青燈白酒同傾瀉醉擁布衾茅
屋下中宵不敢愁苦寒猶有窮年遠行者

聽南簾陳協律彈楚歌

我聞楚客彈楚聲初絃一揮遶馬驚鳴咽哀音動寒
月正如歌發漢軍營營中一曲還漸理想見彷徨帳
中起美人掩泣壯士悲寶劍無光黯秋水淒涼委弄
情欲終應憐歸騎阻江東蓋世英雄竟如此遺調空
留感人耳四座相逢今夜聽霜風忽來庭樹零無言
有愁俱酒醒

送張進士會試

國家文治今百年多士商賈皆知天南宮生試二三
策能使海內無遺賢院門晨開官燭爛白袍鶴立人
三千上談禮樂祖姬孔下議制度輕讐玄臨軒曾看
宰相賀雲瑞盡見當臚傳者花戎騎大僕馬錫宴每

給司農錢登朝出牧知樊葦冠佩劍為紛相聯邇來

國運屬中地爭暮死節蓋生全海陽老守鬚汗赤山

東大將蒐沉淵迺知儒術王政本至此尚賴扶傾顛

諸生區區抱遺籍草萊竄亡亦可憐南方上公境獨

治鹿鳴更欲興賓筵入場又手萬言就衆目一葉驚

先穿嚴裝又隨計吏發京城遠瞻北斗連秋風吹雲

別酒冷枯揚淺水閨門邊君行勿亟我有語落日正

在車衡縣竊聞天子正側席此去為拜彤庭前揮毫

休委醴泉頌給札莫賦凌雲篇但當開口論世事號

令次第宜何先坐令玉綱復大正乾樞共仰天中旋

我今有志未能往矯首萬里雲茫然

明月舟秦郵呂彥行題所寓室曰明月舟蓋

取甃社湖中有明月之句也

明月非月舟非舟問君乘之何所遊風多浪高徧處

處日莫欲渡令人愁此鄉偶侶淮南住醉客每來歌

白苧夜深天黑焚神光樊箇鷺鳥落高樹君才照國

不照車何用尚隔江湖居嗟予未識青藜杖願借舟

中卧讀書

京師苦寒

北風忽發浮雲昏積陰慘慘愁乾坤龍蛇蟄泥獸入

穴怪石凍裂生紋痕臨滄觀下飛雪滿橫江渡口驚
濤奔空山萬木盡立死未覺陽氣回深根茅蔭老父
坐無褐舉首但望開朝暾苦寒如此豈宜客嗟我歲
晚飄飄覓尋常在舍信可樂床頭每有松醪存山中
炭賤地爐暖兒女琛坐忘早尊鳥飛亦斷况來友十
日不敢開衙門竭來京師每晨出強逐車馬朝
天閣歸時顏色黯如土破屋暝作飢鷲蹲陌頭酒價
維苦貴一斗三百誰能論急呼取醉徑高卧布被絮
薄終難温却思健兒成西北千里積雪連崑崙河水
踏碎馬蹄熱夜斫堅壘收羌渾書生只解弄口頰無
力可報

朝廷恩不如早上乞身疏一策歸釣江南村

曉出城東門聞櫓聲

城門朝開路臨水人語煙中近魚市誰搖飛櫓入蒼
茫帶夢驚鳧柳邊起過處寒波動拍沙遠聞嘔軋復
呶啞征夫車轉山頭阪工女機鳴竹外家我身本是
江湖客偶墮黃塵曉行役此聲空憶舊曾聽舟中酒
醒東方白

始歸江上夜聞吳生歌因憶前歲別時

前年月夜聞君唱秋滿蘆花此江上一聲離思水茫

然雲逐孤帆共搖颺驚魚噴浪棲鵲飛木葉散落風
吹衣蓮歌盡歇松陵浦漁笛還沉笠澤磯停杯數到
臨終拍露下無聲斜漢白滿船相送盡悽然况我當
為遠行客解絃今年別紫宸歸舟江上又逢君一
尊重聽當年曲相對渾疑夢裏聞東方欲曙餘聲絕
悲喜盈襟竟誰說頭長把酒聽君歌從此天涯少離
別

夏珪風雪歸庄畝

江雲粘波脫糝糊青山忽失如亡連軋坤塋淨冰作
壘春意散入千林枯野橋古渡行人無清響瑟瑟索鳴
殘蘆江天萬里一老夫短策如蝟舟如鳧魚寒入泥
不上窠歸來遠識漁村孤柴門夜叩聞犬呼逕竹壓
折誰相扶山妻自炊糲子沽不羨炙肉園紅爐嗟予
客遊歲屢徂詩囊隨驢走髯奴長安何處覓酒徒飛
花撲頭帽不烏放舍無夢還江湖慙對風雪歸庄畝
南州野人為吳邑曾令賦

南州沃壤非泥塗清泉流渠歲不枯若人抱來勸水
上始志自比躬耕徒幸逢

堯舜可在野起縮墨綬來東吳一鞭不驅雨後犢兩
馬已化空中鳥郭西春朝布谷語柔柔綠雲連太湖

下車殷勤告父老勸耕為汝犁先扶我本野人偶叨
祿向汝未忍施鞭蒲五風十雨和氣應勿遣寸土生
蒿蕪太平村落鷄犬靜社飲自足歡妻孥但當相率
了官務莫勞縣吏來催租民言此令善教我斗酒相
壽歌嗚嗚共問野人竟誰是堂中鳴琴賢大夫

欲訪李孝廉至婁江遇風而回

船頭曉日浮江面東望青山是婁縣尋君此去愛潮
平出浦那知風色變煙雲翁忽波浪湧咫尺漁村已
難見高樹巢傾鵲鵲愁深潭窟陟龍龍戰舟師挨拖
若無力帆勢如蓬幾飄轉中河不進卻歸來握手何
由遂初願人生會合應有時天意茫茫吾敢怨

夜泛湖至東舍

漁邨港頭初月上鵝鴨不收菰荻響隔湖煙寺遠鐘
來居人盡歸吾獨往寒風蕭蕭寒浪生舟中欠載酒
壺行東家未宿如相待黃菜青燈機杼鳴

約諸君遊范園看杏花

去年春色近清明萬匝煙花夾曉城西苑相逢車馬
問何人不是踏春行今年人迷去年道風雨不來花
自掃僧寺庭空半紫苔侯家宅廢皆青草縱然無主
一株存憔悴塵沙不可論野外日斜啼鳥散消愁無

處却消魂魏公園林芳塢下間有柔枝正堪把休言
亂後少花看得到花前人亦寡明日尋君君莫違共
隨遊蝶弄晴暉閉門夢斷江南晚忍見迢迢春自歸

鷓鴣捕魚

秋江水冷無人渡群鷓鴣忍飢愁日暮白頭來往似漁
翁心思捕魚江水中眼明見魚深出水復恐魚驚隱
蘆葦湏更嚙得上平沙鱗鬣半吞猶見尾江魚食盡
身不肥平生求飽苦多饑却猜人少忘機者海上相
逢不飛下

泉南兩義士歌

泉南兩士陳與孫少小相約為弟昆合疎成戚契誼
重異木纏結如同根升堂握手出肺腑交拜二母開
壘樽具舟期賈海外域欲度夷雙窮昆命滄溟東望
浸天爛颺風怒攪波濤渾天吳恍惚出怖客掀舞鮫
鱗飛鵬鯤孫言陳宗惟子在遠涉巨險吾宜奔汝親
頭白倚門切慎勿輕去遠晨昏相讓不得乃更往桂
席遙指扶桑瞰望山行覓島中國卉服通譯侏儻言
尋煙莫投薜荔屋趣墟晝集枕柳村踰年還家喜得
寶木難火齊并瑤琨探囊用取兩不較屑屑彼我誰
復論急難相援誓終始歲時燕慶烹羔豚義風久已

動珠俗推結相見知欽尊我聞同氣有爭利闔牆往
往隳家門又看結交許歲晚盟盤未撤渝情思管鮑
居貧乃共濟餘耳得勢終相吞若茲二子古亦少簡
牘可使他年存竹歌爲繼王子傳薄俗視此應堪敦

節婦吟

城頭黑雲如破屋車走爭門折千軸姚家新婦亦東
逃男姑驚惶兒女嗥自知數口難俱免欲渡前溪舟
尚遠嗚夫棄妾當奉親獨赴清流不愛身此日誰能
問南史如婦曾書與人死

立秋前三日過周南飲雷雨大作醉後走筆
書壁間

周郎乃是同鄉友亂後相逢驚老醜日斜邀我話舊
游爲喚金陵白門酒一盃乍解羈旅顏兩盃漸沃粘
吟口三盃不覺已陶然此身竟到無何有青天俄忽
震霹靂白浪翻江怒蛟吼急雨爭鳴池上荷狂風已
折門前柳醉中相對正坐忘七箸何須驚落手家人
喧呼水入戶顛倒屋茅隨地走床床避漏且莫歎旱
氣方除賀田叟奪收預到三日前淨掃炎氛去如帚
黃昏泥潦歸未得呼燭相留卧東牖夜深酒醒起獨
行雲散城頭見星斗乃知天變只須更人在艱難豈

云久

送張倅之雲間

鱸鄉亭前楓葉稀讀書堆下征鴈飛孤城迢遞秋色
裏作官自好休思歸扁舟晚待潮東去琴鶴由來是
家具別意方留江上盃離心已掛雲間樹如此風流
一使君文章政事更何云絕憐退食蕪茶養不向
望白雲

送王孝廉遊京歸錢塘

江南草長胡蝶飛玉缸碧酒流春輝相逢上客同買
醉白馬新自燕山歸燕山歸來不堪說易水寒風蕭
門雪朝卻空隨使者車帝閭不受書生謁笏聲香眇
歌苦辛短衣笑拂京華塵不留東閣觀奇士還覓西
湖別故人此行莫嘆知音寡曾到黃金舊臺下荒
遺址今已平更有何人致賢者

愛竹軒爲陳維寅賦

匡山老客何清真自繞圍屋栽蒼筠年來無肉雖苦
瘦家有萬玉誰言貧一竿護惜不忍剪何以持釣橫
江鱗僅來掃葉自可喜客至踏筍長遭嗔轆轤罷
結遠夢碧雲忽墮湘南春涼陰脩脩琴硯落翠舟
舟沾衣巾詩成時向節下寫醉墨點破煙痕新風來

清嘯與相答若聽金奏怡我神知無顏色媚兒女自古相愛惟幽人洛陽陌上花易過歌鐘競賞勞車輪何如此君最耐久歲晚結托同情親亂聲朝送簾外兩踈影夜拂窓前塵我嘗種此欲免俗亂後伐盡惟荆榛故園咫尺未能去移家幸得為子隣往來倘許如二仲敲門借看母嫌頻

望月臺

臺前夜半鳥啼時起望明月彈商絃月來照見臺上影松挂滿山風露冷

釣雪灘

江流欲漸魚不起一棹猶釣寒蘆東漁村茫茫煙火微雲滿晚蓬人獨歸

幻住精舍尋梅

郭西雪後尋僧院短竹穿沙水如練梅花有待我來惟十日春寒未開遍忽思前日渡江水使解征帆宿山縣偶逢一樹在官廨為寫新詩水滿硯關山筮別今五年縞袂誰家月中見自慚衰亂尚飄泊淚眼如看故人面黃昏酒醒逐寒影繞樹千回意無倦南枝北枝亂如雪未許東風吹一片名園桃李盡荆榛空谷獨開君莫怨重來省視兩何如惆悵歸時有餘戀

北郭秋夜喜徐卿遠來兼南遊

東海徐君我同里日共周旋接冠履斯人自是真可人不見心憂見之喜豈容遠別間山岳兩歲僅收書一紙頗聞傲祿不自養霧雨南方疫時起誰能忽送千里來應有飛鴻渡江水虫聲今夜空館涼東燭相看疑楚裏瓊枝何以失舊色客路風塵亦勞矣我今不辭出門行病眼流眵肉生翳與奪得喪未足較惟有一貧聊復爾暫來即去何使然撫琴東西覓知己當時結交豈不多下車相揖今無幾願君窮達存此心勿使千年笑餘耳

次韵荅朱冠君遊城西之作

前年城西作冶遊柳條拂蓋花迷舟笑看明月問狂客我舉太白君當浮去年城西復偶住酒伴家家邀即去東隣寺裏花正開半醉半醒遊幾度今年有花愁獨尋閉門三日卧春陰將軍小隊遊何處日暮空聽車馬音臯橋秦娘珠窈窕為我喚來歌水調客愁草草不易除去事茫茫本難料玉壺一雙秋露傾唯此可以忘吾情醉歸共舣草中石笑臂弓絳霹靂鳴

題朱澤民荆南舊業畝

睢陽醉磨一斗墨楚落荆南寫秋色大陰垂雨尚淋

滿哀整回風更蕭瑟楓林思入煙霧清湖水愁翻浪
波白溪上初逢野老航山中遠見先生宅林田半頃
連芋區茅屋三間倚蘿薜僧來看竹乘小興客去尋
茶借高屐任公臺下石可坐周侯廟前路曾識虎迹
時留暮苔紫蛟氣或化秋雲黑城郭當年別已久風
塵此日歸不得落日書齋半壁明窗盡卧對空相憶
贈步練師禱雨

白頭道士騎一鶴手把青蓮下窳廓人間又見海田
枯十丈黃塵沒城郭昔年服事茅長君能役鬼神呼
風雲下爲群生掃旱沴兩工驅起如羊群除雷填填
天欲怒靈飈吹旗紫壇暮書入重關虎豹開辟況古
井蛟龍護湏臾其澗何滂沱十日不雨應無禾祠官
空爲大雩舞覲女羞作迎神歌明朝師歸定何許雲
裏懸珠火如黍更煩夜起把天瓢翻作東南洗兵雨
月支王頭飲器歌

磧中萬騎驕嘶雪頭掛金鞍敵初城歸來漆作太白
杯胡酒寒凝色如血故國無榮歸夢迷朽骨飲恨空
如泥琵琶聲中鬼語襍酥燈照夜風淒淒崑崙倒瀉
黃河入袍汚淋漓疑泪濕部落誰醉國士恩尊前一
夜無聲泣烏縣降王猶疾首起奉單于千萬壽

海石爲張紀室賦

大星墮水聲若吼祖龍夜叱神羊走誰將五色補天
餘屹障狂瀾歲時久空嶺山頭精衛鳥身墮風波衝
不了媧皇去後幾桑田鰲背靈峰一拳小

張中丞廟

延秋門上烏啼霜羯奴曉登天子床江頭老臣淚暗
滴萬乘西去關山長公卿相率作降虜草間拜泣如
群羊當時不識顏平原豈復知有張睢陽孤城落日
百戰後瘦馬食尾人累瘡男兒竟爲忠義死碧血滿
地嗟誰藏賀蘭不斬上方劍英雄有恨何時忘千年
海上見祠廟古苔叢木秋風荒摩挲盡鮮塵網裏勇
氣煒煒虬鬚張玉歌大招客醉酒忠魂或能來故鄉

高太史大全集卷之十一

吳郡高啓季迪著

南州徐庸用理編

長短句體

青丘子歌

江上有青丘子徙家其南因自號青丘子
閒居無事終日苦吟間作青丘子歌言其
意以解詩之朝

青丘子醜而清本是五雲閣下之仙卿何年降謫在
世間向人之道姓與名躡屩厭遠遊荷鋤懶躬耕有
劍任羞澁有書任縱橫不肯折腰為五斗米不肯掉
舌下七十城但好覓詩句自吟自酬賡田間曳杖復
帶索傷人不識笑且輕謂是魯迂儒楚狂生青丘子
聞之不分意吟聲出吻不絕吟吟鳴朝吟忘其飢暮
吟散不平當其苦吟時兀兀如被醒頭髮不暇櫛家
事不及管兒啼不知怜客至不果迎不憂回也空不
慕猗氏盈不慙被寬褐不羨垂華纓不問龍虎苦戰
鬪不啻烏兔忙奔傾向水際獨坐林中獨行斷元氣
搜元精造化萬物難隱情冥茫八極遊心兵坐令無
象作有聲微如破懸蟲壯若屠長鯨清同及沆瀣險

此排崢嶸露靄暗雲披軋軋凍草萌高攀天根探月
窟犀照牛渚萬怪呈妙意俄同鬼神會佳景每與江
山爭星虹助光氣煙露滋華英聽音諧韶樂咀味得
大羹壘間無物為我娛自出金石相轟鏗江邊茅屋
風雨晴閉門睡足詩初成叩壺自高歌不顧俗耳驚
欲呼君山老父携諸仙所弄之長笛和我此歌吹月
明但愁歎忽波浪起鳥獸駭叫山摧崩天帝聞之怒
下達白鶴迎不容在立作狡獪復結飛珮還瑤京

登陽山絕頂

我登此山顛不知此山高但覺群山總在下坐撫其
頂同兒曹又見太湖動我前洶湧三十萬頃煙波濤
長風吹人度層嶂不用仙翁赤城杖峰迴秋礙海鷗
飛日出夜聽天鷄唱中有一泉長不枯乃是蜿蜒神
物之所都老藤陰森洞府黑樹上不敢留棲鳥常年
禱雨車來此技金符靈旗風轉白日晦馬鬣一滴露
三吳岩壑蒼蒼境多異樵子尋常不會至探幽歷險
未得歸忽聽鍾米澗西寺此時望青冥脫略塵世情
白雲冉冉足下起如欲載我昇天行古來名賢恣何
有只有此山長不朽欲呼明月海上來照把長生一
瓢酒洋丘醉枕肱洪崖笑口開秋風吹落浩歌聲地

上行人盡回首

張節婦詞

靈壽張明府嫡母早寡守志

誰言妻有夫中路棄妻身先殂誰言妻無子側室生
兒與夫似兒讀書妻辟纊空房夜夜聞啼鳥兒能成
名妾不嫁良人瞑目黃泉下

與客飲西園花下

一壺酒正滿一樹花仍新傾壺對花樹日暮西園春
不愛枝上花愛此花下人相逢莫學花無賴明日分
飛隨路塵

吳中逢王才隨朝京使赴燕南歸

江南草長蝴蝶飛白馬新自燕山歸燕山歸不堪說
易水寒風薊門雪朝卿空隨使者車禁閣不受書生
謁一杯勸君歌莫哀歸時應過黃金臺不見蒹葭秋
未土花茶伯齒已歌昭王死千載無人延國士

白雲泉

白雲不為雨散在清泉流泉氣復成雲山中同一秋
岩前石竇幽寒處雲自長浮泉自注潛龍未起出深
泓渴鳥時來下高樹雲應無心飛上天泉亦不肯隨
奔川老僧愛此不復下山去卧雲飲泉終歲年

戎王追獵

前騎脫兔奔後騎驚鴻急火燒秋草獵場空一燕窮
追勢難及大小當戶左右賢單于勇銳閑支妍雕戈
白羽謔爭發衆中得雋知誰先君不見天榮持貞天
子馳一馬磴四豕

茅山陳道士卧雲所

不逐雲渡海寧隨雲出山但邀雲共宿日夕三峰間
細繻枕席潤掩霧房攏間聽松閣前風滿耳吹盡白
雲應睡起

贈醉樵

川釣已遺獵野耕終改畝不如山中樵醉卧誰得呼
采山不采松松花可為酒酒熟誰共斟木客為我交
木客已去空石林舉杯向月邀吳剛借汝快斧斫大
桂要令四海增清光林風吹髮寒掩耳獨枕空尊碧
岩裏此時忘却負薪歸猛虎一聲驚不起在間萬事
如浮煙看茶何必逢神仙青松化石鶴未返酒醒又
是三十年

雷雨護嬰畝為包山徐庭蘭賦

兒衣寒母衣濕風雨蒼黃歸意急雷忽鳴兒勿驚抱
兒與兒同死生樹聲吹迴水聲注田家尚遠無避處

看面誰念亂離人白日青天乘兒去

南園

君不見平樂館古城何處寒雲滿君不見奉誠園荒
臺無蹤秋草繁白日沉山水歸海寒暑頻催陵谷改
皇天大運有推移富貴於人豈長在請看當年廣陵
王雙旌六纛何輝光幸逢中國久多故一家割據誇
雄強園中歡游恐遲暮美人能歌客能賦車馬春風
日日来楊花吹滿城南路疊石為山引泉為池辟疆
舊園何足奇經營三十年欲令子孫永保之不知回
首今幾時繁華掃地無復遺門掩愁鴉嘯風雨種菜
老翁來作主空餘怪石卧池邊欲問興亡不能語春
已去人不來一樹兩樹桃花開射堂踴圓俱青苔何
須雍門琴但令對此便可哀人生不飲胡為哉人生
不飲胡為哉

醉贈宋卿

勸君歸來休莫作滄蕩遊黃雲已蔽燕園晚白露正
滿梁園秋千石酒萬戶侯請君論此誰當優吳門日
出花滿樓小婦喚客不解羞君留綠綺琴我脫紫綺
裘今朝春好能飲否東風吹散江南愁

滿隱君月樓歌

樓高高月皓皓容月多得月早朝看西墮江夕見東
生鳥我歌鳥飛向穹昊樓中之人須醉倒人長開月
長好月中藥成人不老

滄浪亭

滄浪平無風波之驚滄浪廣有風月之賞吳興長史
舊違謫買得此水自號滄浪客乘釣在北渚榜船臨
西洲白鷗不來往遺興誰同遊發清歌弄清景醉入
荷花夢魂吟天念儒臣去國寬故典無塵水雲境斯
人去已遠我來空復情滄浪水雖在不似昔年清躡
躡獨過亭前路疎葦寒煙沙鳥鳴

約諸君看范園杏花不果後偶獨遊而杏已
盡落惟桃數樹盛開感而有賦因寄諸君

久欲與君往那期成獨來參差二月暮過却杏花開
杏花雖好今無在只有桃花悞相待杏白桃紅何淺
深春還不負看花心看花心君更劇莫為不來空歎
息空問萬事盡如花看意相尋應不得

石射棚

石射棚張石城石鼓響或發石騎勢欲行彷彿古戰
場上有愁雲生餓鴉嘯寒風若若箭鏑鳴何人作此
留山中鳥獸欲過膽盡驚疑是神禹治水時來教鬼

射降妖精至今風雨夕猶聽人馬聲嘗聞父老言鼓
鳴則有兵方今瘡痍民脫命見太平我願碎其鼓陳
其期

人安四海清自此萬年無戰爭

番人移帳圖

懸爾弧韜我弓拔帳何從掄林東顧語勿驅日暮中
野兇未十歲不能騎馬

夜聞謝太史誦李杜詩

前歌蜀道難後歌偏仄行商聲激烈出破屋林鳥夜
起隣人驚我愁寂寞正欲眠聽此起坐心茫然高詩
隔舍與相和雙淚迷落青燈前李供奉杜拾遺當時
流落俱堪悲嚴公欲殺力士怒白首江海長憂飢二
子高才且如此君今爲我將何爲

走狗塘

春堤長春草淺此地吳王曾走犬獵場四面圍畫旗
紅炬照輦還官選割鮮夕宴誰共食臺上西子非樊
姬春花年來草仍綠韓盧已去多麋鹿君不見漢皇
縱狗珠有功遂克直到烏江東

贈金華隱者

我聞名山洞府三十六一一靈踪紀真錄金華秀出

向東南遠勝陽明與勾曲樓臺縹緲開煙霞天帝賜
與神仙家靈源有路不可入但見幾片派出雲中花
子房之師赤松子三千年前亦居此飛行恍惚誰解
尋謾說至今猶不死松花酒熟何處遊理草自綠春
岩幽群羊卧地散如石老鹿耕田馴似牛聞有隱君
子乃是學仙者自從入山中不日到山下世人莫知
其姓名以山呼之不敢輕樵夫忽見苦未識只疑便
是黃初平嗟我胡爲在塵網遠望高峰若天壤茯苓
夜煮倘許殮鍊杖來敲石門響

春初來

春初來柳條欲舒花未開曉日窓前鳥鵲喜似報春
來喚人起東風吹暖入煙痕綠遍江南幾千里去年
春去憶愁人倏忽今年又見春但欲逢春醉盃酒不
管相思成白首

題大黃癡天池石碎圖

黃大癡滑稽玩在人不知疑似阿母傍再謫偷桃兒
平生好飲復好畫醉後酒墨秋淋漓嘗爲弟子李少
翁貌得華山絕頂之天池乃知別有縮地術坐移勝
景來書惟身騎黃鶴去來速縞素飄落沅塵縹緲川
公子欣得之手持示我請賦詩我聞此中可度難玉

枕秘記傳自青牛師池生碧蓮花千葉光陸離服食
 可騰化遊空駕雲螭奈何靈跡久闕藏荒竹滿野啼
 狸狸尋真羽客不肯一相顧却借釋子營茅茨我昔
 來遊早春時雪殘衆壑竄寒姿磴滑不敢騎馬上青
 鞋自策桃筇枝上有煙蘿披拂之翠壁下有沙石蕩
 漾之清漪晴天倒影落明鏡正似玉女晚沐高髻垂
 飲猿忽下藤裊裊浴鶴乍立風淅淅巨廬有地我未
 到未省與此誰當奇掃石坐其涯沁洄引流厄醉來
 自照影俯咲知為誰落梅撲香滿接離暮出東澗鍾
 鳴遲歸來城郭中復受塵土欺十年勝賞難再得恍
 若清夢一斷無由追朝來觀此畜惻愴使我悲當時
 同遊已少在我今未老形先疲人生擾擾嗟何為不
 遲但為高人嘆漢南已老司馬樹峴首已仆羊公碑
 惟應學道悟真訣不與陵谷同遷移仙岩洞府孰最
 好東有地腑西峨嵋高崖鑊鎖不可攀後以逕上仰
 望白雲樓觀空峩巍此山易上何乃遺便與猿鶴秋
 相期欲借太乙舟夜卧浩蕩隨風吹洞蕭呼起千古
 月照我白髮涼絲絲傾玉醪薦瑤芝招君來遊慎勿
 辭無為漫對圖畫日夕遙相思

書夢中

夢行塞下沙無水無蕪蔴牧羊人歸霜草短平地鷹
 羣棲不暖騎馬茫茫入遠煙一行衝起上秋天我夢
 驚回鷹飛去角弓吹斷江城曙

登金陵雨花臺望大江

大江來從萬山中山勢盡與江流東鍾山如龍獨西
 上欲破巨浪乘長風江山相雄不相讓形勝爭誇天
 下壯秦皇空此瘞黃金佳氣蔥蔥至今王我懷鬱塞
 何由開酒酣走上城南臺坐覺蒼茫萬古意遠自荒
 烟落日之中來石頭城下濤彭怒武騎千群誰敢渡
 黃旗入洛竟何祥蕭蕭英雄來時務割據幾度戰血流寒
 草生宮闕何蕭蕭英雄來時務割據幾度戰血流寒
 潮我生幸逢

聖人起南國禍亂初平事休息從今四海永為家不
 用長江限南北

媯雉子歌為友王常宗作蓋其跡也

媯雉子乃是軒轅之裔虞繆之孫混沌既死一萬季
 獨抱大璞存竊伏在草野冥心究皇墳蚤逢三光五
 岳之氣乍分裂天狼下地舐血流渾渾鹿走秦中原
 蛇鬪鄭國門俎豆棄草莽干戈斲崩奔媯雉子便欲
 東遊渡弱水沐髮滄海朝陽盆又欲西行沂河漢踰

崑崙山橫川阻兩地俱不可以往兮歸來掩戶卧旦
昏藉黍一區注醪一樽妻給井臼兒收鷄豚不詩曲
以媚俗不偃蹇而凌尊作為古文詞言高氣醇温手
提數寸管欲發義理根上探孔孟心下弔屈賈理其
質耀金石其芳吐蘭蓀叩虛答有響斷險成無痕陸
珍雜水怪變狀弗可論幾年兀兀不肯出坐待真主
庶運九五開乾坤鶴書自天來幽隱初見技使者遠
造廬鷄鳴起膏轄興養全匱編尚書為給劄奸寇泣
幽塚下恐遭誅絞書成一代進紫宸鸞旗羽衛夾陛
陳閭門導謁稱小臣麻衣不脫拜 聖人捧函近前
殿龍顏喜回春勅賚內帑之金輿綺段其文織作銀
麒麟蒙 恩乞還家以奉白髮親戴古弁垂長紳自
號山澤之臞民媯雉子幸際明良時無為寂默坐老
東海湄青丘有客鈍且痴與汝欲結同襟期左鼓清
瑟右吹鳴簫作歌共祝

天子壽五風十雨萬國赤子同熙熙

贈劉生歌

生善鍛為手鍊師製三隅鏡劉生
刀求歌贈之

君不見歐冶子金鑄魚腸照吳市君不見徐大夫藥
津匕首驚函秦奇鋒當年非不利氣奪秋雲愁白帝
伯圖恃此竟無成良冶徒為殺人器何如劉生獨煉

昆吾鋼大爐夜鍊騰虹光神鉞妙刀兩如水提出二
豎皆李藏利器之功有如此特為醫仙起人死囊中
長得伴刀圭海上何須刺犀兕我看十年太白西方
明銅山尋鑿兵縱橫幸逢 聖人生于戈戢四海清
願生但制此器勿制兵民無疫癘樂太平

春日客園無花偶感

荒園多青草而無一樹花東風吹春來只向何人家
南池舊日花滿煙美人夜彈蜀國絃亂枝迷眼歸不
得醉帶月露花陰眠無花雖足歎無酒更可悲如今
但得一壺滿何用紛紛紅紫為

白下送錢判官岳

白門有垂楊復有春酒香此地逢君誰乃是錢少陽
相逢既沽白門酒相送還攀白門柳不向公車更上
書却趁官署初垂綬日落淮水頭送君去悠悠梁王
苑裏花飛盡明日相思過汴州

贈錢文則琴呈良夫

古樂久不聞古器亦殘缺唯有朱絃琴韻與爭琶迥
殊別此夜聽君彈四座寂不喧古人有遺恨似向絃
中言初調乍冲融再弄忽悽惋秋猿春鳥相間啼夢
繞瀟湘碧雲遠怒濤勢出峽關石轟奔雷漫流入滄

海悠然去無回銅瓶一墮井汲引不可上離車軌軌
曉出關欲行未行苦惆悵夜深庭樹風雨驚恍疑鬼
神入蒲城須臾響靜月照席玉壺凍破冰崢嶸我心
正如水萬籟不到耳無端聽此聲雙泪迸落石感生
起請且莫彈胡笳文姬思家意咨嗟請莫彈覆霜孝
子在野愁彷徨願君拂拭登高堂先彈南風後文王
美哉大雅聲洋洋使我坐聽憂俱忘

雪齋為述上人賦

君不見韓刺史疲馬度關愁欲死君不見堯將軍叢
人擁帳飲正醺憔悴豪華兩何有丑人徒勞競奔走
雪深三尺坐寒龕誰似西齋衲衣叟開門一笑定起
遲虛空大地皆春熙松梢一片忽墮響夜靜山空人
不知此地應怜無熱惱尋梅莫若尋詩好便穿蠟屐
踏瓊瑤曉徑從埋不須掃

燕覆巢

雙燕生五雛怡怡向高屋雖飢毋出風雨來新作深
巢竟傾覆主人念雛不鮮飛移之別壘待毋歸雖雖
得壘燕勿喜相逢主人亦偶爾明年作巢當更好須
信安居最難保

五禽言和張水部

濕滑滑啼空山行人愁道路難高天浮雲自多雨人
不知還空愁汝

提胡蘆趣沽酒杏花村中媪家有君如不飲過却春
此鳥枝頭應笑人

郭公郭公天寒水空朝飛暮棲蕪蒿中蕪蒿中啼不
息千載魂應怨亡國

婆餅焦婆去餉孫田壟遙隴頭小麥穗已搖但頭好
收食自饒爾莫憂婆餅焦

脫却破袴脫却破袴溪深無船須涉渡亦思脫舊復
換新春機已空愁殺人

清冷閣

臨清池漱華閣明月入綺疏微風沾羅幙白波連遠
洲竹冷夫容愁客聽秋聲起魚驚星影流冰絃彈罷
鷓鴣曲天河墮水涼宵促試問西園閣上遊何如南
浦舟中宿

約王孝廉看梅

君莫憶東閣吟我莫憶西湖見兩地年來信不通塵
埃正滿春風面不知山中三日雪掩高脩竹斜倚愁
鴉啼讀書屋空滿梁月夢斷冷落留餘馨相尋定有
迎船鶴煙霧籠寒縞衣薄一尊好共煖花魂明日關

山苗中落

題滕用衡所藏山水畫

滕君興在煙霞間遠遊十年今始還畫圖示我有層
 障竟似何處之名山君言我初適東越酒船橫渡鏡
 湖月醉吟仙天姥吟海光欲曙清猿歌理草春已
 生便入金華行道逢牧羊兒疑是黃初平從此西遊
 楚江水大帆如雲掛空裏枕樓酌酒喚長風一日看
 山一千里不聞東林鐘但見香爐峰波迷洞庭闊樹
 隔瀟湘重白沙翠壁經過好就中樂度曾幽討麻姑
 壇上掃落花堯女祠前薦芳藻晚客湖南逢鴈回登
 臨長上定王臺天從朱鳥峰頭轉江自黃牛峽外來
 蒐竒歷險今應倦默坐舊遊空教遍時向明窓看此
 苗好山一一皆重見我聞君言自嘆嗟身如處女愁
 離家閉門讀書無半車髀肉漸生空翠華牀前塵土
 蔽雙屐何不踏之踐苔石幸逢盛岳岳道路平五岳尋
 真皆可適便當往抱綠綺彈松風行盡萬壑千岩中
 仙書探得金匱空歸來誇君重相逢握手一笑吳門
 東

烏夜村

荒村烏夜樓忽繞月明啼生得東家女身為萬乘妻

至今種高樹不違烏飛去居人九與家愛聽啼啞啞
 啼啞啞勿驚怪婦閉門向烏拜

余未有嗣海雲道人以張仙畫像見贈蓋蘇
 老泉嘗禱而得二子者予感其意因賦詩以

謝

我年已及壯吉夢未屯熊雖有三女兒豈足慰乃公
 每聞隣家子夜雨誦經史起坐秋燈前顧影長嗟不
 能止道人念我書無傳畫圖卷贈成都仙云昔蘇夫
 子達之玉局禱甚虔乃生五色兩鳳鷄和鳴上下遊
 與夫子相照翮勸我勤禮之當有明珠出深淵我感
 道人意捧觴拜其前君不見東家翁力耕積多田平
 生辛苦立門戶兩兒葉擲如浮煙惡兒亦何須願得
 一子賢上以承吾宗下以與我玄仙乎有驗者明年
 請君更賦懸弧篇

高太史大全集卷之十二

吳郡高啓季迪著

南州徐庸用理編

五言律詩

草堂夜集

山家具鷄黍夜與故人期
暫喜逢歡會都忘在亂離
火寒移坐密燭盡得詩遲
莫聽高城角明朝別又悲

過胡博士郊居胡善策

頭白蘭陵客幽居共一村
老來吟力退貧去告身存
夕吹鳴梨葉秋泉注稻根
時因來問筮獨叩樹間門

送茅床

欲知難別意孤棹去還停
候吏分途遞離人雜醉醒
城臨秋水渡樹帶夕陽亭
後夜看吟燭憐君宿郡廳

孤鴈

衡陽初失伴歸路遠飛單
度隴將書怯排空作陣難
呼群雲外急弔影月中殘
不共鳧鷖宿葦葭夜夜寒

曉步園池

髮隨秋葉落心共曉雲舒
稍改新題句渾忘舊讀書
林半移樹鳥池響食萍魚
無限悠然意涼天獨步餘

次韵過建平縣

縣雖三戶小地僻罷兵防
茶市逢山客楓祠祭石郎
雲埋鳴澗斧沙膠度溪航
應愛青山好經過駐旌裝

鵲軒

金華朱少府生時有鵲集於庭後樹每歲生日輒一來其母將死鵲悲鳴久之而去因以名軒識其忌母之意云

寄杜二進士

花開寄別離花落正相思
交誼多年見卿愁近日知
我方淹上國君豈老明時
試問江干閣同登復共誰

雨蓬

楚雨滿汀洲瀟瀟洒洒客舟
夢驚孤枕夜愁掩一蓬秋
葦葉寒相戰灘聲暗共流
此時湘浦上同聽只沙鷗

聽秋軒

西澗秋聲起涼風助振號
數禽翻樹裏萬葉下亭皋
初訝來山雨還疑捲浪濤
老僧方入定終夜任蕭騷

杏花飛燕齋

雙飛如闕捷終日幾西東
尾拂花梢露身翻柳絮風
入簾時趁蝶歸壘每啣虫
何處長相見佳人院落中

角

皎皎復團圓何人剪素純
驅螢臨几席撲蝶近闌干
似月驚朝見生風變夏寒
時移當日棄莫愁網垂鸞

新荷

如蓋復如鈿初生兩後天
葉低浮水上莖弱裊風前
乍覆遊魚戲難藏宿鷺
眠佳人休便折留蔭採蓮船

鷺

雪羽獨倚脩閑情戀遠洲
聲沉煙浦晚影度月灘秋
避棹驚時起窺魚立未休
蕪葭同夜宿應只許沙鷗

馬

名駒產渥洼牽出萬人誇
逸足輕千里高髯散五花
城南遊藝陌塞上路黃沙
不受蠻奴策騎嘶向日斜

梧桐

井邊雙玉樹高結自生涼
影散秋雲薄聲喧夜雨長
疎英飄碧葦亂葉響銀林
綠綺誰能斷持持奏鳳凰

園棋

偶與消閑客圍棋向竹林
聲敲鷺鶴夢局罷轉桐陰
對坐忘言久相攻運意深
此間元有樂何用桶中尋

池上晚酌

夕陽初雨過團扇送涼過
竹裏方歸鳥沙邊尚浴鴉

脫中懸峭壁流竿逐回波
六逸當年樂何如此處多

簾

蠻藤巧織成乍展覺涼生
紋麈寒波細光搖夜月明
坐令葵扇棄眠稱石床平
須信南軒下夏天夢亦清

射柳

風煖畫旗張將軍集射場
馬嬌嫌響急人勇喜弓強
但見青條折那知白羽翔
三軍歡笑處巧中勝穿楊

流螢

熠燿復青熒流光不自停
暗飛如避月遠墮欲隨星
穿樹臨幽檻綠莎集小庭
莫將羅扇撲囊取照遺經

水紋圖

波影繞闌干清虛似廣寒
荷香臨檻挹月色捲簾看
夜靜聞清吹涼多却素紈
宴酣思薦鱸銀縷簇金盤

新蟬

翔翔乍離脫咽咽試初鳴
蒲葉棲身穩移柯忽意驚
亂催恣日墮微喚浦風生
何待當秋聽今朝已感情

林間避暑

自愛巒藤滑閑舒卧石苔
松風催暑去竹月送涼來
石氣生琴薦泉香入茗杯
却憐行路子愁暍向黃埃

送劉首即出佐邊郡

符券前軍重衣冠上客才地圖連異壤星次出中台
暮雨車投峽秋風扇却埃省中梧樹在鳴鳳會重來

溢浦琵琶圖

秋夜相逢處閨愁襟宦情四絃風共拂兩棹月同明
司馬青衫濕佳人白髮生至今溢浦上楓葉尚哀聲

金人馬圖

名王愛遊獵初試射鵰弓白草秋原曠黃沙晚塞空
琵琶應漢女騷裊是胡驄歸醉葡萄綠穹穹廬在月中

夜訪蟾釋子因宿西澗聽琴

清夜獨幽尋岩扉落葉深許携陶令酒來聽穎師琴
人醉月沉聞鳥啼風滿林應留西澗水千載寫餘音

錢塘送馬使君之吳中

樟亭離席散進餐畫幃車飛雉新阡麥啼鶯故苑花
望山登郡閣行水到田家莫道疑香句前人獨可誇

與劉將軍杜文學晚登西城

木落悲南國城高見北辰飄零猶有客經濟豈無人
鳥過風生翼龍歸雨在鱗相期俱努力天地正烽塵

和周山人見寄寒夜客懷之作

亂世難為客流年易作翁百憂尋歲暮孤夢怯山空
門掩雲峰裏燈明雪竹中無因乘夜訪相慰一尊同

哭臨川公

身用已時危衰殘况病歎竟成黃犬歎莫遂白鷗期
東閣圖書散西園草露垂無因真江上應負十年知

一窓秋影

脩竹與疎桐秋陰接桂叢並生金井側同映綺疏中
隱匿繞籠霧交橫忽颺風不須懷故館月落併成空

皇太子遊東苑池上呈青坊諸公

銅輦出鈺徐春官畫講餘戟煩即將衛簡授大夫書
草長園鳴鹿冰開沼躍魚從遊伴商皓黍藊愧何如

題溪山小隱

何處溪山隱衙門對野橋晚風携鶴子春雨種魚苗
小徑斜通竹疎籬曲護蕉人生閑自足不問楚詞招

城西客舍送周著作

客中寒食後惆悵送君遠花隱歸城布風吹渡水衣
夜窓吹黍散春苑闌茶稀誰念西齋雨相思獨掩扉

兵後出郭

俯仰興亡異青山落照中民歸隣樹在兵去壘煙空
城角猶悲奏江帆始遠通昔年荆棘露又滿閨閣宮

謝賜衣

臚呼遙捧賜拜服望蓬萊香帶爐煙下光迎扇月開

奇紋天女織新樣內工裁被澤徒深厚慙無奪錦才
西清對雨

楚臺雲起速漢北雨來微曉濕宮城柳寒沾陞楸衣
瀟中隨葉墮爐畔帶煙飛坐諫西清暇

君王召對稀

夜宿 太廟齋宮

烏散廟壘空清香肅闕宮太常齋禁密

列祖亨儀崇井叩銅瓶月輝鳴玉珮風聽鐘候

車駕庭燎已燼燿

送秦主客遷侍儀仗

蕃客未曾識衣冠上國風承

恩越北闕羅直出南宮導

駕爐烟裏催班漏點中時清多奏頌還向閣門通

春日退直呈禁署諸公

待詔直東華歸休每日斜職連詞客苑俸入酒胡家

簷網長繁紫庭磚欲過花知君未出院應早侍中麻

送張司勳赴寶慶同知

乍出司勳幙還乘別駕車按圖猶漢地輸布盡蠻家

山熱蛇懸樹江晴鶴浴沙郡樓回首處北斗近京華

寓天界寺

兩過帝城頭香凝佛界幽果園春乳雀花殿午鳴鳩
萬屨隨鍾集千燈入鏡流禪屋容旅跡不覺久淹留

送前進士夏尚之歸宜春

淒涼庾開府老去復如何故國歸鴻少

新朝振鷺多菊荒應自歎交秀竟誰歌相送堪愁思

蕭蕭楚水波

早出鍾山門未開立候久之

關吏收魚鑰趁朝阻向晨忘鳴鷄睡熟倦立馬嘶頻

祈靜霜飛堞鍾來月墮津可憐同候者多是未闌人

雪夜宿翰林院呈危宋二院長

偶伴玉摩詰寒宵宿禁林院鈴風外靜宮漏雪中沉

絳燭銷吟燭青綾擁賜余明朝陪賀瑞銀闕曉光深

自天界寺移寓鍾山里

移寓鍾山里開軒見翠微寺僧遠乍遠隣父識猶稀

愛讀明開牖防偷因設扉誰言新舍好畢竟未如歸

夜逢故郡賀冬至使胡普二博士同宿

會宿本無期忻逢兩舊知問年驚別久候曉畏朝遲

寒澁高城漏陽迎上苑枝明朝使事畢歸騎又天涯

至夕夜坐客館

久客漸忘家今宵忽感嗟旅踪猶泊梗陽氣又吹葭

巷屋門封雪鄉關路逸沙閨中想逢節也解憶京華

送鮑翰林遷官陝右

鑿坡初罷直西去惜離群載筆唐供奉寡惟漢史君
濁流河驛兩高樹岳祠雲公暇應懷古登臨賦夕曛

送曾主簿之平樂

路出桂江東鄉音想未通蛇飛山苦霧鵬運海多風
木魅長欺客花蠻少學農縣廳何處在柳葉晚陰中

桓簡公廟

荒林慘淡中石馬欲嘶風功在山留碣威存廟挂弓
飢鴉迎祭客走鼠駭巫童千載宣城道人憐內史忠

送前國王助教歸臨川

去國獨依依羈臣淚濕衣夢中燕月冷望裏楚山微
去變人驚老身全詔許歸舟前楓葉落應到故園扉

送潘巡檢之閩中

京師到閩海秋色幾程餘莎柵山兵守塔林島戶居
曉衙鷄鹿晚暹騎隨車清去元無盜將軍好讀書

送思上人

名林雖盡廢南去只隨綠野飯晨留鉢城鍾夜到船
虎馴應畏法鳥喚不驚禪它日期相見高峰舊塔前

宴王將軍第

流水通侯第行雲傍鼓臺雨催牙仗散風引羽觴來
曲學移聲按詩隨得韻載莫令遊宴歇次第過花開

送朱從事之吳興

釋褐方從宦青山故郡隣草深湖帶雨花暗驛藏春
鼓聚祈委女舟逢射鴨入幙中應待久徒此惜離辰

和友人過采石

山暝斷磯頭猿聲兩岸愁柳間娼女酒月下估人舟
擒虎嗟橫波騎鯨憶醉遊停撓正懷古風急葦花秋

詠柳

何恨苦長鞦纖姿嫵媚春慣愁行路客羞比舞楚人
亂葉斜斜雨狂花哀哀塵殘蟬噪日應落漢潭濱

無題

顧影出中堂長眉學內粧本為戚里婦不是挾斜娼
弱撲園中蝶筆彈陌上垂相逢不敢笑只恐斷君腸

京師寓廨三首

誰言舊隱非靜里且相依綠樹城通苑青山寺對扉
官閒休直早客久夢還稀是物春來典唯存舊賜衣

又

幾夜頻聽雨經春不見花藤蕪青渚燕揚柳白門鴉
拙宜危機遠工吟癖性加間坊車馬少不似住京華

又

寂寞過芳時幽懷只自知
抽無投相刺蔭有寄僧詩
鼠跡塵疑帳蛙聲雨到池
踈慵堪置散不敢愁名卑

送舒徵士考禮畢歸四明

寄語關門吏休輕尚布衣
琳孫聊應召周黨竟辭歸
赤日京城遠蒼煙海樹微
送君還自歎老却故山薇

陪客登陶丘

相逢俱失意此地偶同遊
獨樹邀人去斜陽為客留
依村煙景夕近水竹聲秋
設有歸歎歎何山是故丘

王公子宅五月菊

秋英忽夏發宛在阿戎家
細認驚初見高吟喜共誇
不依寒竹兩欲映午榴霞
我肯甘遲暮尊前有此花

送周復秀才賦行李中一物得統笏

不盡乘鸞女應怜素質新
霜機驚落早風塵讓揮頻
席上曾歌愁窓間或掩頰
何如為君子遠路障埃塵

送流人

漢條應偶觸蠻俗未能諳
海近風多颶山昏瘴似嵐
行衝哀向虎食畏盡家香
鄉國何年返縣知老日南

贈張省郎

漢署早為郎長遊鳳沼備
鷄知壺水使馬識火城光

每載趨曹筆時熏直省香
邊書無一羽冠蓋得翔翔

送翰公住靈岩

離宮遊路絕名寺道場開
我昔題詩去師今說法來
茱萸垂澗戶菡萏發池臺
興壞俱空幻登臨不用哀

送宿衛將出守鄧州

中郎身領仗宿衛在承明
舊射雙鷗落新乘五馬行
紅雲遶魏闕白水近穰城
好勸諸年少春來賣劍耕

甘露寺

勝地江山壯名林歲月遙
剎藏京口樹鐘送海門潮
月黑龍光發天清蜃氣銷
何當尋狼石間坐話前朝

送張羽後夜坐西齋

閒齋聽鍾坐憂緒悵多端
鳴鴈雨中急離人江上寒
秋燈下木葉夜艇隔風湍
別後情蕭索方知舊會歡

徐山人別墅

茶香孤墅發竹色四隣分
掃地侵蟲字開窓散鳥群
桐涼池過雨苔潤石生雲
我出無車馬偏宜訪隱君

客館秋懷

獨卧愁空館墻陰野豆開
暑將潮氣歛秋興竹聲來
身賤多違志時清少棄材
慙非張仲蔚門戶有蒿萊

秋夜宿周記室草堂送王才

相別還相戀秋宵暫對林人情貧後見客况醉中忘
池柳疎含吹江雲薄護霜離舟待明發愁思劇茫茫

江上兩

冥冥衆樹昏浩浩一江潭急有迴風韵輕無入霧痕
鳥啼葉竹嶺人卧落花村門巷春泥滑誰未共酒尊

送賈二進士歸省

年少擅詞華曾看手義衣裝歸路雨春酒別筵花
馬帶雲過嶺人同燕到家罷官趨覲好不是謫長沙

贈演師

石橋尋禮罷歸住白雲層法悟經懺讀年衰塔倦登
青苔生砌錫黃葉騎龕燈我欲相依老前身恐是僧

送錢氏兩甥度嶺

吏送投荒去應歸下潁營一家十口散萬里兩身行
洞撩狀商市山魃喚客名江邊南望泣不盡渭陽情

送客歸閩省觀

秋城聞暮砧歸思忽盈襟客久依人遍親衰念子深
青山分嶺跬紅荔到鄉林森水還堪樂何須季子金

圓明佛舍訪呂山人

憐君不出院結夏與僧同陰竹行廊遠香花掩殿空
飯分齋鉢裏書寄藏函中茶宴歸來晚西林一磬風

答宋人廡夜飲王氏池亭見懷

遙聞池上酌涼夜失炎兵酒碧傾當竹衣香望近蓮
泂波人弄月翻樹鳥鳴烟座上誰相憶唯應是惠連

賦得蟬送別

疎槐細柳中涼占一枝風蛻出形猶弱鶯飛響未終
兩來林館靜日下驛門空離管尊前發悽涼調正同

何隱君小墅

移家營別墅一迳竹扉開泉滿甌梁放花多借地栽
壁間田器挂窓裏浦帆來自戀幽居樂誰言是棄材

贈張明府

聞道彈琴慶門前柳帶沙海珍通估市湖稅減漁家
暮港迷荷葉秋田間豆花亂來無此地君政亦堪誇

送唐博士肅移家醉李

揚柳發初齊春陰廢苑西故人乘醉別新鳥傍愁啼
舟重全家去詩多一路題杏花關北郭誰復共招携

贈妓

樂籍小名收戾家舊主詎笑能擦客喜醉肯逐人留
蝶識薰香氣鶯慙度曲喉更伶諳酒令少日住揚州

送顧倅之錢塘

之官即勝遊送別漫多愁草色荒官燕槐陰遠驛驂

湖通朝汲井潮動夜眠樓早向臨平過荷花已欲秋
荅高廡同飲後見寄

竹林清暑宴客散獨歸時愁記歡餘別醒慙醉後詩
蟬催斜景急鳥度廣川遲何事聞鐘屢勞君尚遠思
沈徵士鉉野亭

清時猶在野獨卧見高情移艇聞煙唱釣簾看雨耕
江晴雙鷺下樹晚一牛鳴回首徒相憶柴車不入城
題鑿師王隱君墓表後

孤舟別楚水客髮已蒼蒼竟賦招魂些虛傳續命方
悲風柘隴小積雨藥園荒生城雖能悟看碑亦感傷
贈朱山人

老未嫌無依澗獨開房積雨苔生桁迴風葉滿床
學僧持淨律避客錄奇方若問塵中事無聞不是忘
溪上

秋色共溪長遊人笑語涼萍開天倒影蓮墮水流香
魚畝和星漉禽皇帶雨張從今推挂掉不必問瀟湘
次韵揚儀曹雨中

雨中池閣晚清簾薦文漪陰恐晴期遠寒疑暑候遲
荷高擎欲折柳重舞難歌鹿阻陪高詠開簾看散絲
寄錢塘諸故人

年少客名都狂遊每共呼荷深筆在舫竹靜矢鳴壺
明月潮千里殘陽雨半湖故人能念否歡意近來無
送烏程馮明府

青山若下南一騎入晴嵐縣治琴聲古泉香酒味甘
竹擱春護鴨葦箔夏分蚕大小馮君後傳家爾宛堪
喜了上人見過

幾時西澗別忽喜過家園澹泊林間供虛空世外言
豆花零脫架瓜蔓絡秋垣莫厭頻相顧衙門久息喧
病日

閉目洗黃蓮深窓坐兀然未忘聽鳥興暫絕看花緣
問女知簷日嗔奴畏電煙頭因無見處得證定心禪
病日不飲

患目未全明鑿教謝麪生暫從彭澤止恐學左丘盲
壁下蘭尊掩林間藥臼鳴坐聽連日雨何物慰閒情
賦得雙送人之官

吐沫亂珠流無腸豈識愁香宜橙實晚肥過稻花秋
出斷來深浦隨燈聚遠洲却齋初退食可怕有鹽州
江上早發

蒼蒼汀霧起何處望高城游子曉初發屋人寒未耕
犬鳴林月落魚躍浦風生已有先行者烟中聞棹聲

客舍喜姪庸至

客裏逢人喜相過况阿宜遠遊驚歲晚多難惜門衰
帆落江橋近鐘來野店遲一杯燈下語渾似在家時

哭周記室

萬里一羈臣悲歌楚水春湯期重會面竟作永傷神
主祭唯孤姪收詩有故人獨揮聞笛淚斜日下西隣

過永定廢寺

亂後僧何去門閒落葉時盡昏秋蠹老齋斷午禽飢
蠶說傳心法猶看賜額碑不知興壞理來此豈無悲

楓橋送丁鳳

紅葉寺前橋停君晚去梳醉應忘世難歸不計程遙
山隱初沉日風催欲上潮離寬來此處還似灞陵銷

盜發漢侍中許或墓

古冢竟誰穿虛傳銅駟堅王魚宵已出石獸曉猶眠
長夜俄看月幽臺不掩泉湏知摸金者亦到漢陵前

過海昌贈李侯

閒廳畫下簾秋色滿踈籬久戍殘兵老多貧長吏廉
陰風潮動郭晴日地生鹽三老相逢說年來戶贖添

送易從事祖飲南渚

踈楊映老荷別處最秋多送客年年路愁人日日波

霞明添醉色風急斷離歌莫為官程促青山易看過

題張靜屋畫

楚客寓荆岑秋雲隔浦陰人家連橘塢水廟映楓林
亂後清遊歇愁邊遠色深相看休向曉怕有峽猿吟

夜懷王校書

燈暗獨吟餘踈桐月滿除蟲寒初入戶鼠餓欲侵書
河漢三更望江湖兩地居相思無去夢今夜恨何如

荅陳則見寄

何由慰遠思獨詠寄來詩行路方難日清秋欲盡時
江多驚鴈火樹少宿烏枝早晚如相見應憐有髮絲

煮藥

葉燥井泉清山窓藥在鐺燈前看火候枕上聽潮聲
吟方就香來病已輕何時采芝木養得羽翰成

牧

自誇黃犢健登壠共揮鞭遂弄將斜日策披欲斷烟
歸鴨流水外踈樹舊庄前應笑侯門客騎驢走歲年

送石明府之崑山

茂苑行春罷携琴又向東潮聲數里外山色半城中
帆帶桃花雨衣翻柳葉風鳥夷聞善政為有船舶通

過城西廢塢

亂前遊寂熱亂後問都迷園散栽花戶林荒采菊蹊
廢泉流園淺斜日下城低唯有烟中鳥迎人似舊啼

送范架閣赴嘉禾兼簡李史君

陸相祠前路孤舟欲上時空江難晚別荒郡易秋悲
月送潮生早雲隨鴈去逐幙中知有子太守只題詩

喜呂山人見過江館

非君憐風契誰肯顧柴門日短清江路風高大樹村
交呈新著稿同發舊藏尊莫便尋歸棹心懷未盡論

贈隣友

同居一場中只隔水西東林近書燈露淡迴酒舫通
放鳧長合隊移竹每分籠只恐君微起難期作兩翁

慰之

雨中就陣卿飲酒醉歸聞丁二卧病客樓酌
我醉聽歌後君愁卧病中山雲秋初暗江雨夜樓空
短燭知頻剪清樽恨不同題詩非撒手那得愈頭風

送醫士宋君之江上

詩歌與藥囊此去即行裝跡隱名猶在交親意未忘
別芒繡舊帙嘗草識新方春水孤舟起還來問竹房

屏風

飲水依道者心清無衆喧幽花落半樹踈起過荒園

看山易云文尋澗偶窮源欲喻靜中趣居然忘我言

送董湖州

五馬貴專城初勞問俗行舟車輕客稅鼓角靜邊聲
曉市烟中集春禽雪後耕蒼山與白水應比使君清

效唐人贈邊將

翩翩越騎將負勇出山西駘虜誇猿臂封侯賭馬蹄
候烽河外暗伏幟草中低欲靈憑陵耻須禽左谷蠡

送董湖州

五馬貴專城花薰赤綾明政條民乍識賦籍吏初呈
山籠輸茶至溪船摘芡行非將茗雪水誰比使君清

晚次西陵館

匹馬倦嘶風蕭蕭逐轉蓬地經兵亂後歲盡客愁中
晚渡隨潮急寒山舊驛空可憐今夜月相照宿江東

送顧別駕之邊郡

故人雖盡別相去獨君賒綠路雲千坳臨邊樹一家
渡江船載馬到館燭驚鴉莫歎孤城廢春來尚有花

送曾恬題靈隱

遊方應未久柳色變新年在路逢春雪還山訪冷泉
鍾催投寺錫燈照泊江船法意休多問無言即是禪

江上寄王校書行

家落舊歡遠江邊獨掩扉隣家聞暮笛客舍試春衣
宿鳥歸山亂行人渡水稀相思比花絮斜日繞城飛

送越將罷鎮

楚客佩吳鴻臨邊最有功讀書圍壁裏賭酒射堂中
拂出莎城雨茄吹柳浦風越人相感意應與暮潮東

送王稜赴大都至正庚子作

王郎歌莫哀且酌姑蘇臺獨客自傷別諸侯誰愛才
闕河千里去宮闕五門開未肯輕齊虜新從下土來

送孫主簿之德清孫善琴

山水匝秋成君行思已清道逢迎吏拜田雜戍人耕
地遠知邊信家貧稱縣名應携一琴去相和長官鳴

留別李侯

梅發津亭壯春隨使節迴線多游子服酒滿故人杯
鍾送橫江雨車盤出岷雷平生感知已臨別更徘徊

寄蕭公

禪屋紫閣陰欲去問安心野岫隨流曲山門隱樹深
千燈燃雨塔一磬出夙林想見跏趺處雲多不可尋

送王才歸錢塘

南歸猶落魄北上已蹉跎草草官亭酒勞勞客路歌
親知今日少山水故鄉多七首空留在酬恩竟若何

送長洲周丞陞吳縣令

青山隔花橋改邑去非遙官食新添俸民傳舊布條
稻花迎午放荷葉待秋凋寂寞長洲路空聞五榜誥

冬至夜喜逢徐七

君來同客館把酒夜相看動是經年別觴辭盡文歡
雪明窓促曙陽復座銷寒世路今如此懸知後會難

送史丞之海門史淮東

黃茅連霧雨此地之荒涼日出岬夷迤江通渤澥長
改官非請宦到邑是還鄉海上遙聞說歸人已裹糧

夜雨

砌冷一登急空虛諸葉稀蕭條風雨夜幽卧掩床帟
隣杵聽初歇齋燈看尚散忽憂歲暮事聊食故山薇

師山周君客濠上思歸未得因話舊隱圖求

予賦詩

幾年留客舍千里念家山得向圓中見猶勝夢裏還
菊畦經雨發葍屋帶雲開楚奏無窮意相忘賴此間

微恙江館夜作

寒燈坐江館愁逼歲闌珊苦恨應催老微疴似忌閑
鷄前星列屋鴈外月臨灣明日將求藥身猶懶入關

逢李止水道人

吹簫月滿舟何處昔頻遊后土瓊花觀仙人黃鶴樓
別來應未老道在復何求相見俄還去江城楓葉秋

冬至夜兩感懷

節序閑何事徒令百感生升沉當世事存歿故人情
寒在微陽氣風疎綫漏聲他年說今夜聽雨宿南城

過戴居士宅

江邊戴顓宅地好惟幽尋高樹藏卑屋新篁補舊林
鳥成留客語雲作護花陰不負滄洲約重來論夙心

歸鴉

啞啞噪夕輝爭宿不爭飛未逐冥鴻去長先野鶴歸

荒村流水遠古戍淡烟微借問寒林樹何枝最可依

晚坐南齋寓懷二首

鴈過南齋暮魂消默坐中賤貧長作客愁病欲成翁
窓洒侵燈雨庭翻走葉風山妻猶解事未遣酒樽空

又

歲景着垂暮羈踪嘆屢遷有身能去俗無術但論天
菊老江城酒床寒客舍穗愁中還一笑兒女滿燈前

廿四日雨中夜坐

不與貧後歎每動醉中吟涉難知天意居閑長道心
鴈聲隨雨到鬢色與年侵獨想平生事蕭然坐夜深

又

身退惟宜靜謀踈且任真樓空三日雨書亂一床塵
丘隴多良友江湖獨放臣莫嗟年景暮轉眼是新春

書曹谷才世訓詩後為其子季常作

綠野高人第清門舊相家篇章存月露翰墨走龍蛇
作戒言惟切詒謀歲已賒過庭雖有訓得與共傳誇

題畫為僧賦

行負貝多書青山別舊廬亂尋安土避貧借破庵居
吟苦非愁裏禪癯似病餘思歸休看畫去盡空虛

題華氏瑞檜圖

誰指牛眠處江山地最靈氣鍾孤檜碧祥表五芝青
影動春雲亂香敷曉露零知君家種息曹讀墓前銘

樵

山中朝佩斧遠路入烟蘿伐木驚禽起穿雲畏虎過
石根供倦憇谷口應高歌莫看仙人奕歸來恐爛柯

夜投西寺

江月上秋衣來敲遠寺扉棲禽驚客至睡僕訝僧歸
鍾度行廊遠燈留浴院微非無招旅館禪寮頽相依

賦得銅人贈醫士

舊鑄明堂像新圖太史書體成金治內穴試石砭餘

摩狄年空老求仙事亦虛君懷濟人意為此竟何如
夏景園廬

門掩一齋空幽懷獨坐中本同趨府客偶似灌園翁

魚聞萍溪雨蟬嘶柳巷風未須論風志聊復去樊籠

寄題崇明學宮天水面軒

夜氣虛明際齋宮息衆喧詠餘風度瑟坐久月當軒

雲盡無留意池清有活源心知此時意欲論竟何言

送柔上人得船字

麓林初結夏東去又飄然罷說天台講行參雪竇禪

殘經松下几遠磬月中船不用空悲別師今絕妄緣

中秋琵琶洲宴集得紅字

香霧夕濛濛孤高桂樹東影疎林際月涼近水邊風

重露流杯綠繁星亂燭紅明年江海上高會與誰同

悼女

保養常多關艱難愧我貧悽悽臨歿語的的在生親

遺佩寒江月殘燈夜室塵中郎他日葉留付與何人

亂後經婁江舊館

此地昔相依重來事已非新年芳草遍舊里熟人稀

遠燕皆巢樹閑花自落磯遺踪竟難覓愁步夕陽歸

悼故顯宜人

避亂應千里悲復幾年塵埃初嫁鏡雨雪未歸船
有子隨行旒無人與葬錢東何處吊衰草暮江邊

過劉山人園

欲問幽棲處花蹊逐澗迴夕烟羅幙卷春雨藥房開

野鷄知琴意山蜂給酒材城中少間客誰解引車來

次韻楊禮曹移疾之作

養疾深扉掩還應謝裕交鳥多風和語葵晚雨緘苞

印向閑廳鎖鐘聞近寺敲相思愁莫過高樹古城坳

送周履道入郭

離群方感愴况復與君違花隱歸城旆風吹渡水衣

須知啞寂異莫訝往來稀今夜空齋兩誰憐獨掩扉

雨齋獨坐寫寄友

動與世相方端居學坐忘雨來池上樹烟起竹間房

屋鳥非晴弄闌花是曉芳尋山期已阻遙望柰蒼蒼

次韻酬西園公

林驚綠樹鼠池響食萍魚月戶雙砧落風亭一簾舒

體便清夏健髮映早秋疎本自無愁事何煩酒破除

聞鄰家琵琶有感

清唱合琵琶當年碧玉家弄殘催酒急抱重向燈斜

久別愁江樹重聽隔院花淚多思舊事不是客天涯

書王生扇

素質粉藤充蒲葵詎可方當懷驚抱月洒面怯沾霜
宜助驅蠅用羞隨走馬狂過時井自棄不怨井梧黃

送胡銓遊會稽

山水獨行徧蒼溪仍刻溪衣逢新火城舟渡雜蒼迹
黃絹尋碑讀紅裙賭墅携蘭亭舊基在觴咏付新題

送陳少府赴嘉定

雨歇桑陰路爭迎紺幟車湖多田水滿城小井烟踈
夜戶猶聞犬春濤欲上魚期君布新政去卜海濱君

報恩寺逢蔣主簿就送還如皋

貪語酒寒頻新年見故人別時煙寺晚歸路雪江春
造次燈前面蒼茫船上身明朝楚谷祭莫歎縣厨貧

贈姚東曹

爐氣拂春衣分曹直省闔相門旌節重即舍簡書稀
夜直聽鍾度晨朝策馬飛共憐王掾少粉署有光輝

鍾山雲齋圖

山勢識龍蟠香臺擁翠巖草堂猿嘯晚蕙帳鶴驚寒
雲擁梁僧塔苔封宋帝壇昔年遊歷屢今向畫中看

立秋日

碧天收夏色節氣變清商暑自今宵伏風從此日涼

金莖初有露玉氣未成霜
曉日弃妻雨潛催草木黃

